



**TUSI FAITAU ASO**

**2026**



**IANUARI – IUNI**

**Ekalesia Faapotopotoga Kerisiano  
i Amerika Samoa**



**IANUARI – IUNI 2026**

## **TUSI FAITAU ASO**

### **EKALESIA FAAPOTOPOTOGA KERISIANO I AMERIKA SAMOA**

1 Kanana Fou St, Pusa Meli 1537, Pago Pago, Amerika Samoa 96799  
+(684) 699-9810 <https://efkas.org>

### Faaliliuina e le Ofisa o le Lamepa, Ofisa Tutotonu EFKAS:

**Charis Sao AKF** (Ianuari—Fepuari)  
**Tamilo Palepua AKF** (Mati—Aperila)  
**Gatai Patu AKF** (Me—Iuni)

#### **Maliliega mo Ienei Fa'aliliuga**

O Ienei Tusi Faitau Aso ua mafai ona lolomia ona o se maliliega i le va o le Ekalesia Faapotopotoga Kerisiano i Amerika Samoa (EFKAS) ma le *International Bible Reading Association (IBRA)*, ua aumaia ai le faatagaga e faaliliu ai lana tusitusiga Peretania, *Fresh From The Word: A Bible for a Change 2025*, "i le gagana Samoa. Talu ai fa'afitauli masani i le fa'aliliuina o gagana, e i ai vaega o Ienei fa'aliliuga Samoa e le o mafai ona maua le uiga atoatoa o manatu ma mafaufauga o loo aumaia i le gagana Peretania. Peita'i, o le agaga maua i le Ofisa Tutotonu, fa'apea le Ofisa o le Lamepa sa feagai ma Ienei fa'aliliuga, ia mafai ona maua e tagata Samoa se punā'oa fa'aleagaga e utuvai faatasi ai ma tagata Kerisiano i le lalolagi, e fai ma ta'iala o le soifua tapua'i ma le ola su'esu'e i le Afioga Paia a le Atua i aso faisoo

## UPU TOMUA

I le suafa manumalo o Iesu Keriso **Le Ao o le Ekalesia**, matou te tuuina atu le lima o le faatalofa, ma faafeiloa'i atu i le pa'ia ma le mamalu o le **EFKAS** – afio lau Afioga i le Ta'ita'ifono ma le mamalu o le Laulauafono o le Fonotele; afio le Komiti Au Toeaina, faapea le mamalu o Komiti Tumau uma ma Mafutaga Lagolago; le paia maualuga o nofo a Matāgaluega, mamalu o Pulega, seia oo i 'aulotu ma totino uma o le tatou **EFKAS – Malo folau! Malo malaga manuia!**

E ui na afatia le tatou savaliga i peau lagavale ma galu fatitō, ma ua afemoe le faigamalaga a nisi e pele i loto ma agaga; a e lē faaitiitia ai le viiga ma le faamanu i le Matai Sili, Le Leoleo Mamoe Lelei e, ona o Lana tausiga ma le malu puipua o le soifua faatuatua o lana Ekalesia. **Faafetai le Atua ua aulia lenei Tausaga Fou 2026!**

Lea ua fa'ataumua ava lo tatou sã, e sauni folau i le folauga umi o lenei fo'i tausaga fou. A o le upu moni, *“E lē faigofie le pale ma le folau”*... e matuā faigata lava, talu ai e taupale i le matagi ma le au, ae maise pe ā ua matagiā le vaa i le vasa. E tumu i le popole ma le fefe, ona taumate lea pe tau i manū pe gotouga i le sami ulaula. A o se auunaga a le *Tusi Faitau Aso 2026* e taupale lo ta faamoemoe auā le **Upu Fou a le Alii**, e faatupuina ai le soifua faatuatua ma le faalagolago i le Atua.

Ua vaevaeina le Tusi Faitau Aso 2026 i vaega e lua: *Vaega Muamua: Ianuari – Iuni 2026; Vaega Lua: Iulai–Tesema 2026*. O tusitusiga ua lomina nei, o loo fa'aautuina ma le agaga e fa'atupuina le malamalama ma le soifua fa'atuatua o tagata Kerisiano, e tusa ma aso fai soo. E tomua matā'upu su'esu'e o lenei tausaga i le **“SAIL'INA O IESU.”** O fo'i o autu ua i ai i lenei tusitusiga, tatou te sa'il'i ili i le loloto o tala ese'ese o le Feagaiga Tuai ma le Feagaiga Fou. O la tatou sa'iliga mo le mālō o le Atua ma lona finagalo, ua tatou tausiniō ai i aso uma. Ua tatou iloilo fo'i i tala o le Tusi Paia, le to'i lalo o le tagata ma le toe fo'i i le Atua i la latou sa'iliga mo le poto ma le fia maua o le Alofa Tunoa o le Atua. O ia tusitusiga ua tatou maua i le **Isaia, Mataio, Roma ma Tesalonia**. Ua saunia i nei Tusi nisi se fa'asoa mo i tatou i lenei fo'i tausaga ua tatou aulia ma le manuia. O nei tapenaga ma tusitusiga e taula'i uma i le mafutaga vāvālalata ma le Atua Tolutasi Paia, auā o le fa'avae lea o le soifua fa'atuatua fa'aKerisiano.

O le fa'amoemoe maualuga, ia ave a lenei tusi e fai ma ta'iala o sauniga lotu a le **EFKAS** i aso ta'itasi o le vaiaso; fa'apea fo'i sauniga lotu a lo tatou Atunu'u, i so'o se tasi e fia fa'aogāina lenei tusi. O la matou tatalo, ia fa'ateleina ma fa'atumuina atu e le Ali'i lona Agaga, ae maise o le togiola e ala mai iā Iesu Keriso, ma ia mafutaina pea i tatou e lona Agaga Paia. **Ia Manuia le Folauga EFKAS!**

**SAILI'INA O IESU** (*Finding Jesus*)  
**Fetaia'iga** (*Encounters*)

**Aso Sā - Ianuari 4: “Uō, fa’atuatua ma le sa’olotoga”**

**Tusi Faitau – Mareko 2: 3-12** (*Friends, faith and freedom*)

**Matua – f. 3:** “*A ua omai nisi ia te ia, ua au mai le tagata supa, o lo’o fataina mai e le to’afā.*”

E fa’apefea ona tatou iloa le uō e alofa moni? Po o le tele o le ‘oa na te maua, po o le ofoina o le fesoasoani pe a mana’omia? O nai fesili e fa’atupu manatu i le tagata fa’atuatua e tusa ai ma le tala o lenei aso. Ua mamanu mai i le tala o lenei aso le galuega alofa na faia e tagata e to’afā i le ma’i supa. Ua fa’ailoa mai ai ni uō ua lē manatu mo latou lava, a e ua ofoina le fesoasoani i lē ua mafatia. O le tagata ua lē manatu mo sona lava manuia, a e ia maua e nisi le filemu mai faigata o le ola. O mafutaga fa’auō, o se so’otaga e fausia i vā o tagata. O le fa’amoemoe ina ia lelei lona vā feso’ota’i ma isi. E tāua a tatou uō i lo tatou ola ma lenei soifuaga ua tatou i ai. O le fesili fa’atupu manatu, e fa’apefea ona tatou iloa le uō alofa moni? O lo tatou faia o ni galuega fesoasoani mo nisi o mana’omia, o i’ina e iloga ai le uō alofa moni. Ua faigata fo’i ona maua ni uō e alofa moni i lenei vaitau o le soifuaga. A e ua fa’amanatu mai le fe’au o le Talalelei, o ai lava o mana’omia le fesoasoani i so’o se ala; ia ofoina le fesoasoani ma le loto fuatiaifo lelei.

**Tatalo:** Iesu Keriso le uō silisili, fesoasoani mai ina ia tumau lo matou ola fesoasoani ma fa’ailoa atu ia i latou lau afio ma lou mālō. **Amene!**

**Aso Gafua - Ianuari 5: “O le pologa”** (*The slave*)

**Tusi Faitau – Luka 7: 1-10**

**Matua – f. 3:** “*Ua fa’alogo o ia iā Iesu, ona auina mai lea e ia o toe’aina o lutaia e aioi mai iā te ia, ina ia māliu atu ma fa’aola lana auuana.*”

O loo aumaia i le tatou matua o lenei aso, le tagata e mausalī le fa’atuatua iā Iesu Keriso. O le fa’atuatua o le ta’ita’i ‘au a Roma iā Iesu, na ia sa’ili ai mo se fesoasoani ina ia fa’asaoina se tasi o auuana. O lona fesiligia o Iesu mo se lavea’i, ua atagia ai lona fa’atuatua i le Atua soifua. E ui i faigata ua feagai ma le auuana, a e ua ia maua le loto maulalo e sa’ili ai iā Iesu mo se mapusaga. O le malosi o le tagata e gata, a’o le Atua e ta’i folau pea i lo tatou ola. O se fe’au tāua ma se fa’amanatu fo’i lea mo le ‘au Kerisiano uma. O le fa’atuatua, o le meaalofo a le Atua ua fa’asafua mo tagata uma. Ua fa’amanatu mai e le ta’ita’i ‘au a Roma ma lona fa’atuatua, ia maua le loto maulalo e sa’ili ai i le Atua mo se fesoasoani. Ia tatou loto tetele fo’i pe a o’o mai faigata ma lu’itauina ai lo tatou ola i lenei lalolagi. E i ai taimi o le ola e gata ai lo tatou iloa i mea e tutupu. Peita’i ua fa’amanatu mai le Talalelei mo i tatou, ia lafo i le Atua lo tatou ola mautinoa; ona lē fesiligia lea o manuia i le lumana’i. Ia aua fo’i ne’i mate lo tatou taulogologo ma fa’ailoa atu i nisi le Atua ma lana Talalelei. Auā e tupu le fa’atuatua i le taulogologo.

**Tatalo:** Le Atua e, auina mai iā i matou le loto maulalo e sa’ili atu ai i lau Afio mo se fesoasoani. **Amene!**

**Aso Lua - Ianuari 6: “O le mā’elegā o Sakaio”** (*Zacchaeus’ zeal*)

**Tusi Faitau – Luka 19: 1-10**

**Matua – f. 3:** “*Ua fia maimoa o ia iā Iesu pe fa’apefea o ia; a e lē mafaia ona o le motu o tagata; auā o le tagata sa’asa’a o ia.*”

O le tala o lenei aso, o le tala iā Sakaio le ao lafoga. Na inosia e tagata ona o lona matape’ape’a; ma le fa’alataina o tagata ma o latou tamaoaiaga. E lē gata i lea, o lona pu’upu’u sa’asa’a na ese’ese ai lona tulaga ma isi tagata. Peita’i, e le’i aveia ia mea ma ala e taofia ai Sakaio, i lona fia va’ai iā Iesu. O lona naunau e sa’ili le Keriso ma fa’asaoina o ia, na maualuga ai lona tulaga i isi tagata. Ua ia maua tamaoaiaga e tele, a e ua ia naunau pea i le fia maua o le mafutaga ma Iesu le Keriso le fa’aola o le lalolagi uma. Ua a’oa’o mai lenei tala mo tatou, i le tāua o le ola sa’ili i le Atua. Ua tele suiga fou o le ola ua tatou molimauina i nei aso. Ua omai fa’atasi suiga lelei ma suiga lē lelei. O nisi o suiga, ua tau fa’avaivai ai lo

tatou ola sa'ili i le Atua. E i ai taimi ua tatou fa'alagolago ai i le malosi ma le iloa ua tatou maua. A o le fa'amanatu a le Talalelei, o a lu'itau e fetai'a'i ma i tatou ia 'aua ne'i punitia ai lo tatou ola sa'ili i le Atua. Ia maua le loto maulalo, e fa'ailoa ai o tatou vaivaiga i le Atua ina ia fesoasoani mai. O le Atua o lo'o tu i matagi 'olo, e fa'atonu folau i la tatou savaliga o lenei soifuaga.

**Tatalo:** Le Atua e, fesoasoani mai ina ia matou maua le loto maulalo e sa'ili lau Afio ma iloa lou finagalo mo i matou. **Amene!**

**Aso Lulu – Ianuari 7: “O le fa’afitauli paia a le ‘au so’o”** (*The disciples’ divine dilemma*)  
**Tusi Faitau – Mareko 1: 32-39**

**Matua – ff. 36, 37:** *“Ua mulimuli atu fo’i ia te ia o Simona ma i latou sa ia te ia. Ua latou maua o ia, ona latou fai mai lea ia te ia, “O lo’o sa’ili tagata uma ia te oe.”*

I le amataga o le galuega a Iesu, na faigata ona maua se to’a filemu i le ‘au so’o fa’apea le motu o tagata. Ua naunau le motu o tagata i le fia maua o le fa’aolataga ma se mapusaga filemu. A o le ‘au so’o ua vevesi ma ua lē mautonu ona o le lolofi atu o le motu o tagata ia Iesu. Ua latou manatu ai lava, ua tatau ia Iesu ona tali i mana’oga o tagata ina ia to’a filemu ai. Peita’i le tali a Iesu, na ia fa’amanino ai i ona so’o le uiga moni o lana galuega. O le galuega lavea’i ola na afio mai ai Iesu Keriso, o le finagalo alofa o le Atua mo le lalolagi uma. O le fa’amoemoe ola na ia momoli mai e ala i lana Tala Lelei, ua so’o ai le lalolagi uma. A o lana saunoaga manino i ona so’o ina ua latou maua o ia, *“Inā tatou o atu ia i a’ai e latalata mai, ia ou tala’i atu i ai le Tala Lelei, auā o le mea lea na ou sau ai.”* Lea ua fa’ataumua ava lo tatou sā o lenei fo’i tausaga, a e ua fa’amanatu mai le Tala Lelei; ia aua ne’i mapu lo tatou ola sa’ili i le Atua. O a fo’i ni fa’amoemoga e le’i mafai ona fa’ataunu’uina i lona tausaga, e tali mai lava le Atua i ona taimi e tatau mo le tagata. Aua ne’i avea manatu ma lagona o isi tagata, e ta’ita’ina sesē ai a tatou fa’ai’uga fai. A e ia maua le loto maulalo ma ia fa’alagolago i le Atua i lona taimi tatau e tali mai ai i o tatou mana’o.

**Tatalo:** Le Atua agalelei e, foa’i mai le loto tele matou te sa’ili atu ai lou finagalo mai taimi o vevesi o lenei soifuaga. **Amene!**

**Aso Tofi – Ianuari 8: “Motu o tagata ma le nu’u o Keriso”**

**Tusi Faitau – Mareko 3: 20-35** (*Crowds and Christ community*)

**Matua – f. 20:** *“Ua ō atu i latou i le fale; ona toe potopoto mai lea o le motu o tagata, ua lē mafai ai i latou ona ‘a’ai.”*

O le tala o lenei aso, ua lu’itauina ai i tatou e toe va’ava’ai ma malamalama i mafutaga i totonu o aiga. Ua toe fa’apupula mai e Iesu so’otaga fa’aleaiga o le tagata ma le Atua. O le fetalaiga manino a le Ali’i, o i latou e faia le finagalo o lona Tamā, o lona aiga i latou. Lea na ia fa’ailoa ai i le motu o tagata, o i latou o lona aiga ma lona fa’asinomaga i le lalolagi. O le vala’au a Iesu mo tagata uma e avea ma ona aiga, o se vala’au e tatau i ai le fa’amuumua a le tagata ua fa’atuatua i le Atua. O le tagata ma lona tupu’aga, o le tagata fo’i ma lona fa’asinomaga. O tatou aiga, o le fa’asinomaga mo so’o se tagata soifua. O le mafutaga i le vā o tagata ia mafai ona atagia ai le finagalo o le Atua. Ua fa’amanatu mai i le tala o lenei aso, le taua o tatou aiga. Toe silasila ane i mafutaga i totonu o tatou aiga, ia mautinoa o lo’o gasolo lelei mea uma. Ua fai lava i tatou ma aiga o le Ali’i ma lona fa’asino-maga i le lalolagi. O le so’otaga i lona vā ma le tagata na finagalo ai, e ala ia Iesu Keriso lē na afio mai. O lona uiga, ia atagia le finagalo alofa o le Atua i totonu o tatou aiga.

**Tatalo:** Lo matou Tamā e o i le lagi, fa’afetai i lou manatu mai i le tagata ma avea i matou ma aiga o lau afio; ma ou fa’asinomaga i le lalolagi. **Amene!**

**Aso Faraile– Ianuari 9: “Malaga a Iuta”** (*Judas’ journey*)

**Tusi Faitau – Ioane 18: 1-12**

**Matua – f. 2:** *“Ua iloa fo’i lea mea e Iuta le na fa’alataina o ia; auā na maliu atu so’o i ai Iesu fa’atasi ma ona so’o.”*

O luta o le tasi o so’o o Iesu i le galuega, o le na mafuta fa’atasi ma le Ali’i i lana galuega tala’i. O le mana’o o luta ia mulimuli iā Iesu, ia faia se suiga ma le fia molimauina o le fa’asaoina o Isaraelu mai le pule sauā a Roma. Peita’i, ina ua ta’ita’ia e luta le ‘au tusiupu ma faresaio iā Iesu, ua iloa ai le tofotofoina o Iesu ma le fa’amoemoe ua ia fesoasoani i le pulega a Roma. O se gaoigā ua iloga ai lona faia’ina i le fili ma ana fa’asoosoga. O lē na avea ma so’o o Iesu i le galuega, peita’i ua ia fa’asili le tupe a e galo ai lona vala’auina. Peita’i, ua ia lē taui atu iā luta i le leaga, a e ua manumālō lava lona alofa tunoa.

Ua loa aso o le mafutaga a luta ma Iesu i le galuega. E ui i lona fa’ataina o Iesu, a e le’i savali ‘ese le Ali’i mai luma o luta ma fitafita Roma. O Iesu ma lana galuega alofa i le lalolagi, ua fa’aeaina ai i tatou mai faigata o le ola. E ui ina o tatou fultitua mai le Atua i nisi o taimi, a e ua lē mavae ai lava le alofa naunau o le Atua mo i tatou. Ia tatou auauna ma le loto atoa e tautua le Atua ma lona finagalo. E ui ina tatou ola fa’afoliga i le galuega a le Atua i nisi o taimi, a e o lo o amana’ia pea e le Atua le vaivai ma le fa’atauvā’a o le tagata. O le a fo’i le taumafai o le fili e mailēi lo tatou ola, ia taula pea i le Atua lo tatou ola fa’atuatua. O le Atua o lo tatou malosī’aga lea, i taimi faigata o le ola.

**Tatalo:** Le Atua agalelei e, fesoasoani mai ina ia matou taumamao ma le loto tauimasui, a e fa’atupu le loto sa’ili i lau afio ma lou finagalo. **Amene!**

**Aso Toona’i– Ianuari 10: “Maria i le fa’avauvau”** (*Mary in mourning*)

**Tusi Faitau – Ioane 20: 1-18**

**Matua – f. 18a:** “*Ua alu atu Maria le Makatala, ua fa’apea atu i le ‘au so’o, “Ua ‘ou iloa atu le Ali’i.”*

O lagona mafatia ma le fa’anoanoa na o’otia ai Maria, ina ua tu’ufua le tu’ugamau o Iesu Keriso. O le tū ma le aga i fanua Iutaia Tutotonu, e faigata ona taliaina e tagata ni molimau a fafine i se mea ua tupu. Peita’i, ua filifilia e Iesu le tinā o Maria e ulua’i fa’ailoa atu ai lona toe soifua manumālō mai le oti ma le tu’ugamau. O lea gaoigā ua faia e Iesu Keriso, ua fa’ailoa ai lona alofa mutimutivale iā Maria ma lona loto fa’avauvau. O loimata o le fa’anoanoa ua liua i lagona fiafia ona o lenei Tala Lelei. Ua avea ai Maria ma ulua’i Aposetolo e fa’ailoa atu le Tala Lelei i ona so’o. Ua tu’ufa’afeagai ai fo’i e le Ali’i tū ma aga masani a lutaia Tutotonu, ma ua si’itia ai le tulaga o tinā. O le feiloa’iga a Maria ma Iesu Toetū, ua aumai ai se fa’amanatu taua mo i tatou ma la tatou sa’iliga o le Atua ma lona mālō e fa’avavau. Ua vala’auina i tatou e le Atua, e tala’i lona finagalo i le lalolagi i so’o se ala. E ui i le vaivai ma le fa’atauvā’a o le tagata, a e ua amana’ia lava i tatou e Atua. O a lava galuega ua vala’auina ai tatou e le Atua, ia faia ma le fa’amaoni ona manuia lea o le lumana’i.

**Tatalo:** Iesu e, fesoasoani mai ia matou iloa lou fa’atasi mai i taimi o le fa’anoanoa ma maua le lototele e fa’asoa i le lalolagi lou manumālō. **Amene!**

## O LE TALALELEI IA MATAIO

**Amata le galuega tala’i a Keriso** (*Christ’s ministry begins*)

**Aso Sā – Ianuari 11: “O taimi e manino ai”** (*A moment of clarity*)

**Tusi Faitau – Mataio 3: 1-17**

**Matua – ff. 13, 15a:** “*Ona maliu atu ai lea o Iesu mai Kalilaia i Ioritana iā Ioane, ia papatisoina ai e ia. A ua vavao e Ioane iā te ia, ua fa’apea mai, “E ao ona e papatisoina mai o a’u, a ē maliu mai ea oe iā te a’u?” A ua tali atu Iesu iā te ia, “Tu’u mai nei pea ia; auā e fa’apea ona tatau iā te i tatou ona fa’ataunu’uina o mea tonu uma.”*

O le leo o lē alaga i le vao, inā teuteu ia le ala o le Ali’i. E tāua le galuega a Ioane na muamua mai ai i le Keriso. Ua ia fa’ailoa i tagata le Mesia o le a afio mai, e fai ma fa’aola i le lalolagi uma. Ua avea le taulaga o Ioane ma ia fa’ailoa le Keriso, ma ala ua tōsina mai ai le fa’alogo a le to’atele o tagata. A e ina ua iloa atu e Ioane Iesu, na ia lagona lona fa’atauvā’a auā e sili atu lē ua maliu mai nai lo ia. Peita’i, na fa’amanino e Iesu iā Ioane ia fa’ataunu’u lana galuega ina ia taunu’u valo’aga ma mea tonu uma. E le’i faigofie ona

malamalama le motu o tagata i le Mesia ua afio mai. O Ioane ua avea ma papatiso i tagata i le vai, a o Iesu e papatiso i le vai ma le agaga. E ui ina faigata ona malamalama tagata i le Mesia, a e i ai le taimi o le Atua e manino ai mea ua nenefu. A o le si'ufofoga mai le lagi, "O lo'u atali'i pele lena, ua ou fiafia lava iā te oe."

**Tatalo:** Foa'i mai iā i matou le loto maualalo, ina ia manino ai la matou va'ai ma iloa au galuega i isi tagata. **Amene!**

### **Aso Gafua – Ianuari 12: "Fa'aosoosoga o Iesu" (Temptation of Jesus)**

#### **Tusi Faitau – Mataio 4: 1-11**

**Matua – ff. 1, 2:** "Ona aveina a'e lea o Iesu i le vao e le Agaga, ina ia fa'aosoosoina e le ti'āpolo. Ua fa'alāina ia i pō e fagafulu ma ao e fagafulu, mulimuli ane ona fia taumafa ai lea o ia."

O le amataga o le galuega a Iesu, na mua'i i fa'afitauli ma ona lu'itau. A o le finagalo o le Atua mo le Keriso, o lu'itau ia e tofotofoina ai Iesu ma lana galuega. Aisea na filifili ai e le Atua le toafa e fa'aosoosoina ai Iesu? O le toafa, o se nofoaga tu'ufua ma e leai fo'i se ola o i ai. A e ua tu'uina ai e le Atua Iesu Keriso, ina ia tofotofoina ai e le ti'āpolo lona fa'atuatua. E ui i le taumafai o le ti'āpolo e fa'asesēina Iesu, e le'i mafuli ai lona fa'atuatua i lona Tamā. O lona manumālō mai fa'aosoosoga, ua manino ai lona ola ua tumau i le Tamā. A o tatou i ai i lenei soifuaga, e tele pea lu'itau ma fa'aosoosoga tatou te fetaia'i i le ala. O le mea mautinoa, e lē moe le fili ma lona taumafai e lepeti lo tatou ola fa'atuatua i le Atua. Ua avea le tala o lenei aso, e fai ma fa'amanatu taua mo i tatou le fanau a le Atua. O a lava lu'itau o le ola e fetaia'i ma i tatou i le ala, ia mau pea le to'ovae i le Atua soifua. Aua le avea lu'itau e fa'avaivai ai lo tatou ola talitonu i le Atua. Ia avea ia lu'itau, e fai ma fa'amalosi i la tatou savaliga o lenei fo'i tausaga.

**Tatalo:** Iesu e, fesoasoani iā i matou i le tele o fa'aosoosoga ma fa'asino iā i matou le ala tonu e sa'ili atu ai lau Afio. **Amene!**

### **Aso Lua – Ianuari 13: "Vala'auina ma fa'aauauina" (Calling and continuing)**

#### **Tusi Faitau – Mataio 4: 12-25**

**Matua – ff. 18, 20:** "Ua savali ane Iesu e latalata ane i le vai o Kalilaia, ona silafia lea e ia o le uso e to'alua, o Simona ua igoa iā Peteru, ma Anetere'a lona uso, ua la lafo le upega i le vai, auā o tagata fai faiva i laua. Ona fetalai atu lea o ia iā te i laua, "Ina mulimuli mai ia iā te a'u, ou te faia oulua ma fai faiva i tagata." Ona la tu'ua loa lea o laua upega, a e mulimuli atu iā te ia."

O le avea o Simona ma Anetere'a lona uso ma faifaiva i tagata, o lo la'ua vala'auina lena mai le Atua. Ua tu'ua o la aiga ma o la matafaio masani o aso uma, a e ua mulimuli atu iā Iesu e fai ma ona so'o. O le Atua ua galue mai lona agaga i le tagata e talia le vala'au, e avea ma auuna e tautua le Atua ma lona finagalo e ala i lana Tala Lelei. O upu a le 'au matutua, e tu'u isi mea lelei mo isi mea lelei. Ua tele manuia o le Atua ua fa'asafua mai mo i tatou uma. Ua fa'apea fo'i lona vala'auina o i tatou uma, i so'o se galuega ua fa'aaogaina ai tatou. O le tu'alalao a le Tala Lelei, e taua le nofo sauni i taimi uma. O le upu moni, e taua galuega ua tatou galulue ai mo le tausaiaina o aiga, nu'u fa'apea lana Ekalesia. A e ina ne'i avea le saili'ina o le 'oa ma le tamaoiga, e fa'ataligatuli ai i le vala'auina a le Atua. Ia avea tatou ma faifaiva i tagata, ma fa'ailoa atu le Atua ma lana Tala Lelei.

**Tatalo:** Le Ali'i e, alofa ma fesoasoani mai i galuega ua matou galulue ai; ae maise o la matou auaunaga e tautua lau galuega i so'o se ala. **Amene!**

### **Aso Lulu – Ianuari 14: "Fa'a-amuia, masima ma le malamalama"**

#### **Tusi Faitau – Mataio 5: 1-16 (Beatitudes, salt and light)**

**Matua – ff. 13, 15a:** "O outou, o le masima o le lalolagi outou; a e afai e magalo le masima, pe se a se mea e fa'amāi a'i? O outou o le malamalama o le lalolagi outou. E lē mafai ona lilo le 'a'ai ua tu i luga o le mauga. Latou te lē tutuina fo'i le moli i le tu'u ai i lalo o le mea e fua a'i saito."

O le lauga a Iesu i luga o le mauga, o se aotelega o a'oa'oga a le Ali'i o Iesu i le amataga o lana galuega. Ua fa'aaogaina e Iesu se tasi o metotia fai lauga, o upu fa'a'amu'ia ina ia faigofie i tagata ona manatua. O le galuega a Iesu e le'i faigofie i le amataga, ona o tagata ma le lotu ua fa'amaua luga. O le masima, o se tasi lea o elemeni taua i le ola o le tagata. A o le saunoaga a Iesu, o le tagata o le masima lea o le lalolagi. Ua avea fo'i tatou ma malamalama, ia fa'asusulu atu lona matagofie i le lalolagi uma. O upu fa'a'amu'ia a Iesu, ua aumaia ai se fa'atonuga mo le soifua galue o so'o se Kerisiano. O le olaina o le finagalo o le Atua e lē faigofie. E fetaia'i pea ma faigata ma lu'itau o le ola auaua i le Atua. O le avea o tatou ma fa'atusa o le masima i le lalolagi, e mafai ai ona suia mea faigata i le faigofie. E i ai fo'i taimi ua pogisa ai le tagata ona o mea tutupu, a e ua avea i tatou ma malamalama ola o le Atua i le lalolagi. O lona lea finagalo na afio mai ai i le lalolagi, e fa'aola ma sa'ili le tagata ua leiloa.

**Tatalo:** Le Tamā alofa e, lavea'i mai lo matou ola mai faigata ma lu'itau e feagai pea ma i matou i lenei lalolagi. **Amene!**

### **Aso Tofi – Ianuari 15: “Tulaga” (Standards)**

#### **Tusi Faitau – Mataio 5: 17-26**

**Matua – f. 20:** *“Auā ou te fai atu iā te outou, a le sili la outou amiotonu i la le 'au tusiupu, a le 'au faresaio, e lē sao atu lava outou i le mālō o le lagi.”*

Ua tele nauā fa'aailoga ma tulaga ese'ese ua manuia ai o tatou olaga i nei aso. Peita'i o le taimi o Iesu, o ulua'i Tusi e 5 o le Feagaiga Tuai po o le (*torah*) o lo'o i ai tulafono a le Atua e fai ma ta'iala i le soifuaga o le tagata. O le afio mai o Iesu, e fa'alautele uiga moni o tulafono mo le tagata ia malamalama. Ua toe polili ai e Iesu le fa'atuatuga o le 'au Kerisiano, ia sili la latou amiotonu i le 'au tusiupu ma le 'au faresaio; e maua ai le mālō o i le lagi. E taulia tulaga ua ausia e le tagata, a e o le olaina o le finagalo o le Atua o lo tatou ala lea i lona mālō e fa'avavau. O le sini o na mea uma, ia maua luga i le tagata le alofa. O lona lea finagalo ma le uiga moni o tulafono a le Atua na tu'uina mai.

**Tatalo:** Ia e fa'atupuina pea le alofa i o matou lotu, e ta'imua ai mafutaga ese'ese ua matou faia. **Amene!**

### **Aso Faraile – Ianuari 16: “Fa'amaoni” (Integrity)**

#### **Tusi Faitau – Mataio 5: 27-37**

**Matua – f. 37:** *“A ia fa'apea la outou upu, loe, ioe; E leai, e leai; auā o le upu e sili i na upu, mai le leaga lava ia.”*

O nisi ia o upu a Iesu i luga o le mauga, na ia talatala ai le uiga o tulafono na tu'uina mai e le Atua. O le fa'amaoni, o se gaiogiga e tatau i so'o se tagata ona olaina. O galuega uma fo'i ua tatou fa'atino, ia atagia ai le fa'amaoni i lona fa'atinoga. O le fa'asoa manino a Iesu ma le autu o lenei aso, ia avea i tatou ma tagata e fa'amaoni i o tatou galuega fai. Ia faia mea uma ma le fa'autauta, o le lotu mamā ma ia mausalī le tatou mafutaga ma le Atua e ala i le fa'atuatua. O le upu moni, e tutupu pea matagi i liu o le va'a. Ua avea le tele o fa'afitauli i nisi o taimi, ma ala ua tau fa'avaivai ai lo tatou ola galulue. A o upu a Iesu, ia tumau pea lo tatou fa'amaoni e faia le finagalo o le Atua. O le Atua o lo tatou malu ia, mai le tele o puapuaga o le soifuaga nei.

**Tatalo:** Iesu e, fesoasoani mai ma fa'aailoa mai ou ala e matou te sa'ili atu ai lau afio, pe a o'o mai fa'aosoosoga o le olaga nei. **Amene!**

### **Aso Toona'i – Ianuari 17: “Alofa” (Love)**

#### **Tusi Faitau – Mataio 5: 38-48**

**Matua – f. 48:** *“O lenei, ia atoatoa ona lelei o la outou amio, e pei o lo outou Tamā o i le lagi e atoatoa ona lelei o ia.”*

O Iesu le Keriso, o ia le fa'ata'ita'iga sili o le alofa. O lona lava alofa na afio mai ai i le lalolagi, e mafuta ma le tagata agasala. O lona alofa tuituiloa i le tagata, ina ia maua le filemu ma le nonofo fealofani. Ua a'oa'o mai le Tala Lelei mo i tatou, ia atoatoa ona lelei o

la tatou amio. O le a lona uiga? O lou alofa i e o ita mai ma fai pea i tatou ma o latou fili, e le'o se mea e faigofie. A e tasi lea o vaivaiga o le ola e feagai pea ma le tagata. Ua faigata ona tatou tausia le filemu, pe a tutupu fa'afitauli i lo tatou ola. O lagona o le tauimasui ma le ita, ona o mea e tutupu i lo tatou vā feagai ma isi tagata. Ua avea ia vaivaiga o le ola, ua lē maua ai so tatou nonofo lelei. Peita'i, e le'o le finagalo lea o le Atua e pei na afio mai ai Iesu. O le afio mai o Iesu, o le ata manino o le alofa tunoa tele o le Atua mo le tagata. Ua finagalo fo'i le Atua, ia fa'apea ona tatou ola i lenei lalolagi. Ia maua le loto fa'amagalo i isi ua ita mai, ma ia avea i tatou ma leleiga i mafutaga ua fevaevae'i.

**Tatalo:** Iesu Keriso e lē na mua'i alofa mai, fesoasoani mai ina ia mafai ona matou fa'atupu le fealofani i le vā o tagata. **Amene!**

## O LE TALALELEI IA MATAIO

**Fa'atonuga ma fa'amautinoaga** (*Instructions and reassurance*)

**Aso Sā – Ianuari 18: “Fa'atonuga: foa'iina ma taliaina”**

**Tusi Faitau – Mataio 6: 1-8** (*Instructions: giving and receiving*)

**Matua – ff. 3, 4:** “*A ē avatu ni mea alofa, aua ne'i iloa e lou lima tauagavale le mea ua faia e lou lima taumatau; ina ia lilo au mea alofa; o lou Tamā fo'i, o lē silafia i le mea lilo, o ia lava na te avatu se tau'i iā te oe.*”

O le ola foa'i, o le gasologa masani o le ola o so'o se tagata soifua. E tele auala e atagia ai lo tatou ola foa'i. O le ola fetufaa'i i lou tuā'oi e ala i manuia o le Atua ua tatou maua, a e fa'apea fo'i le ofoina o tatou taimi e fesoasoani ai i nisi o lo'o mana'omia. O upu ua fai ma matua, ua fa'ailoa mai ai le foa'i e faia ma le lē iloa. O le saunoaga a Iesu i le faia o le foa'i i auala e lē iloa e tagata, a e o lo'o sisila fofoga o le Atua i mea ua tatou faia. O le ola foa'i ma le talia, o se tasi lea o gasologa masani o le soifuaga nei. E tele fo'i auala e mafai ona atagia ai lea fo'i fa'atinoga masani o aso uma. O a lava auala ua tatou faia ai le foa'i, ia manatua e lē lilo i le silafaga a le Atua. Na te tauia lo tatou ola foa'i atu i isi, ma e lē ta'ufa'atauva'aina e le Atua lo tatou ola taumafai mo mea lelei.

**Tatalo:** Le Atua e, o lau afio na e mua'i alofa mai i le tagata e ala iā Iesu Keriso; lea ua matou mautofiga ai lou mālō e fa'avavau. **Amene!**

**Aso Gafua – Ianuari 19: “Fa'atonuga: o le a le mea sili?”**

**Tusi Faitau – Mataio 6: 16-24** (*Instructions: what is important*)

**Matua – f. 16:** “*Pe a outou anapogi, aua ne'i outou mata fa'anoanoa pei o tagata fa'afiaamiotonu; auā ua latou fa'alaleaga o latou mata, ina ia iloa e tagata ua latou anapopogi. E moni, ou te fai atu iā te outou, ua maua e i latou lo latou tau'i.*”

O le anapogi, o se fa'amalositino fa'aleagaga mo so'o se tagata fa'atuatua. O lea fa'amoemoe lelei e fa'amalosia ai le 'au Kerisiano ma le mafutaga ma le Atua. Ua avea le anapogi ma fa'avae mautū i le ola fa'alagolago o le tagata i le Atua soifua. O lona uiga, e le'o se fa'atinoga e faia tau lava ina fa'ataunu'u. A e o se gaioga e faia ma le loto atoa ua tu'uina atu i le Atua, ina ia maua se tali o se fa'amoemoe o tapena. E pei ona mamamu mai i le matua o lenei aso, ia aua le anapogi ma le mata fa'anoanoa pei o tagata fa'afiaamiotonu. O le Atua e silafia mea uma i le loto o le tagata, ma so'o se mana'oga ua ole atu ai. Ua tatou i ai i le vaitau lē faigofie o le soifuaga. I le tele ai o lu'itau e fetaia'i pea ma le tagata i lenei lalolagi. Ua fa'amanatu mai le Tala Lelei, e taua le faia o le anapogi ma le loto ua tu'uina atu i le Atua. O i'ina, e mausalī ai le mafutaga a le tagata ma le Atua i aso uma. Ia tatou manatua i le anapogi nisi o fa'afitauli, ua a'afia ai le lalolagi. Tatou nōnō manū i le Atua, mo se manuia o le lalolagi.

**Tatalo:** Le Atua alofa e, ia e fa'atauasoina o matou mata mai tu'inanauga o le lalolagi; a e taula'i pea i lau afio le matai o le galuega. **Amene!**

**Aso Lua – Ianuari 20: “Fa'amautinoaga: 'aua le popole”**

**Tusi Faitau – Mataio 6: 25-34** (*Reassurance: do not worry*)

**Matua – f. 34:** *“O lenei, aua tou te popole i le aso a taeao; auā e popole le aso a taeao i ana lava mea. E tataui i le aso lona lava leaga.”*

A lutia le olaga nei i faigata, ona tupu lea o lagona popole ma lē mautonu. O upu o le saunoaga a Iesu, o se fa’amalosi ‘au i taimi faigata o le ola. O le upu moni, e fesouaina pea la tatou savaliga i fa’afitauli ese’ese o le ola. Ua avea fo’i ia fa’afitauli, e tau fa’avaivai ai lo tatou ola talitonu i nisi o taimi. Ua mua ona tatou popole i mea o le lumana’i, a ua fai ma ala e a’afia ai gasologa o mea o le taimi nei. A o le tu’ualalo fo’i lea a le Tala Lelei, ‘aua le popole.’ E lē faigofie nei aso ua tatou i ai ma ona suiga. O fa’afitauli ese’ese i totonu o aiga, nu’u ma le Ekalesia. Ua avea ma afuaga e tupu ai lagona popole; ma ua lē mautonu ai fo’i manatu. O le fetalaiga a Iesu, ia ‘aua le popole.’ O a lava faigata o lo o feagai ma le tagata lava ia, ia taula’i pea i le Atua le ola talitonu. Aua fo’i le popole i mea o le lumana’i, ina ne’i a’afia fa’atinoga o le taimi nei.

**Tatalo:** A’oa’o mai ua afioga ma ia o matou iloa, le taua ma le aoga o lona feso’ota’i mai i lo matou ola. **Amene!**

**Aso Lulu – Ianuari 21: “O isi Fa’atonuga: o le ala o le Atua ma le ola”**

**Tusi Faitau – Mataio 7: 1-14** *(More instructions: the way of God and life)*

**Matua – ff. 13, 14:** *“Ia outou ulu atu i le faitoto’a vā apiapi; auā e vā tele le faitoto’a, e lautele fo’i le ala e tau atu i le malaia, e to’atele fo’i i latou o e ui atu ai. Auā e vā apiapi le faitoto’a, e lauitiiti fo’i le ala e tau atu i le ola, e to’aitiiti fo’i i latou o e maua.”*

O le ola e fa’avavau, o le tausiniga o aso uma i le tagata soifua. Ua uma ona fa’ataoto e le Atua le alafua mo le tagata, ina ia maua ai le ola e fa’avavau. O le faitoto’a ua tatala mo le lalolagi uma, pe a fulitua i le agasala a e talia le Atua ma lana fa’aolataga. O isi ia o upu a Iesu i le mauga, na ia faia ai le ata fa’atusa o le mālō o le Atua i le faitoto’a lauitiiti ma le lautele. Ua fa’amanino e Iesu le so’otaga o le ola i le lalolagi; ma le ola i le mālō o le Atua. O se ta’iala ua manino ma faigofie ona malamalama, ina mafai e tagata uma ona olaina. O le fa’amoemoe lea o le Atua mo i tatou, a o tatou i ai i lenei lalolagi. Ua avea le lalolagi ma le soifuaga nei, o le nofoaga e tapena ai lo tatou lumana’i. *“Auā ua fa’apea lava ona alofa mai le Atua i le lalolagi, na ia aumaia lona atali’i pele e to’atasi, ina ia lē fano se tasi e fa’atuatua iā te ia, a ia maua le ola e fa’avavau.”*

**Tatalo:** O lau afio na mua’i alofa mai i le lalolagi e ala iā Iesu Keriso, ia fa’apea fo’i ona atagia lou finagalo alofa i lo matou ola. **Amene!**

**Aso Tofi – Ianuari 22: “Ata fa’atusa i la’au ma tagata fau fale”**

**Tusi Faitau – Mataio 7: 15-29** *(Illustrations with trees and builders)*

**Matua – ff. 24, 25:** *“O lenei, ai se fa’alogo i a’u upu nei, ma faia e ia, ou te fa’atusaina o ia i le tagata poto, ua na faia lona fale i luga o le papa; ona tō mai lea o uaga, ua o’o mai fo’i tafega, ua agi mai fo’i o matagi, ua pesi mai i lea fale, a e le’i pa’ū lava ia; auā ua fa’avaeina i luga o le papa.”*

A malosi le fa’avae o se fale, ona maua lea o le malosi’aga o le fale atoa. O a’oa’oga a Iesu, ua ia fa’aaogaina ai le foafoaga e fa’amatala ai uiga o a’oa’oga uma. O le tagata ua fa’alogo i ana upu ma faia, ua pei o le tagata poto ua fau lona fale i luga o le papa. O a fo’i matagi ma afā, e tumau pea e lē fa’aleagaina. Ua avea lea a’oa’oga a Iesu, e fai ma faleaoga atamai i le tagata fa’atuatua. O le Atua o lo tatou maluāpapa i aso uma. E i ai taimi ua fa’alagolago ai le tagata i lona malosi, a e fa’atuana’i le Atua o lē ona le malosi uma lava. O le fetalaiga a Iesu, ia fa’alogo ma fa’atino le finagalo o lona Tamā. A tatou ola ma faia lona finagalo, ona fa’atupu-teleina lea o lo tatou fa’atuatua. O le upu moni, e lē sa’o ma atoatoa pea le tagata i taimi uma. E i ai fo’i taimi e lagona ai le fa’avaivai, i le fa’atinoga o tiute ua tatou galulue ai. A o le fe’au taulogologo a le Tala Lelei o le Atua, o le fa’avae lea o le ola fa’atuatua o so’o se Kerisiano, ua mautinoa lona malosiaga, ma maua ai lo tatou saogalemu pe a afātia la tatou faigamalaga i lenei lalolagi. Ia lafo i le Atua lo tatou ola mautinoa, ona lē fesiligia lea o manuia o le lumana’i.

**Tatalo:** Le Ali’i e, ia matou maua le loto maulalo e talia ai lou finagalo. **Amene!**

## **Aso Faraile – Ianuari 23: “Fa’amālōlōga” (Healing)**

### **Tusi Faitau – Mataio 8: 1-17**

**Matua – ff. 5, 7:** “*Ua o’o atu Iesu i Kapanaumi, ona sau ai lea o ia iā te ia o le ta’ita’i o le to’aselau, ua ‘ai’oi mai iā te ia, ua fa’apea mai, “Le Ali’i e, ua ta’oto la’u auauna i le fale e ma’i i le supa, ua matua tiga lava.” Ona fetalai atu lea o Iesu iā te ia, “O le a’u alu atu e fa’amālōlō iā te ia.”*

O le tasi nei o vaega taua i le galuega a Iesu Keriso e ala i le fa’amālōlōga. Ua lē na’o le tala’iina o le finagalo o lona Tamā, a e ua fa’apea fo’i ona tu’uina mai le fesoasoani tatau mo le tagata mafatia. O le fa’asoa a le Mataio e pei ona i ai le matua, o le tagata ma’i supa ua fa’atuatua iā Iesu e maua ai le mapusaga. Ua silafia e Iesu mafatiaga o lea auauna mafine, na ia tali manino ai i le ta’ita’i o le to’aselau o le a ia faia. O le fa’amālōlōga mo le tino o le tagata ma’i supa, ua naunau ia maua se filemu mo ona mafatiaga. Ua tatou fa’atuatua pea i le Atua; ma lona mana e maua ai lo tatou mapusaga i ma’i o le tino. Ua tele nauā fa’ama’i ese’ese ua a’afia le lalolagi ma ona tagata. E lē gata i fa’ama’i pepesi, a e fa’apea fo’i fa’ama’i o le agaga. E taua lo tatou sa’ili i le Atua ma le loto ua fa’atuatua, e maua ai le mautinoa ma le filemu i so’o se mafatiaga. O a lava ni ma’i ua a’afia ai lo tatou ola i lenei vaitau, ia lē mapu le sa’ili pea i le Atua mo se tali. Auā o ia o le foma’i sili i o tatou tino, ma le mālōlōga i o tatou agaga.

**Tatalo:** Sisila alofa maia i so’o se mafatiaga o lau fanau, ma ia e foa’i mai le mālōlōga sili mo so matou mapusaga filemu. **Amene!**

## **Aso Toona’i – Ianuari 24: “O ai lenei tagata o Iesu?” (Who is this man Jesus?)**

### **Tusi Faitau – Mataio 8: 18-27**

**Matua – ff. 24, 26a:** “*Fa’auta fo’i, ua tō mai le afā tele i le vai, ona osofia mai ai lea o le va’a e peau; a ua tōfā o ia. Ona o mai ai lea o ona so’o, ua fafagu iā te ia, ua fa’apea mai, “Ali’i e, fa’aoa mai, a matou fano.” Ona fetalai atu ai lea o ia iā te i latou, “Se a le mea ua outou matata’u ai, outou e fa’atuatua itiiti?”*

Ua vavao e Iesu le matagi tele, a o sopoa ai e i latou ma ona so’o le isi itu vai. O le fesili ua fai ma autu, ua fa’amatala ai lagona popole o le au so’o ma le fa’atuatua ua vaivai. O lo’o tōfā le Ali’i i le va’a, ona afatia ai lea o le malaga i le matagi tele ma ua tau au ai ina goto le va’a. O lagona o le tagata ua popole vale ma ua lē mautonu, ina ua o’o mai fa’afitauli i luga o le vasa. Silafia e Iesu le fa’atuatua itiiti o ona so’o, e ui ina latou malaga fa’atasi ma ia. A e fa’apea fo’i mea o lo’o tutupu, i lenei vaitau o le soifuaga ua tatou i ai. E i ai taimi o le ola e fa’afuase’i ai ona fa’afitauli, ona lē maua ai lea o se to’afilemu iā i tatou. Ua mua ona tatou popole i fa’afitauli ma mea e tutupu, a e galo ai iā i tatou o lo’o i ai le Atua i mea uma tatou te faia. O le fa’amanatu a le Tala Lelei, o a lava fa’afitauli o le ola e fetaia’i ma i tatou i le ala, ia manatua o lo’o i ai le Atua ma i tatou. Ua aveva lava Iesu Keriso ma tautai, e fa’atonu folau lo tatou sā i lenei lalolagi lē tumau.

**Tatalo:** Le Atua e, ia matou maua pea le lototelele ua i lau afio lo matou ola; ma aveva pea oe ma tautai sili i la matou faigamalaga. **Amene!**

## **O IGOA: O TAGATA MA NOFOAGA (Names: people and places)**

## **Aso Sā – Ianuari 25: “I le amataga: fa’aigoaina o mea ola”**

### **Tusi Faitau – Kenese 2: 19-25 (In the beginning: naming the creatures)**

**Matua – f. 19:** “*Na faia e le Ali’i le Atua i le ‘ele’ele o manu vaefā uma lava, ma manu felelei uma lava; na ia aumaia iā Atamu ia iloa pe ni a ni igoa na te fa’aigoa ai; o le igoa ua fa’aigoaina ai e Atamu i mea ola uma o lona igoa lea.”*

O le Atua o le matuaofaiva o le fa’atufugaga o le foafoaga atoa. O mea uma ua ia faia, ma le tagata o le paleali’i o ana galuega uma. Ina ia tu’uina le tagata i le fa’ato’aga, e tausia lelei ma ola fiafia ai. Ua aumaia i le matua o lenei aso, le feso’ota’iga o vaega uma o le foafoaga a le Atua. Ua tu’uina fo’i le pule i le ulua’i tagata o Atamu lea, na te fa’aigoa ai manu vaefā ma manu felelei. O igoa uma ua igoa ai, o le igoa lava lea o Atamu. O le foafoaga

a le Atua, o le fa'aailoga o le ola fetausia'i o mea uma ua ia faia. O lona uiga, ia fa'apea fo'i ona tatou ola i le lalolagi ma mea uma o lana foafoaga. Ia tagatia pea le feso'ota'iga i le vā o tagata ma mea uma o lana foafoaga.

**Tatalo:** Ia e foa'i mai le ola fa'asoa, ina ia mafai ona fa'atumauiina le ola fetau-sia'i ma mea uma o lau foafoaga. **Amene!**

**Aso Gafua – Ianuari 26: “Filifili ia manatua”** (*Choosing to remember*)

**Tusi Faitau – Kenese 28: 10-22**

**Matua – ff. 17e, 19:** *“E le se mea ese lenei, na o le fale lava o le Atua. Ua tula'i Iakopo i le taeao lava, ua tago i le ma'a na ia aluga ai, ua fa'atūina ai ma fa'aailoga, ua liligi ifo i ona luga le suā'u. Ua ia fa'aigoa lea mea o Peteli, sa mua'i fa'aigoaina lea 'a'ai o Lusa.”*

O a ni mea ua tatou faia e fa'amanatu ai le alofa o le Atua? Ua faia e Iakopo le ma'a, e fai ma fa'aailoga o le Atua e lē tu'ulafoa'iina le tagata. Ua iloa e Iakopo o lo'o i ai le Atua ma ia, ona ia lagona ai lea o lona fefe. O le finagalo o le Atua na iloa e Iakopo i le miti, e tausi o ia e le Atua ma e manuia fo'i nu'u uma iā te ia. O le ma'a ua ia fa'atuina ma fa'aailoga, e fai lea ma fale o le Atua. E tele mea ua faia e le Atua i lo tatou ola, ua tatou sa'a ai ma'a o mālīe i le soifuaga nei. O lo tatou ola ofoina e auuuna lona finagalo e ala i lana Tala Lelei, ia fai lena ma fa'aailoga o lo tatou tali atu i lona agalelei ua tele. E ui i le vaivai ma fa'atauva'a le tagata, ua amana'aina pea i tatou e le Atua e faia lana galuega. O lona lea finagalo ina ia aogā o tatou ola, e auuuna ai i lana Tala Lelei.

**Tatalo:** Lo matou Tamā e o i le lagi, ia avea i matou ma au meafaigaluega e faia lou finagalo i so'o se ala. **Amene!**

**Aso Lua – Ianuari 27: “O Igoa fou mo tagata tuai”** [*New names for old (people)*]

**Tusi Faitau – Kenese 17: 1-27**

**Matua – ff. 3, 5:** *“Ona fa'apa'ū faō ai lea o Aperamo; ona fetalai mai lea o le Atua iā te ia, ua fa'apea mai, O a'u nei, ou te fai atu, fa'auta, o iā te i ta'ua le feagaiga, e fai fo'i oe ma tupu'aga o nu'u e tele. E le toe vala'auina lou igoa o Aperamo, a o le a igoa oe o Apera'amo, auā ua ou faia oe ma tupu'aga o nu'u.”*

Ua iloga lea auuuna a le Atua ma ona tala i le Tusi Paia. O le tamā ia o le 'au fa'atuatua, ma lē na osi feagaiga ma le Atua. O le auuuna sa tautua ma faia le finagalo o le Atua, lea ua fa'amanuia i ai le Atua ma suia ai lona igoa. O faiga ia a le Atua e lē iloa e le tagata, auā e ese'ese auala o ana fa'amanuiaga i le ola o lē faia lona finagalo. O manuia o le Atua ua tu'uina iā Apera'amo, lea fo'i ua manuia ai nu'u uma o le lalolagi e pei na fetalai ai iā Apera'amo. E i ai taimi o le ola e o'o mai ai suiga, ona tu'u fesili lea i o tatou manatu pe mai fea. O lea ua toe fa'amanatu mai le tala iā Apera'amo, ia tatala la tatou va'ai i suiga o lo tatou ola ua faia e le Atua. Ia maua fo'i le loto maualalo, tatou te talia ai lona vala'auina o i tatou i so'o se ala. Fai fo'i lea ma fa'amanatu i tupulaga fou i lo tatou fo'i vaitau, ia latou tau'ave pea manuia o le Atua ua tatou maua.

**Tatalo:** Le Atua o feagaiga, ia tatala pea la matou fa'alogi ina ia manino lou fetalai mai e ala i lou finagalo mo so matou manuia i le lumana'i. **Amene!**

**Aso Lulu – Ianuari 28: “O se mea maualuga ma se lapata'iga!”**

**Tusi Faitau – 2 Nofoaiga Tupu 7: 1-16** (*A high point and a warning!*)

**Matua – ff. 14, 16a:** *“Afa'i e fa'amaulalo lo'u nu'u ē ua ta'ua i lo'u igoa, ma latou tatalo, ma sailiili iā te a'u, ma liliu 'ese i o latou ala leaga, ona ou fa'alogi ai lea mai le lagi, ma fa'amagalo i a latou agasala, ma fa'aolaina lo latou nu'u. O lenei, e va'ava'ai o'u mata, ma liliu o'u taliga i le tatalo e faia i lenei mea. Auā ua ou filifilia ma fa'apa'aina lenei fale, ina ia i ai lo'u igoa e fa'avavau.”*

O le fausiaina o le malumalu o le Atua, o se fa'amoemoe sili ona taua. Ua o'o i le taimi o Solomona, e tau'ave ma ia fa'aaau ai tiute o lona tamā o le fai ma ta'ita'i o le nu'u. O se molimau e ma'eu lona tula'i mai i lona fo'i vaitau, na ia faia fa'auma ai galuega o le malumalu. O le fa'amoemoe maualuga, o le faia o le fale e afio ai le Ali'i ma ia fa'atumauiina

lona mamalu mo ona tagata. Peita'i e ui i lea galuega lelei ua faia, a e ua agasala pea le nu'u o le Atua. Ua silafia e le Atua vaivaiga o tagata o lona nu'u, e ui ina ua latou faia pea galuega lelei mo le Atua. A e ua toe fa'amanatu e le Ali'i i lona nu'u i taimi ua latou maua ai manuia e tele, le mea e fai pe a o latou to'ilalo. Le Ekalesia e, o a mai lou soifua tautua i le Atua? O le upu moni, e lē atoatoa pea se tatou auunaga i aso uma. O nisi o taimi, ua tatou manatu o sa'o mea tatou te faia; a e ua avea ia mea ma a'afiaga o nisi tagata. O a galuega lelei ua tatou faia e atia'e ai le galuega a le Atua, ia faia mo se vi'iga o le Atua a e tumau pea lo tatou fa'atauva'a. O le Atua e tau mai lo tatou ola galuelue mo lana galuega i so'o se ala. O i tatou ua na'o ni meafaigaluega, e vae ma lima i ai le galuega a le Atua.

**Tatalo:** Le Atua agalelei e, o a galuega ua matou faia mo atina'eina o lau Tala Lelei; ia fai ma vi'iga o lau afio a e lē o i matou. **Amene!**

**Aso Tofi – Ianuari 29: “O se suafa e mamalu”** *(A sacred name)*

**Tusi Faitau – Esoto 20: 1-7**

**Matua – f. 7:** *“Aua e te ta'u atu fua le suafa o le Ali'i lou Atua; auā e lē fa'asaoina e le Ali'i o lē ta'u fua i lona suafa.”*

O se tasi ia o tulafono a le Atua, na tu'uina iā Mose mo le nu'u Isaraelu. O tulafono e fai ma ta'iala i le nu'u o le Atua, ina ia atagia ai le feagaiga na latou osia i le amataga. O le Atua e mamalu ia ma e pule aoao i mea uma na ia faia. O lona suafa e le'o se mea e ulagia, auā e mamalu ma Paia o ia. E pei ona aumai i le tatou matua, e lē fa'asaoina se tasi pe a ta'u fu ale suafa o le Atua. A e mafai ona fa'a-saoina i tatou, pe a tatou ole atu e ala i talosaga. O le mamalu lena o le suafa o le Atua, tatou te lagonaina i a tatou tatalo. O a lava faigata o feagai ma i tatou i lenei fo'i vaitau o le soifuaga, tatalo i le Atua ma fa'atoga i lona suafa Paia. E fa'afogaina fo'i e le Atua, tatou tatalo mai le loto salamō.

**Tatalo:** Lo matou Tamā fa'avavau e, ia e alofa mai i mana'oga ese'ese o lau fanau ma ia faia lou finagalo a e le'o matou loto. **Amene!**

**Aso Faraile – Ianuari 30: “O Igoa o le fa'amoemoe ma le folafolaga”**

**Tusi Faitau – Isaia 62: 1-5** *(Names of hope and promise)*

**Matua – ff. 2e, 3:** *“E igoa fo'i oe i le igoa fou, e ta'ua mai e le fofoga o le Ali'i. E fai oe ma pale matagofie i le 'a'ao o le Ali'i, ma pulou o le tupu i le alofilima o lou Atua.”*

O a ni folafolaga o lo o e fa'amoemoe i ai mo le lumana'i? E tofu lagona uma tagata ma fa'amoemoga ese'ese ua fuafua i ai mo le lumana'i. Peita'i ua mamanu mai i upu o le matua, manuia o le ola fa'alagolago i le Atua. E ui i le tele o fa'afitauli ese'ese e feagai pea ma i tatou, a e lē mafai ona tu'ulafoa'iina e le Atua i tatou. Ua malu lo tatou ola i ona a'ao agalelei ma lana tausiga o aso uma. O le fa'amanatu a le Tala Lelei, ia nofo sauni i aso uma. O a fo'i fuafuaga ua fa'ata'oto mo le lumana'i, o lo'o sisila le Atua i o tatou mana'oga. Ua iā te ia le taimi tatau e fa'atatanu'u ai tapenaga uma. O a fo'i fa'afatiatama'i o le ola e fesouaina ai la tatou savaliga, ia manatua o lo'o i ai le Atua ma i tatou.

**Tatalo:** Foa'i mai le loto tele ina ia mafai ona matou tali i atu i faigata o le ola pe a o'o mai. **Amene!**

**Aso Toona'i – Ianuari 31: “O Igoa o tīgā ma le loto nutimomoia”**

**Tusi Faitau – Hosea 1: 1-11** *(Names of pain and heartbreak)*

**Matua – ff. 8, 9:** *“Ua ia fa'ate'a Loruama ma le susu; ona tō ai lea o ia, ua fanau mai ai le tama tane. Ona fa'apea mai ai lea o le Atua, Ia e fa'aigoa iā te ia, o Loama; auā e le so'u nu'u outou, e le so outou Atua fo'i a'u.”*

O upu o le fa'atonuga a le Atua na auala mai i le Perofeta o Hosea, ina ia fa'a-igoa lona atali'i iā Loruama. O le ata fa'atusa o le pule faito'atasi a le Atua i le mea ua ia finagalo ai mo Isaraelu. E le'i faigofie le mafutaga a le Atua ma lona nu'u. O le Atua tausi feagaiga lelei peita'i, na faigofie ona fultitua le nu'u mai le Atua. Ua latou ifo i tupua, ua fa'asauā i e matitiva ma a'afia ai i ituaiga amioleaga uma. Ua tele tausaga o faia pea e Isaraelu le agasala, a o le Atua e telegese lona to'sā a e tele pea lona alofa mutimutivale. Ua manino

le finagalo o le Atua mo Isaraelu e ala mai iā Hosea. Ua o'o i le taimi o le Atua e taofia ai le faia e Isaraelu o le agasala. O upu ua masani ai le fa'alogo, e lelei le alu 'ese o le tagata ma le Atua; a e leaga pe a alu 'ese le Atua ma le tagata. E lē lagi lelei pea aso uma ma mea e tutupu i lo latou ola. E lē atoatoa fo'i le tagata ma lana auauanga i le galuega a le Atua. O a lava faigata o le ola e tutupu mai, ia mau pea le to'ovae o fa'atuatua i le Atua. Ua i le Atua lona lava taimi tataua, e tali ai i fa'afitauli o feagai ma le tagata.

**Tatalo:** Le Atua e, e ui i lo matou ō ese mai lau afio; a e o lo o e amana'iaina pea so matou fa'atauva'a. **Amene!**

## O IGOA: O TAGATA MA NOFOAGA (2)

**Aso Sā – Fepuari 1: “Vala’auina o igoa”** (*Name-calling*)

**Tusi Faitau – Isaia 43: 1-7**

**Matua – f. 7:** *“O i latou uma ua igoa i lo'u igoa, na ou faia ia vi'ia ai a'u; na a'u gaosia ma ou faia lava i latou.”*

E tofu tagata uma ma igoa ese'ese ua vala'auina ai. O le igoa, e taua tele i so'o se tagata soifua. Ua fai ma fa'aailoga e iloa ai tagata ma o latou tupu'aga. O upu fa'amafanafana a le Atua i lona nu'u, o se fa'amanatu ina ia manatua le Atua ma lona alofa tunoa iā i latou. A o le fa'amoemoe o le Atua mo le tagata, e pei ona i ai upu o le tatou matua. *“O i latou uma ua igoa i lo'u igoa, na ou faia ia vi'ia ai a'u...”* Ua manino mai i le tatou matua, o le Atua e pule aoao i le Fofoaga atoa. O lona uiga, o mea uma na ia faia e tatau ona vi'ia le Suafa o le Atua i aso uma. O le tagata o le paleali'i o ana galuega mamana, ua ia fa'aigoa fo'i i tatou i lona suafa. E tatau ai i le tagata o lē ua igoa i le Suafa o le Atua, le vi'iga ma le fa'ane'etaga i le Atua Silisili'ese. Ia vi'ia le Atua ona o lona alofa ma lona agalelei, ua tatou maua ai le sa'o-lotoga mai puapuaga o le ola.

**Tatalo:** Ia avea i matou ma au meafaigaluega, e tala'i lou finagalo i so'o se ala ua vala'auina ai lau fanau. **Amene!**

**Aso Gafua – Fepuari 2: “Faatuatuaina isi”** (*Trust others*)

**Tusi Faitau – Ioane 1: 43-50**

**Matua – f. 47:** *“Ua silafia e Iesu o Natanielu o lo'o sau iā te ia, ona fetalai ane lea iā te ia, “Fa'auta, o Isaraelu moni, e leai sona pepelo.”*

O le ola talitonu o le tagata ua fa'atuatua i le Atua, ua atagia ai le olaina o a'oa'oga a Iesu Keriso na afio mai ai i le lalolagi. Ua silafia e Iesu Natanielu ma lona iloa o Iesu o le alo o le Atua. Ua aumai ai fo'i se fa'amalosi mo i tatou i lenei fo'i vaitau o le soifuaga ua tatou ola ai. E tutupu pea matagi i liu o le va'a, ma fesouaina ai lo tatou ola fa'atuatua i le Atua. O a lava lu'itau o le ola e feagai ma i tatou, ia manatua o lo'o soifua le Atua e fa'avavau. E fai pea ma o tatou puni matagi ma tū pea i matagi 'olo e fa'atonufofou i la tatou savaliga. 'Aua le avea le tele o fa'afitauli e fai ma ala e fa'avai ai lo tatou ola fa'atuatua. Ia tatou talitonu ma fa'atuatua pea i le Atua, e faia mea sili mo le tagata. O le Atua e silafia mea uma i o tatou loto, ma o tatou tagata atoa. Ia lafo iā te ia lo tatou ola mautinoa, ona maua lea o fa'alumaga lelei e avagalimaa'i lo tatou ola galulue i le Tala Lelei. Ia lafo i le Atua lo tatou ola mautinoa, ona manuia lea o lo tatou lumana'i.

**Tatalo:** Iesu e, ia fai oe ma o matou lafitaga i taimi o puapuaga. **Amene!**

**Aso Lua – Fepuari 3: “Fa'aigoaina o le fale”** (*Naming the house*)

**Tusi Faitau – Mareko 11: 12-19**

**Matua – f. 17:** *“Ua a'oa'o atu fo'i o ia iā te i latou, ua fa'apea atu, “E lē ua tusia ea, E ta'u lo'u fale o le fale tatalo mo nu'u uma? A ua faia e outou ma ana o e fao mea.”*

E ui i le alofa o le Atua ua tele mo le lalolagi, a e ua lē tusa ma le tatou tali atu. O le loto mafatia o Iesu ina ua ia molimauina, ua avea le fale tatalo o lona Tamā ma ana o e faomea. Ua avea ma fale o fefa'ataua'iga o oloa, ma sa'ili ai le tamāoiga o le tagata. O se gaioiga ua iloa ai le vaivai tele o le tagata ma ona manatu. Ua leai se tōfā mamao o le fale

tatalo o le Atua, a ua naunau ina ia maua le tamāoaiga ma ua sesē ai ma le fa'amamua. O le toe fa'amanatu a Iesu, ia manatua le taua o fale ua fai ma fale tatalo mo lona Tamā. Le Ekalesia e, ua tupu ma ola le galuega a le Atua. Ua tele fo'i fausaga ese'ese ua fausia ai malumalu ta'itasi i nei aso. A e le'o le manaia o le malumalu le fa'amamafa, a e ia fai lea ma taulaga e vi'ia ai le Atua i mea ua tatou faia. Ia tautuana le taua o falesa na o tatou fausiaina, o le fale tapua'i mo so'o se Kerisiano. O le fale e afio ai le Atua, ia fai ma fale e to'omaga ai le tagata mai so'o se mafatiaga o le olaga nei.

**Tatalo:** Le Atua e, o mea uma ua matou faia ia fai ma matou taulaga mo sou lava vi'iga e fa'avavau. **Amene!**

#### **Aso Lulu – Fepuari 4: “O le a le tāua o le igoa?”** (*What's in a name?*)

##### **Tusi Faitau – Galuega 11: 19-26**

**Matua – f. 26:** *“Ua na maua o ia, ona aumaia lea o ia i Anetioka. Ua la fa'atasi ma le ekalesia ua atoa le tausaga, ma a'oa'o atu i tagata e to'atele lava; na ulua'i igoa fo'i le 'au so'o o Kerisiano i Anetioka.”*

E tau ale igoa i le tagata, auā ua fai ma fa'ailoga e iloa ai tagata ta'itasi. E ese'ese uma fo'i mafua'aga ma uiga o tatou igoa. O le matua o lenei aso, ua fa'ailoa mai ai le ulua'i igoa o le 'au so'o. O le igoa Kerisiano, o le fa'ailoga lea o tagata ua tasi iā Keriso. O tagata o lanu, aganu'u ma gagana ese'ese, ua omai fa'atasi e tautua le galuega a le Atua. Ua fa'apea fo'i lenei vaitau o le soifuaga ua tatou i ai. Ua avea i tatou ma Kerisiano e auaina i le Atua i so'o se ala ua ia vala'auina ai tatou. A o le fesili, e fa'apefa ona iloa o i tatou o Kerisiano? Ia tatou folafola atu lana Tala Lelai e ala iā Iesu Keriso, atoa ai ma galuega e tatau ona fa'atino ina ia atagia ai lona finagalo. E lē na'o upu e iloa ai o i tatou ua avea ma Kerisiano, a e ia faia galuega ma olaina lona finagalo. Ia avea i tatou ma Kerisiano, fa'atupu leleiga i nofoaga ua leai se filemu. O faiga na fa'a le Atua e pei ona ia finagalo ai, a e le'o le fa'atupu o maseiga i vā ma tagata. O lona alofa tunoa, ua avea ai tatou ma suli i le li'o o le aiga o le Atua pe a tatou fa'atuatua ma salamō. Ia atagia le uiga o le avea o i tatou ma Kerisiano, i mea ua tatou faia. O Iesu lava ia o lē na afio mai, na ia momoli mai le fa'aolataga mo le lalolagi uma ina ia togiola le tagata agasala. Ua avea lana fa'aolataga, ma totonugalemu o le fa'atuatua o so'o se Kerisiano.

**Tatalo:** A'oa'o mai lou Agaga le Atua, ina ia matou iloa manino lou finagalo. **Amene!**

#### **Aso Tofi – Fepuari 5: “O a'u nei”** (*I am*)

##### **Tusi Faitau – Ioane 6: 25-35**

**f. 35:** *“Ua fetalai atu Iesu iā te i latou, “O a'u nei le areto o le ola; o lē sau iā te a'u, e lē fia 'ai lava ia; o lē fa'atuatua fo'i iā te a'u, e lē toe fia inu lava ia.”*

O Iesu Keriso o lē na afio mai, na saunia le fa'aolataga mo le lalolagi uma ina ia maua le ola fa'avavau. O lona soifua Paia na ofoina atoatoa mai, ina ia fa'asaoina le tagata mai le faigata o le agasala. O ia o le areto o le ola, o ai lava fo'i e alu atu iā te ia e lē toa fia 'ai ai lava. O lona toto fo'i ua fa'amaligi'ina, o le ipu o le Feagaiga Fou i lona toto i le so'otaga ma le tagata. Ua vala'auina i tatou uma e avea ma tagata i le aiga o le Atua, ona ua tatou talia le fa'aolataga e ala iā Iesu Keriso. O lea vala'au alofa ua so'otulutululu ai le lalolagi uma, e ala i lona alofa tunoa. Ia avea le fa'aolataga a Iesu Keriso, e fai ma mitamitaga i lo tatou ola fa'atuatua ma talitonu iā te ia e fa'avavau.

**Tatalo:** Fa'afetai le Atua ona o lau fa'aolataga, na ofoina atoa ai le soifua Paia o Iesu Keriso lea ua matou maua ai le ola e fa'avavau. **Amene!**

#### **Aso Faraile – Fepuari 6: “O le igoa silisili ona maualuga”** (*The highest name*)

##### **Tusi Faitau – Filipi 2: 1-11**

**Matua – f. 9:** *“O le mea lava lea ua matuā fa'aeaina ai o ia e le Atua, ma foa'iina atu ai iā te ia o le suafa e silisili i suafa uma lava.”*

Ua fa'aeaina fa'atasi i tatou e le Atua e ala iā Iesu Keriso, ma le fa'aolataga na ia saunia i lona maliu ma lona toe soifua manumālō. O lana galuega ua i'u i le satauro matagā, ma

na ia foa'iina ai le suafa e sili ona maua. O le toe fa'amanatu a Paulo i le Ekalesia i Filipi, ia manatua le Atua o lē na fa'aeaina i latou mai le agasala. O Iesu Keriso, e tatau ona vi'ia o ia e tagata ua fa'atuatua iā te ia ma lana fa'aolataga. Ua tatou maua le sa'olotoga i lenei soifuaga, ona ua sa'ili mai e le Atua le tagata agasala e ala iā Iesu Keriso. O lona alofa tunoa, ua avea ai Iesu e sui tulaga i le tagata e fai ma togiola. Ua tatou 'ae'ae lea manu ua ulu, i le alofa ma le agalelei tele o le Atua i lo tatou ola. Ia fai le fa'aolataga e ala iā Iesu Keriso, tatou te mitamita ma fa'a'iloa i le lalolagi lona matagofie.

**Tatalo:** Le Atua alofa tunoa e, ia avea le fa'aolataga ma mitamitaga i loto o lau fanau ua fa'atuatua iā te oe. **Amene!**

### **Aso Toona'i – Fepuari 7: “Fa'amaufa'ailogaina i igoa”**

#### **Tusi Faitau – Fa'aaliga 3: 7-13** (*Sealed with names*)

**Matua – f. 12:** *“O lē manumālō, ou te faia lea ma poutū i le malumalu o lo'u Atua, e lē toe ulufafō lava ia, ou te tusi fo'i i ai le suafa o lo'u Atua, o Ieruselema fou lea e alu ifo nai le lagi mai lo'u Atua, atoa fo'i ma lo'u igoa fou.”*

O le mālō fa'avavau ua agava'a ai tagata uma o le lalolagi, auā o le Atua ua ia fa'amaufa'ailogaina i tatou uma i lona suafa. O le Atua manumālō e faia ma putū i le fa'atuatua o le 'au Kerisiano. Ua fai o ia ma igoa fou i le soifuaga tuai o le tagata, a o i ai i lenei lalolagi. Ua mavae le ola tuai, a e ua fotu pule le ola fou ma ona suiga. Ia tatou fa'atutau i lo tatou ola, ona ua lē toe faigofie nei aso. Ia avea le suafa o le Atua, e fai ma fa'amaufa'ailoga i lo tatou ola. Ua na'o lona suafa, e faigofie ai mea ua faigata o lenei soifuaga. O lona lava suafa mamalu, ua fusia fa'atasi ai le lalolagi uma mai le agasala. O le suafa na maua ai lo tatou sa'olotoga, ma tatou manumālō ai mai le lalolagi ma ona tu'inanau. Ua toe maua ai le mafutaga ma le Atua i lona mālō i le ola e fa'avavau.

**Tatalo:** Le Atua e, ia avea lou suafa e fa'amaufa'ailogaina ai o matou ola pe a tau fa'avaivai. **Amene!**

## **FAITAUGA I LE TUSI O RUTA** (*Readings in Ruth*)

### **Aso Sā – Fepuari 8: “O le fa'amaoni ma le loto atu o Ruta”**

#### **Tusi Faitau – Ruta 1: 1-18** (*Ruth's loyalty and commitment*)

**f. 16:** *“A ua fai atu Ruta, Aua e te finau ia te a'u ina ia ou tu'ulafōa'i ia te oe, ia le mulimuli atu ia te oe; auā o le mea e te alu ai, ou te alu ai fo'i; o le mea e te nofo ai, ou te nofo ai, e fai lou nu'u mo'u nu'u; e fai lou Atua mo'u Atua.”*

O le ta'utinoga a Ruta iā Naomi, ua manino ai le mafana o le la faigāuō. O le tautoga e fa'amaoni le alofa, ma lona musu e tu'ua Naomi. Ua mulimuli ai pea Ruta i le mea e alu i ai Naomi, ma le fa'amoemoe ia avea o ia ma afafine o Isaraelu. E ui i le fa'atauānau a Naomi iā Ruta e toe fo'i, e le'i mafai ona suia le mafaufau o Ruta ma na ia faia ai lava lea tautoga fa'amaoni. O se faigāuō ua osia i le alofa fa'amaoni, e faigata ona toe motusia. Ua tauanaugatā lagona o le alofa ona ua mafanafana le mafutaga. E tele ni ta'utinoga ua tatou faia i lo tatou fo'i vaitau. A o le fesili fa'atupu manatu, o fa'amaoni ea le tausia o tatou ta'utinoga? E leai se tagata e atoatoa ma sa'o i le lalolagi nei. O a lava ta'utinoga ua tatou faia, ia fa'amaoni lona fa'atinoga. Sa'ili i le Atua mo se fesoasoani, ma ia tatou fa'amaoni i ta'utinoga ua tatou fai ma isi tagata.

**Tatalo:** Le Ali'i e, fesoasoani mai ina ia matou fa'amaoni i ta'utinoga ua faia ma isi tagata. **Amene!**

### **Aso Gafua – Fepuari 9: “Ua feiloa'i Ruta iā Poasa”** (*Ruth meets Boaz*)

#### **Tusi Faitau – Ruta 1: 19-2: 16**

**Matua – f. 10:** *“Ona fa'apaū faō ai lea o ia, ua ifo toele, ua fai atu ia te ia, Se a le mea ua e alofa mai ai ia te a'u, ma e silasila mai ai ia te a'u, o a'u fo'i le tagata 'ese?’”*

Ua toe fo'i Ruta ma Naomi, o ni fafine ua leai ni tane ma ni fanau. Peita'i Ruta, ua ia manatu e alu e sa'ili se mea'ai mo la'ua. Ua alu atu Ruta i le fanua ma ao mai mea na totoe

i tua o ē galulue, ma lona lē iloa o le fanua o Poasa. Ua iloa e Poasa le mana'omia tele e Ruta o se fesoasoani, na ia tu'uina ai pea o ia e galue i lona fanua. Na to'ele Ruta ma fa'aailoa lona agaga fa'afetai tele iā Poasa, e ui o ia o le tagata 'ese a e ua ia agalelei i ai. O le ta'aviliga o le lalolagi ua i ai nei, ua tele mea e tutupu ua tatou molimauina. Ua fevātaua'i pea nisi mālō o le lalolagi ona o le saili'ina o le pule, ma ua a'afia ai le soifua o tagata lautele. Ua faigata ona maua le filemu i vā o tagata, ona o le ola fa'amauualuga. O fuāla'au fa'asāina ma avao'ona, ua a'afia ai le to'atele o tagata o le laloalgi. O le ā se tataou tali atu i nei fa'afitauli? O le upu moni, ua lē toe faigofie lenei vaitau o le soifuaga ua tatou i ai. O ai lava e sa'ili mai e fia maua le fesoasoani, ia faia galuega lavea'i mo latou mafatiaga. Ia lē tu'ua'i i ai le leaga ma aua ne'i o tatou tusitusilima, a e ia ofoina le fesoasoani tataou mo i latou. E pei o Poasa iā Ruta, na ia alofaina i lona fia maua o se mapusaga mai ona mafatiaga.

**Tatalo:** Le Atua o le alofa mutimutivale, ia matou maua le loto alofa e fesoasoni ai i nisi ua mafatia. **Amene!**

### **Aso Lua – Fepuari 10: “Galuega mamafa a Ruta ma le agalelei o Poasa”**

**Tusi Faitau – Ruta 2: 17-3: 5** (*Ruth's hard work and Boaz's kindness*)

**Matua – ff. 18, 19:** *“Ona si'i a'e ai lea e ia, ua alu i le a'ai, ua fa'aali atu i le tinā o lana tane le mea ua fa'aputuina e ia; ua na avatu fo'i ia te ia le mea na totoe ina ua ma'ona o ia. Ua fai mai le tinā o lana tane ia te ia, Po o fea na e ao ai mea i le asō? Po o fea na e galue ai? Ia manuia o ia na alofa mai ia te oe. Ona ta'u atu ai lea i le tinā o lana tane o le tagata na ia galuea i lona fanua, ma na fai atu, O le igoa o le tagata na ou galue ai i lona fanua i le asō, o Poasa.”*

E foliga mai i le tusi o Ruta, o auala a le Atua ua maua aia le feso'ota'iga a Ruta ma Poasa. O Ruta na ia sa'ili fesoasoani i le fanua o Poasa, a e ua tu'uina i ai le avanoa e galue ai. O le naunau o Ruta ina ia maua se mea'ai mo la'ua, le ala lena e le'i fa'avaivai ai lana sa'iliga. Ua fa'aali atu fo'i i le tinā o lana tane le tele o mea ua ia fa'aputuina, ona o le agalelei o Poasa iā te ia. E ui o Ruta o le tagata 'ese peita'i, ua agalelei tele Poasa ma fesoasoani i ai. Ua ia fa'amalosia fo'i iā Ruta e galue pea i lona fanua, ma fa'atonu le au faigaluega e fafaga ma alolofa iā te ia. O le galue malosi o Ruta, ua fai ma fa'ata'ita'iga lelei i ē na latou galulue i le fanua o Poasa. E i ai aso o le ola e o'o mai ai faigata, ona lagona lea o le popole ma le lē mautonu. O lagona o le māasiasi e sa'ili mo se fesoasoani, ina ne'i iloa e tagata o tatou fa'afitauli. Ua a'oa'o mai le Tala Lelei, ia maua le loto maulalo e fesili ai mo se mea o mana'omia. O a fo'i lu'itau ese'ese o feagai ma le tagata lava ia, tu'u i le Atua o tatou fa'amoemoega uma.

**Tatalo:** Fa'apupula o matou mata, ina ia manino la matou va'ai i nisi o lau fanau o mana'omia le fesoasoani. **Amene!**

### **Aso Lulu – Fepuari 11: “O le talosaga lototoa a Ruta”** (*Ruth's bold proposal*)

**Tusi Faitau – Ruta 3: 6-18**

**Matua – ff. 8, 9:** *“Ua o'o i le tulua o po ma ao, ua fefe le tagata, ua liliu, fa'auta, o le fafine o lo o taoto i ona vae. Ona fai mai ai lea o ia, O ai ea oe? Ua tali atu o ia, O a'u o Ruta lau auaua fafine; fa'a'afu mai ia lou pito ofu i lau auaua fafine, auā o ia te oe le tausi tama.”*

O le fafine o le meatotino i se tane na foa'i mai e le Atua. O le tala o lenei aso, ua fa'ate'ia Poasa ina ua la feiloa'i ma Ruta. Ua aumaia i le matua, e fa'afoliga ua talosaga Ruta ia avefa Poasa ma ana tane. Peita'i, e le'o le uiga moni lea o le fa'aailoa atu e Ruta o ia iā Poasa. O Ruta ua oti lana tane ma o tu ma aga i lo latou fo'i vaitau, o fafine ua leai ni tane e ola i se olaga mativa. O le sa'iliga fesoasoani a Ruta, lea ua feiloa'i ma Poasa ma ia fa'aailoa atu ai o ia iā Poasa. E i ai taimi o le ola tatou te mumusu ai e sa'ili fesoasoani i nisi, ona o mafua'aga ese'ese. Peitai o Ruta, ua lē mā le mativa a e ua ia naunau ia maua se manuia. O a lava mea o lo'o tatou mo'omia i lo tatou ola, ia maua pea le lototele e sa'ili ai. Fa'alagolago i le Atua, e mautinoa e taunu'u i le manuia.

**Tatalo:** Aumaia le lototele iā i matou, e sa'ili ai manuia o lau afio. **Amene!**

**Aso Tofi – Fepuari 12: “O le tagi fa’aletulafono a Poasa”**

**Tusi Faitau – Ruta 4: 1-6** (*Boaz’s legal claim*)

**Matua – ff. 5, 6:** *“Ua fai atu Poasa, O le aso e te fa’atau ai le fanua nai le lima o Naomi, e te fa’atau fa’atau fo’i nai ia Ruta le fafine Moapi, le avā a le ua oti; e fa’atumau ai le igoa o le ua oti i lona tofi. Ona fai mai lea o le tagata o le aiga, Ou te le mafai’atau ai mo’u, ne’i ou fa’aleaoga i lo’u tofi; ia e fa’atau mo oe le fanua, auā ou te le mafai ona fa’ataulia.”*

E ui i le naunau o Poasa e fa’aipoipo atu iā Ruta, a e na ia silafia lava e i ai tu’utu’uga e tatau ona mulimuli i ai. O tulaga o fefa’atauaiga, e foliga e matuiā lona taui i totonu o lutaia. O le saili’ina lava o lo latou tamaoiga i o latou fo’i tū ma aga i fanua ua masani ai. O le aveala o Poasa ma tane a Ruta, o le a ia toe fa’aaauaina galuega a Maalona. O le galuega ua tu’ufa’asolo i lē ua soso’o mai. E fa’apea fo’i nisi o gasologa o lo tatou ola i lenei fo’i vaitau. E i ai nisi o galuega ua tatou tau’ave pea ma fa’aaauaina, ina ia manatua ai pea i latou na aua e malae. E ese’ese uma fo’i la galuega o lo’o tatou tau’ave ma fa’aaau pea i o tatou fo’i aso. E ui ina feagai pea i tatou ma lu’itau o lenei soifuaga, a e ua tatou faia lava ia galuega ona o le tatou matafaioi tau’ave i aso uma. Ia mau pea i le Atua le fa’atuatua, e faigofie ai mea uma ua faigata.

**Tatalo:** Foa’i mai le malamalama e manino ai la matou va’ai i lou finagalo. **Amene!**

**Aso Faraile – Fepuari 13: “O le feagaiga a le toggiola”**

**Tusi Faitau – Ruta 4: 7-12** (*The redeemer’s covenant*)

**Matua – ff. 9, 10:** *“Ona fai atu lea o Poasa i toeaia ma le nu’u uma, O molimau outou i lenei aso, ua ou fa’atau mea uma sa ia Elimeleka, ma mea uma sa ia Kiliona ma Maalona nai le lima o Naomi; o Ruta fo’i le fafine Moapi, le avā a Maalona, ua ou fa’atau ia te ia e fai ma’u avā, e fa’atumau ai le igoa o le ua oti i lona tofi, ia le galo le igoa o le ua oti ai lona uso, ma le faitoto’a o lona a’ai; o molimau i ai outou i lenei aso.”*

O le feagaiga ua fai ma pine fa’amaui i le vā o tagata. O se tautoga ua faia ma le loto ua malie, ma le ola ua tu’u atoa mo le isi tagata. O lea feagaiga ua faia i le vā o Poasa ma Ruta, ua tō manatu Poasa ina ia fai ma fa’amanatu e manatua ai pea Maalona i totonu o Isaraelu. O lea fa’amoemoe lelei, ua ave ma molimau ola i tagata na mafai ona latou molimauina. E tele feagaiga ua tatou osia i lo tatou fo’i vaitau. E le gata o feagaiga fa’aalugaali’i, a e fa’apea fo’i feagaia i le vā o matua ma fanau. Peita’i, ua fa’afoliga nisi o feagaiga i nei aso. Ua fa’ata’aloga i vai le fa’atinoina o nisi feagaiga, ma ua fai ma fa’afitauli o le olaga nei. Ia tautuana, o le feagaiga o mea ia a le Atua. Ua ia tausia pea le feagaiga ma le tagata, e ala i lona alofa tunoa e lē mavae.

**Tatalo:** Ia ave pea lau afio ma totonugalemu o matou feagaiga. **Amene!**

**Aso Toona’i – Fepuari 14: “Fa’amanuiaga o Ruta ma le gafa”**

**Tusi Faitau – Ruta 4: 13-22** (*Ruth’s blessing and lineage*)

**Matua – f. 13:** *“Ua ave e Poasa ia Ruta, ua fai mana avā; ua alu atu o ia ia te ia, ona to ai lea o ia i le pule a le Ali’i, ua fanau mai lana tama tane.”*

Ua fa’ai’u lenei vaiaso i manuia o le Atua ua fa’amanuiaina ai Ruta ma Poasa. Ina ua ia foa’i se tama tane mo lo laua aiga. E ui o Ruta o le tagata’ese, a e ua fa’apeaina le finagalo o le Atua. Ua auala mai iā lona finagalo, auā o ana tofiga i le ola o le tagata, o lana lea pule fai to’atasi. O faiga ia a le Atua e leiloa e se tagata ma e lē au fo’i i ai so tatou malamalama. E ui i so tatou vaivai ma fa’atauva’a pe o lea lava fo’i le tulaga o i ai le tagata, e amana’ia lava i tatou e le Atua. Ua ia finagalo lava e fa’aaoga o tatou tagata, i auala ese’ese ua finagalo ai. O a lava la ni tofiga ua tōina e le Atua mo i tatou, ia faia ma le fa’amaoni. O mea uma ua tatou faia, ua faia lea mo le vi’iga o le Atua a e le’o i tatou.

**Tatalo:** Fa’afetai i ou manuia ua matou maua i so’o se ala. **Amene!**

**FA’ATUMAUIA LE LOTOGATASI I LE EKALESIA**

*Maintaining unity in the Church*

**Lotogatasi i le tino o le Ekalesia** (*Unity in the body of the church*)

**Aso Sā – Fepuari 15: “O le lotogatasi e...”** (*Unity is...*)

**Tusi Faitau – Salamo 133: 1-3**

**Matua – f. 2:** *“Ua tusa ma le suāu’u lelei i luga o le ulu, na tafe ifo i le ‘ava, o le ‘ava lava a Arona, na tafe ifo i le ua o ona ofu.”*

Ua silisili ese lava le alofa ma le agalelei o le Atua i lo tatou ola, i le tele o ona manuia ua tatou maua. O le lotogatasi, o le meaalofoa foa’i fua mai mo le tagata ina ia maua le fealofani i mafutaga. E fa’atupu ai le filemu, o le galulue fa’atasi, a e sili o na mea uma o le alofa lea. Ua fa’atusaina i le suāu’u ua tafe ifo i le ‘ava, o le ‘ava lava a Arona, na tafe ifo i le ua o ona ofu. O le fa’ailoga o manuia o le Atua, ua ia sasa’a mai mo tagata uma. O lona alofa tunoa ua atoa iā Iesu Keriso o lē na afio mai, ma togilolaina le tagata ua agasala. O lona lea finagalo mo le lalolagi, ia tatou maua le sa’olotoga ma le nonofo fealofani. O le lotogatasi, e fausia le fealo-fani ma le maopopoga o tatou mafutaga.

**Tatalo:** Fa’afetai le Atua i au fa’amanuiaga foa’i fua mai, ua matou ‘ae’ae ai i lenei soifuaga lē tumau. **Amene!**

**Aso Gafua – Fepuari 16: “O le lotogatasi e tāua ma ma’ale’ale”**

**Tusi Faitau – 1 Tupu 8: 54-61** (*Unity is precious and fragile*)

**Matua – ff. 56, 58:** *“Ia fa’afetaia le Ali’i o le ua foai’ina mai le malologa i lona nu’u o Isaraelu, e tusa ma mea uma na ia fetalai mai ai, e leai se upu e tasi ua le taunu’u o ana upu lelei uma na ia folafolaina mai na fa’ao’o mai e lana auaua o Mose. Ia ia te i tatou le Ali’i lo tatou Atua, e pei ona i ai o ia i o tatou tamā; aua ne’i tu’ua i tatou e ia; aua fo’i ne’i lafoai’ina i tatou e ia; ina ia fa’aliliuina e ia o tatou loto ia te ia, ia tatou savavali i ona ala uma, ma tatou tausi i ana poloa’iga, ma ana tulafono, ma ana fa’amasinoga, na ia poloa’i mai ai i o tatou tamā.”*

O le lotogatasi e mafai ona avea ma penina tautele, e fa’apelepele ina ia mautinoa lona saogalemu. E anagatā ma e faigata fo’i ona maua e tagata uma. Ua ma’ea manuia le toe fausiaina e Solomonona o le malumalu, na ia fa’amanatu iā Isaraelu Mose ma lana ta’utinoga e uiga i le toe fausia o le malumalu. Ia latou fa’afetaia le Atua, ona o lona agalelei iā i latou i le tele o tausaga. A e na ia fa’amanatu ai fo’i i le nu’u o le Atua, e tāua ma ma’ale’ale le lotogatasi. E ui i le alofa o le Atua i lona nu’u, peita’i ua latou faia pea le agasala. E fa’apea fo’i le soifuaga o lo’o tatou oli ai. Ua tele pea le alofa mai o le Atua mo i tatou, a e ua lē tusa ma lo tatou tali atu. O le lotogatasi, o se mea e faigata ona maua. Aisea? E ese’ese uma o tatou manatu ma lagona. E ui i so tatou taumafai ina ia maua le fealofani i mafuataga, e faigata lava ona maua se maopopoga ona e tonu le tagata i ona manatu. O le tu’ualalo a le Tala Lelei, ia tatou fausia le lotogatasi ma fa’atupu fealofaniga i mafutaga ua fevaevae’i. Aua fo’i le avea manatu ma lagona o isi tagata, e ta’isesēina ai a tatou fa’ai’uga fai. Ia manatua, e tāua ma e sili ona ma’ale’ale le lotogatasi.

**Tatalo:** Le Atua Paia e, fa’afetai i lou fa’atupuina pea o le lotogatasi ma le fealofani i totonu o matou mafutaga. **Amene!**

**Aso Lua – Fepuari 17: “O le lotogatasi e fa’atupu fa’amoemoe”** (*Unity is hopeful*)

**Tusi Faitau – Esera 3: 1-13**

**Matua – f. 13:** *“Ua le iloga e le nu’u le leo o le alaga o le fiafia ma le leo o le fetagisi o le nu’u; auā sa alalaga le nu’u i le alaga tele, ua lagona atu le leo i le mea mamao.”*

E logo i tino matagi lelei lagona e o’o mai, pe a galulue fa’atasi e opogi se fa’amoemoe. O lagona o le malosi e fa’afouina, fa’apea fo’i lagona o le fiafia ma le fia fai mea sili. Ua alalaga fiafia le nu’u o le Atua, ina ua amata le galuega o le toe fa’atūina o le malumalu e pei ona moe miti i ai. E le gata i lea, o le toe fa’asaoina mai e le Atua o lona nu’u mai le tafeaga. Ua onomea ma tatau ona fa’afetaia le Atua, ona o le tunoa o lona alofa. Ua mamanu mai i upu o le matua fa’amoemoega o le nu’u lotogatasi. O le moe mitiga i tausaga e tele, ina ia toe fausia le malumalu o le Atua. Ua mafai ona fa’ataunu’uina lea fa’amoemoe, ina ia maua le lotogatasi mai le Atua e fa’atino ai. Le Ekalesia e, e ui lava ina ese’ese i tatou i manatu ma lagona, peita’i ua tasi i tatou uma i le finagalo o le Atua. O le lotogatasi, e na te

fa'atupuina lagona o le fia fai mea sili pe a tatou galulue fa'atasi. O le a faigofie fo'i ona fa'ataunu'u o tatou fa'amoemoega uma.

**Tatalo:** Ia fa'amalosia pea i matou e galulue fa'atasi, ia manuia ai matou fa'amoemoega uma i le lumana'i. **Amene!**

**Aso Lulu – Fepuari 18: “O le lotogatasi e lu'itauina mea masani”**

**Tusi Faitau – Neemia 4: 1-6** (*Unity is confrontational*)

**Matua – ff. 4, 5:** “Lo matou Atua e, ia e fa'afofoga mai; auā o lo'o inosia i matou; ma ia e fa'af'o'i atu lo latou fa'aluma mai i luga o latou ulu, ia tu'uina atu i latou ia vetea i le nu'u na tāfea i ai; aua ne'i ufiufitia fo'i lo latou agaleaga, aua fo'i ne'i sōloieseia i ou luma la latou agasala; auā ua latou fa'alili mai i luma o e atia le pa.”

Ua fa'alavelaveina le galuega, a ua finafinau pea i ai o sa lutā. O le atia o pa e Ierusalem, na faigata ona ua fa'alavelave Sanepalata. Peita'i, e le'i taofia ai sa lutā ma le latou galuega, a e na fa'atino lava. Auā ua latou mautinoa, e i ai pea le Ali'i ma i latou. O upu o le matua, o le tatalo ua tu'uina i le Atua ma le loto talitonu e tali mai. Ua fa'asagatau nisi iā Isaraelu ma le galuega, ua fai ma ala ua faigata ai lona fa'atinoina. Ua aumai i lenei tala, se fa'amanatu taua mo i tatou le Ekalesia. E tele galuega ua tatou taumafai ai, mo le atina'eina o le Atua ma lana Tala Lelei. E fai lona ma taulaga, a o la tatou auunaga mo le Atua ina ia aogā aso o lo tatou ola. I le tele ai fa'amoemoega ese'ese ua feagai ma lana Ekalesia, e lē fesiligia lava le taumafai mai o le fili ma ana mailei. Ua fa'amanatu mai le Tala Lelei, ia tumau pea i le tatalo. Tu'u atu i le Atua nisi o fa'afitauli o feagai ma i tatou, a e fa'aaau galuega ua tatou faia. Ua i a'ao o le Atua le tali mo le fili e fa'alavelave mai i galuega ua tatou fai.

**Tatalo:** Sisila alofa mai ou fofoga alofa le Atua, ma ia fai lou finagalo i le fili e fa'alavelaveina atina'e ua faia mo lau galuega. **Amene!**

**Aso Tofi – Fepuari 19: “O le lotogatasi e taufa'amata'u”** (*Unity is threatening*)

**Tusi Faitau – Fa'ataoto 6: 12-19**

**Matua – ff. 16, 19:** “O mea nei e ono ua inosia e le Ali'i; o lona fitu fo'i ua matuā inosia lava e ia; o mata fa'asia, o le laulaufaiva pepelo, ma lima e sasa'a le toto o le ua lē sala, o le loto e manatunatu i togafiti leaga, o vae e tele vavave ona taufetuli i le leaga, o le molimau pepelo, na te tautala i mea pepelo; ma le na te fa'atupu maseiga i uso.”

Ua finagalo lava le Atua ia fealofani ona tagata, ma ia maua lona filemu. Pe a tatou maitau i le lalolagi ma mea o tutupu, ua leai se fealofani i tagata. O lo'o feagai pea le lalolagi ma taua i vā o mālō; ma ua tele soifua o nisi ua a'afia ai. Ua ola so'ona fai fo'i le tagata i le lalolagi, ma ua lē maua ai se fealofaniga. O upu a le potu, e toe timata ai le uega o lo tatou ola fa'atuatua i le Atua. O le a se tataou galuega, e fesoasoani ai i mafatiaga o feagai ma le lalolagi i lo tatou fo'i vaitau? O le Atua e tele gese lona to'asā, a e tele pea lona alofa tunoa mo le tagata. Ua aumaia i le matua, nisi ia o vaivaiga o lo'o feagai pea ma le tagata. Pau lava le tatou galuega, ia salamō ma ia maua lotogatasi e tatalo ai mo se manuia o le laloalgi. O a lava vaivaiga o feagai ma i tataou, e leai se mea e faigata i le Atua. E lütia lava i tatou i faigata o le lalolagi nei, a e mapu lava i a'ao o le Atua

**Tatalo:** Le Atua o le ola, ia malutia le soifua o ou tagata i ou a'ao agalelei; mai le laolagi fetau'i ma fa'afitauli ese'ese o le ola. **Amene!**

**Aso Faraile – Fepuari 20: “E mana'omia e tatou le lotogatasi”**

**Tusi Faitau – Efeso 4: 1-13** (*Unity is required of us*)

**Matua – ff. 1, 3:** “O lenei, o a'u o le ua noanoatia ona o le Ali'i, ou te aioi atu ia te outou, ia outou savavali ia tusa ma le vala'au ua vala'auina ai outou. Ia outou loto maulalo ma agamalū, ma onosa'i. Ia outou fa'apalepale le tasi i le tasi i le alofa. Ia taumafai e outou ona taofi o le lotogatasi i la le Agaga i le noataga o le filemu.”

O upu a le Aposetolo Paulo, o le fa'amanatu o le tuana'i ina ia manuia le lumana'i. Ua ia fa'amalosi ai i le Ekalesia i Efeso a o i ai i le falepuipui i Roma, ia tumau pea i le lotogatasi.

E ui ina feagai Paulo ma faigata o le galuega, a e le'i taofia ai le fa'atinoina o ona faiva i le galuega tala'i. Na ia fa'amanatu ai i le Ekalesia i Efeso, ia tumau pea i le lotogatasi. Le Aposetolo ua masani le ola i puapuaga o le galuega. A o puapuaga o le galuega e fai ma fa'amalosi 'au, ina ia fa'amalosia pea e faia le finagalo o le Atua. O le fa'amalosi fo'i lea a Paulo mo i tatou le Ekalesia a le Atua. Ua vala'auina i tatou e tautua le Atua ma lona finagalo i so'o se ala. O le upu moni, e lē faigofie le ola ofoina i le galuega a le Atua. E i ai taimi ua tatou fa'avaivai ai i le fa'atinoina o tatou tiute, a ua tatou fa'amuamua fiafiaga o le lalolagi. A o le natura lea o le tagata, e ui ina tatou taumafai mo se lelei e i ai lava o tatou vaivaiga. O le augani a le Aposetolo, e mana'omia e i tatou le lotogatasi ona faigofie lea o tatou tiute fa'atino i le galuega a le Atua.

**Tatalo:** Le Atua e, ia atagia le lotogatasi i lo matou ola auauna i lau Tala Lelei; i so'o se ala ua tautua ai. **Amene!**

### **Aso Toona'i – Fepuari 21: “E fausia le lotogatasi i le loto fa'amagalo”**

**Tusi Faitau – Mataio 6: 9-15** *(Unity is built on forgiveness)*

**Matua – ff. 12, 14-15:** *“Ia e fa'amagalo ia te i matou i a matou agasala, E pei o i matou fo'i ona matou fa'amagaloina atu i e ua agaleaga mai ia te i matou. Auā afai tou te fa'amagaloina atu tagata i a latou agasala, e fa'amagaloina fo'i outou e lo outou Tamā o i le lagi. A e afai tou te lē fa'amagaloina atu tagata i a latou agasala, e lē fa'amagaloina fo'i e lo outou Tamā a outou agasala.”*

O le Tatalo a le Ali'i ua a'oa'o'oina ai i tatou e tatalo ai i aso uma. O le fa'atinoga fa'alegaga mo le 'au Kerisiano uma, ina ia maua pea le so'otaga ma le Atua. O upu ua fai ma matua, ua aumaia ai se fa'atinoga sili ona taua i le tagata fa'atuatua. Ia galulue fa'atasi e fausia le lotogatasi, ina ia maua le nonofo fealofani i le vā ma tagata. O le natura o le soifuaga ua tatou i ai nei, e faigata ona maua le loto fa'amagalo ona o mea e tutupu. Ua avea ia mea ma matāvai o fa'afitauli i lo tatou vā feagai ai ma isi. O le fa'amanatu a le Tala Lelei, e maua le lotogatasi pe tatou loto fa'amagalo. Ia tatou tatalo i le Atua, e foa'i mai le loto fa'amagalo ina ia fausia ai pea le fealofani i mafutaga ua tatou faia. Ia avea fo'i i tatou ma leleia i ni mafutaga ua leai se filemu, ona moni lea o la tatou auaunaga i le Atua.

**Tatalo:** Lo matou Tamā e o i le lagi, ia matou maua le loto fa'amagalo i isi ua agaleaga mai iā i matou. **Amene!**

### **FA'ATUMAUINA LE LOTOGATASI I LE EKALLESIA**

*(Maintaining unity in the Church)*

**Ola i le lotogatasi** *(Living in unity)*

### **Aso Sā – Fepuari 22: “O le satauro o le a aumaia le lotogatasi”**

**Tusi Faitau – Ioane 11: 47-53** *(The cross will bring unity)*

**Matua – ff. 49e, 52:** *“O Kaiafa, o le ositaulaga sili ia i lea lava tausaga, ua fai atu o ia ia te i latou, “Tou te le iloa lava se mea e tasi; tou te le mafaufau fo'i, e aoga ia te i tatou ona oti o le tagata e to'atasi mo le nu'u, ia le fano fo'i le nu'u uma lava.” E le'i fua mai ia te ia ona fai atu o lea mea, a ona o ia o le ositaulaga sili i lea lava tausaga, na ia vavalu ai, o le a maliu Iesu mo le nu'u. E le gata fo'i i le nu'u, a ia fa'apotopotoina ia fa'atasi le fanau a le Atua ua ta'apeape.”*

Auā ua fa'apea lava ona alofa mai o le Atua i le lalolagi, na ia aumai ai lona atali'i pele e to'atasi; ina ia lē fano se tasi e fa'atuatua iā te ia a ia maua le ola e fa'avavau. O le Atua alofa tunoa ma lona fa'atōfāla'iga, na fai ai Iesu ma sui e togiola i le lalolagi. Ua fa'ailoa e Kaiafa le ositaulaga sili, le finagalo alofa o le Atua e ala iā Iesu Keriso. O le taulaga e lē mafai e se tagata ona fa'atino, a e ua finagalo le Atua e lavea'i le lalolagi mai le loloto o le agasala. O le Atua e nau alofa i le tagata, ina ia maua le sa'olotoga i le ola atali. O le satauro, o lo tatou ala lea i mālō ma le ola e fa'avavau. O lo tatou taliaina o le fa'aolataga, o le totonugalēmū lena o le fa'atuatua o so'o se Kerisiano. O le fa'amanatu a le Tala Lelei, ia

manatua le satauro o le manumālō na saunia e le Keriso. O le satauro ua so’o tulutulu ai tulutū’iga uma o le lalolagi, ona o le Atua alofa tunoa.

**Tatalo:** Ia fa’apupula o matou mata ina ia manino la matou va’ai, i ala e maua ai le lotogatasi. **Amene!**

**Aso Gafua – Fepuari 23: “Fausia e le tasi le isi i le lotogatasi”**

**Tusi Faitau – Filipi 4: 1-7** (*Build each other up into unity*)

**Matua – ff. 1e, 4:** *“Le au pele, ia fa’apea ona tumau o outou i le Ali’i. Ou te aioi atu ia Evotia, ou te aioi atu fo’i ia Sunetui, ia tasi lo la manatu, i le Ali’i. Ou te fa’atoga atu fo’i ia te oe, lo’u fesoasoani fa’amaoni, ia e fesoasoani ia te i laua, o e na finau fa’atasi ma a’u i le Tala Lelei, atoa ma Kelemene ma nisi uma e na galulue fa’atasi ma a’u, ua i le tusi o le ola o latou igoa. Ia outou olioli i le Ali’i e le aunoa; ou te toe fai atu, ia outou olioli.”*

O le upu fa’amalosi a le Aposetolo, ua fai ma fa’atuatua ola i le Ekalesia i Filipi. O le auauna ua matua le soifua i le galuega a le Atua; ma ia toe polili ai le ola fa’atuatua o le Ekalesia i Filipi. Ua manino i upu o le matua, le naunau pea o le Aposetolo ina ia tumau le Ekalesia i Filipi i le Atua ma lana Tala Lelei. Ua manino mai fo’i i upu a Paulo, le taua o le galulue fa’atasi ina ia maua ai le lotogatasi. O lea fo’i le fa’amanatu, mo tatou le fanau fa’atuatua a le Atua. E i ai taimi o le ola e lē o gatasi ai o tatou manatu ma lagona, ona tupu ai lea o le lē mautonu ma le masalosalo. A o upu a le Aposetolo o Paulo, ia tatou tumau i le Ali’i. Ia tatou maua le lagona o le galulue fa’atasi, e mamā ai la tatou avega o lo’o tau’asoa. O lona uiga a tatou galulue fa’atasi i se fa’amoemoe, ua tatou fausia lava le lotogatasi i o tatou taumafaiga uma. Tatalo pea i le Atua, ia maua e le lalolagi uma le fa’amoemoe lelei o le lotogatasi; ia fausia ai lona filemu.

**Tatalo:** Ia e fa’atupuina i o matou loto le galuelue fa’atasi, ina ia atagia lou finagalo ma le fa’amoemoe o le lotogatasi. **Amene!**

**Aso Lua – Fepuari 24: “Tasi le tino, tele itutino”** (*One body, many parts*)

**Tusi Faitau – 1 Korinito 12: 14-27**

**Matua – ff. 24e, 27:** *“A ua fa’atatauina e le Atua le tino uma, ua ia tu’uina fo’i le ava i le itu tino ua vaivai; ina ne’i i ai i le tino se maseiga, a ia fetausia’i fa’atasi uma itu tino. Pe afai e tigā le tasi itu tino, ia tigā fa’atasi ai itu tino uma lava; pe vi’ia le tasi itu tino, ia olioli fa’atasi ai itu tino uma lava. A o outou, o le tino o Keriso outou, ma itu tino ta’ito’atasi.”*

O upu a le Aposetolo Paulo i le Ekalesia i Korinito, e toe fa’amanatu le taua o le lotogatasi i le galuega a le Atua. I le tele o tala’iga sesē ua ofi mai ma ua taumafai e fa’asesēina le ‘au Kerisiano. O tatou tino, e tele ona vaega ma lona aoga. O le tatou matāfaioi o aso uma, le tausaiaina o le tino ina ia maua le maloloina lelei. A mālōlōina le tino atoa, ua atoatoa fo’i le malosi i le mafaufau ma le agaga. O le augani a Paulo i le Ekalesia i Korinito, ua tasi i latou uma i le tino o Keriso Iesu. O lea fo’i le fe’au o le Tala Lelei mo le tatou Ekalesia. O upu ua masani ai le fa’alogo, a tu’ia le vaematua e logo le tino atoa i le tigā. O tatou lava ua na’o ni meafaigaluega, e tautua le Atua ma lona finagalo. E ui i le ese’ese o tatou tino, a e ua tasi i tatou uma iā Iesu Keriso. O le fa’amanatu, ia fetausia’i fa’atasi itu tino uma. Auā o Iesu o ia o le Lokou, a o lālā i tatou. Ia tatou galulue ma tautua le Atua, ona mālōlōina lea ma manuia le lumana’i.

**Tatalo:** Le Atua e, foa’i mai le loto tele matou te faia ai lou finagalo i so’o ala ua vala’auina ai matou. **Amene!**

**Aso Lulu – Fepuari 25: “Mamao ese, fa’alatalata mai”** (*Far off, brought near*)

**Tusi Faitau – Efeso 2: 11-22**

**Matua – ff. 14, 16a:** *“Auā o ia lava o lo tatou leleiga, ua na faia ia tasi e sa fa’alua, na na soloia fo’i le pa vaeloto o le feitaga’i sa vaeluaina ai; auā ua ia fa’aumatia fo’i i lona lava tino le tulafono i poloaiga ma fa’atonuga; ina ia liliu e ia lava lea to’alua ia fai ma tagata fou e tasi, ia tupu ai le leleiga; ma ia fa’aleleia ma le Atua ē sa to’alua, i le tino e tasi, ona o le satauro.”*

A o le'i afio mai Iesu i le lalolagi, sa faigata ona maua se filemu i le vā o tagata. Ua fevātaua'i mālō ona o le sailiga o le pule, ma ua a'afia ai le soifua o tagata lautele. O upu tima'i a Paulo ia Efeso, ua manino ai le atoaga o le afio mai o Iesu Keriso i le lalolagi. Sa tatou i ai i se lalolagi o le fetaua'i ma misa, ua lē maua ai fo'i so tatou nonofo lelei ona o le loto fa'amauauga o le tagata. O upu ua fai ma matua o lenei aso, o le fafagu a le Aposetolo mo tagata uma ua fa'atuatua i le Atua. Ua tuana'i atuvasa o le sami souā ma fa'afitauli o le ola na feagai ma le tagata. A e ua tafa mai atatata o le aso fou, a o le fa'amoemoe o le ola fou na saunia e Iesu Keriso. O le fa'atofalaiga a le Atua, na ia finagalo ai e auina mai Iesu Keriso e fa'aola le lalolagi agasala. O le afio mai o Iesu i le lalolagi ma mafuta ma le tagata, o le leleiga ua ia saunia mo i tatou uma. O le Ali'i o le filemu, o tamā ia o le fa'aolataga. O lona lea alofa tunoa tele, ua so'o tulutulu ai le lalolagi uma ma le Atua i le ola atali.

**Tatalo:** Fa'afetai le Atua i le fa'aolataga na e saunia e ala iā Iesu Keriso, lea ua maua ai le leleiga ma le sa'olotoga mo tagata uma. **Amene!**

**Aso Tofi – Fepuari 26: “Leai se mea e eseese ai”** (*No distinctions*)

**Tusi Faitau – Kalatia 3: 26-29**

**Matua – ff. 26, 29:** *“Auā o atali'i o le Atua outou uma lava i le fa'atuatua ia Keriso Iesu. Auā o outou uma lava na papatisoina ia Keriso, ua outou o'ofu ia Keriso; e le o i ai se lutaia po o se Eleni, e le o i ai se pologa po o se sa'oloto, e le o i ai se tane po o se fafine; auā ua tasi lava outou uma ia Keriso Iesu. Afai fo'i e o Keriso outou, e moni, o le fanau outou a Aperā'amo, o suli fo'i e tusa ma le mea na folafolaina.”*

O le manulaū o lenei vaiaso, ia fa'atumauiina le lotogatasi. O a'oa'oga a le Aposetolo o Paulo, ua fai lea ma faleaoga atamai i le tagata fa'atuatua. O le fa'amanatu a le matua moepō, e nau alofa i le Atua ma lana Tala Lelei. Ua toe polili e Paulo le 'au Kerisiano i Kalatia, ia lotogatasi ma fealofani auā ua tasi i latou uma iā Keriso Iesu. O le auuuna ua matua le soifua i le galuega a le Atua, ua mautinoa fo'i e Paulo manuia pe a olaina le finagalo o le Atua.

Ua tatou i ai i le vaitau o suiga fou o le ola ma ona faiga. O taimi o le fiafia ma aso o le fa'anoanoa. Ua tatou molimauina fa'afitauli ese'ese, o lo o feagai pea ma le tagata i aso uma. O fa'afitauli o totonu o atunu'u, aiga, nu'u ae maise le Ekalesia. O le upu moni, e lē tutusa uma o tatou manatu ma lagona i le tele o taimi. E i ai taimi o le ola, e lē o gatusa ai le futia ma le umele i manatu ma lagona o le tagata. Ua fai lea ma matāvai o fa'afitauli ma ua masofa ai le falute i vā o tagata. A o le fa'amanatu a Paulo, ua tasi i tatou uma iā Keriso Iesu. O a lava fa'afitauli o le ola e lu'itauina ai i tatou, ua leai se ese'esega o i tatou auā ua tasi i tatou iā Keriso Iesu. O le finagalo fo'i lea o le Atua, *“Ia tatou fealofani.”*

**Tatalo:** Le Atua o mafutaga, ia matou maua le agaga o le lotogatasi ma le fealofani; ina ia atagia ai lau afio i mea matou te faia. **Amene!**

**Aso Faraile – Fepuari 27: “Lotogatasi i le fa'atinoga”** (*Unity in action*)

**Tusi Faitau – Galuega 2: 42-47**

**Matua – ff. 44, 45:** *“Ua fa'atasia fo'i e ua fa'atuatua uma lava, ua tu'u tele a latou mea uma lava; ua fa'atau atu fo'i o latou fanua ma oloa, ma ua tufatufa le tau o ia mea i tagata uma, ua fa'atatau i le mativa o le tagata.”*

O tamaoaiiga ese'ese ua tatou maua, o manuia ia o le Atua ua fa'asafua mai mo le tagata. Ua mafai ona fa'amalieina ai mana'oga fa'a-le-tagata ma fa'ataunu'u mea ua tatou manana'o i ai. Peita'i ua avele le tele o manuia ua tatou maua, ma ala e lima mau ai ma ua leai se ola fa'asoa i nisi. Ua galo i le tagata le Atua e ona manuia, na i alofa fua mai ai ma fa'asafua mai mo i tatou uma. A o le matua o lenei aso, o se galuega lelei ua faia e le 'au fa'atuatua ina ua fa'atau atu o latou fanua ma oloa; a e ua fa'atatau fo'i i e matitiva. O le ata manino o le a'ao e mafola i so'o se tagata. Le fanau a le Atua, ua tatou 'ae 'ae lea manu ua ulu i manuia o le Atua ua tatou maua. Ua fa'amanatu mai le fe'au o le Tala Lelei, ia tatou fa'asoa atu manuia o le Atua ua tatou maua i nisi o lo o mana'omia. E lē taua le tele o tupe ua tatou maua, a e aunoa i tatou ma le alofa. E mafai ona tino lo tatou alolaofa, pe a tatou

tufa atu manuia o le Atua i tagata o sa'ili mo se fesoasoani. O Iesu Keriso na ofoina atoa mai lona soifua paia, e totogi le sala a le tagata ua tele naua. O lona alofa naunau ta'i, lea ua ta maua ai le sa'olotoga ma le ola e fa'avavau.

**Tatalo:** Lo matou Tamā e o i le lagi, tatala o matou loto ina ia matou iloa lou alofa tunoa i le lalolagi e ala iā Iesu Keriso. **Amene!**

### **Aso Toona'i – Fepuari 28: “Tatalo mo i tatou ina ia fa'atasia ia Keriso”**

**Tusi Faitau – Ioane 17: 20-23** (*Prayer for us to be united in Christ*)

**Matua – f. 23:** *“O a'u o i totonu ia te i latou, o oe fo'i o i totonu ia te a'u, ina ia fa'aatoatoaina i latou ia tasi; ina ia iloa ai fo'i e le lalolagi, na e auina mai a'u, ma e alofa mai ia te i latou, fa'apei ona e alofa mai ia te a'u.”*

O le tatalo o le auala o feso'ota'iga i le vā o le tagata ma le Atua. Ua fai ma so'otaga vāvalalata o le tagata ma le Atua i aso uma. Ua tatalo Iesu i lona Tamā ina ia maua e tagata ma le lalolagi uma le lotogatasi. A o sauni le Ali'i o Iesu e tali i tīgā o le oti. O lana lea vala'au alofa mo i tatou uma, ina ia fa'atumauiina pea le lotogatasi. A o le fesili mo i tatou le 'au fa'atuatua, o a ni mea o tatou tatalo ai i le Atua? O le upu moni, e ese'ese uma o tatou mana'o ua tu'uina i le Atua i le tatalo o aso uma. Peita'i le tatalo a Iesu, ua ia fa'atoga mo le filemu ma le fealofani o le lalolagi. O a lava fa'afitauli e tutupu mai i lo tatou ola, ia tu'u atu i le Atua e ala i le tatalo. Ia tatou tatalo fo'i mo le manuia o isi tagata, a e aua ua na'o i tatou lava. O lo tatou tatalo mo isi, ua fai lena ma fa'aailoga o lo tatou lotogatasi ma le nonofo fealofani.

**Tatalo:** Le Atua e, ia fai pea lau afio ma so'otaga o tagata ina ia mausalī ma maopopo ai matou mafutaga. **Amene!**

### **FAITAUGA I LE TUSI IA ROMA** (*Readings in Romans*) **Amiotonu i le Atua na o Ia** (*Righteousness in God alone*)

### **Aso Sā – Mati 01: “O le mana o le tala lelei”** (*The power of the gospel*)

**Tusi Faitau – Roma 1: 1-17**

**Matua – ff. 16, 17a:** *“Auā ou te le mā i le tala lelei ia Keriso; auā o le mana lava lea o le Atua e oa ai i latou uma o e faatuatua, e muamua le lutaia, atoa ma le Eleni. Auā ua faaaliga mai ai le amiotonu a le Atua i le faatuatua...”*

O loo valivali mai i le matua le malosi aoao o le tala lelei, e faamamafa mo tagata uma, o e latou te talitonu ma faatuatua i ai; e tusa lava poo a tala faasolopito ma talaaga. E maua le amiotonu a le Atua, e ala i le faatuatua, ina ua ola i se olaga mamā. O lea tali ua faamautinoa ai o le amiotonu, o se taunuuga o le faatuatua.

O le tusi a Paulo i Roma, o se tusitusiga o loo tau'ao atu ai le alofa, ina ia faaosofia ai lagona o tagata o loo i Roma, e tusa ma le alofa o le Tamā o i le lagi. E ui i talitonuga eseese ma faatuatua, peita'i, o loo moomia lava le fesoasoani mo i latou e tusa ma le faaaliga a le Atua, ma lona amiotonu; o le tala lelei e uiga ia Iesu Keriso, faatasi ai ma le meaalofo i la le Agaga, ina ia latou anaana i le faatuatua ona o le suafa o le Alo o le Atua. O le feau manino a Paulo mo tagata o loo i Roma. E latou te maua le faaolataga i le tala lelei, pe afai latou te faatuatua i ai. Auā o loo i ai le mana ma le mamalu o le Atua.

**Tatalo:** Le Alii e, ia malolosi o matou loto e faatuatua i le Talalelei. **Amene!**

### **Aso Gafua – Mati 02: “O le fouvale o tagata”** (*Humanity's rebellion*)

**Tusi Faitau – Roma 1: 18-32**

**Matua – ff. 18, 19:** *“Ua faaaliga mai foi le toasa o le Atua mai le lagi i le amio faalemataua ma le amio leaga uma lava a tagata, o e taofi i le upu moni ma le amioletonu. Auā o mea a le Atua e mafai ona iloa ua faaaliga mai ia te i latou; āua ua faaaliga mai e le Atua ia te i latou.”*

I le tusi faitau o lenei aso, o loo aumaia ai se lapataiga manino mo tagata talitonu o loo i Roma. E tusa ma aganuu faalemata'u ma le amio leaga o le atunuu/malo o Roma. O

loo ua naunau lava le aposetolo ina ia manino tagata uma i le upu moni a le Atua. O Iesu o le upu moni ma le Agaga (Ioane 14:6, 16:13), o loo ua faaaliga i tusitusiga a le Tusi Paia. O ia faaaliga o loo taumafai e ta'ita'iina le tagata i le amiotonu a le Atua, ma aveese mai i le faia o le agasala, o ala e ta'ita'ina sesē ai, a o se ala ua le ta'uamiotonuina ai le aloa auauna.

**Tatalo:** Le Atua e, ia faamagalō i matou ina ua fouvale i lau Afio. **Amene!**

### **Aso Lua – Mati 03: “O le Faamasinoga amiotonu a le Atua”**

**Tusi Faitau – Roma 2: 1–16** (*God's righteous judgment*)

**Matua – f. 5:** *“A e peitai o lou loto maaa ma le lē salamo, e te faatupu ai ea mo oe le toasa i le aso o le toasa ma le faaaliga o le faamasinoga tonu a le Atua...”*

I lea mataupu, e tusa ai ma le matua. O le tusi a Paulo, ina sei matuā faamanino lelei mo tagata lautele le aganuu a Roma, taulai tonu lava mo tagata faitau. E le'i taumafai le aposetolo e faatosina i latou, a o loo taumafai e faailoa le mea moni o loo tupu, e tusa lea ma lo latou faamasinoga, ua faia ma le *fa'afia-amiotonu*, a ua latou inoino i le alofa ma le agalelei a le Atua. Ua fetosoaina o latou loto i le *finauvale*, a ua leai se loto salamo. O le Atua o le alofa Ia, o loo uunaia le tagata ina ia faailoa Lona amotonu, i le lotomaulalo e taitai atu ai i le loto salamo.

**Tatalo:** Faafetai le Atua i lou agalelei, ina ua faaaliga lau amiotonu i le telegese o loo to'asa, a ua tele naua Lou Alofa. **Amene!**

### **Aso Lulu – Mati 04: “O le peritomeina moni o le loto”**

**Tusi Faitau – Roma 2: 17–30** (*True circumcision of the heart*)

**Matua – ff. 28, 29:** *“Auā e le o le lutaia le ua vaaia, e le o le peritome foi le ua vaaia, o le lutaia lava lea; o le peritome foi, ua i le loto lea, o loo i la le agaga lea, e le o i la le tusi; o lona viiga e le mai tagata, a e mai le Atua.”*

E tusa ai ma lea faitauga, o loo taula'i tonu le tusi a Paulo i talitonuga faa-lutaia. O tagata na filifilia e le Atua (Teueronome 7:6-12), na tuuina atu ai le tulafono, e faailoa ai le Atua ma lona paia. I lea talafaasolopito, ua maua ai e i latou le mitamita e faaaliga atu lo latou amiotonu e tusa ma le tulafono, o lo latou lea tagavai e faapelepele i ai, ma e sili atu nai lo se isi lava mea. Na tau'a e Paulo lea ituaiga amioga, o se gaoiga e faailoa atu ai; o i latou o tagata lutaia, ua latou faifai (blasphemy) i le Atua (f:24, Isaia 52:5, Esekielu 36:20).

O le sailiga o tagata mo le Atua, o se mataupu e afua mai i le loto. O lea upu o le “loto” o loo faatusa lea mo le tagata atoa, i le iloa o le upu moni e ola ai, ina ia le upulegaina ai le suafa o le Atua. O le taufaaoleole, na faamatalaina i le tusi o Ieremia 17:9, e le mafai ona foia lea ituaiga loto maaa, peita'i e mafai ona suia e le Atua, agai i se loto fou, ma le agaga fou ina ia iloa ai le Atua, o ia lava o le Alii (Esek 36:26, 38). O le peritome o se faailoga i le tino mo le feagaiga alofa faavavau a le Atua mo ona tagata filifilia (Ken. 17:1-14), o le tulafono foi e faamamaina ai o latou loto (Teu. 10:16). Po o le luataia po o Nuu ese, o le tulafono a le Atua e ao ona tausia lelei mataupu faavae uma. E moomia ai le loto ua peritomeina, i le loto mamā, loto faafouina, ma le amio ia le ta'ulegaina ai le Atua.

**Tatalo:** Le Atua o le alofa, ia faia se loto mamā mo i matou. **Amene!**

### **Aso Tofi – Mati 05: “E agasala uma lava”** (*All have sinned*)

**Tusi Faitau – Roma 3: 1–20**

**Matua – ff. 9e, 12a:** *“...lutaia atoa ma Eleni, o loo nofo sala i latou uma lava; faapei ona tusi, E leai se amiotonu, e leai lava se tasi, e leai se na te lagona, e leai se saili i le Atua. Ua latou o ese uma lava, ua leaga faatasi i latou...”*

E faapefea ona tatou iloa, ua le iloa i tatou? A aunoa ma se faailoga poo se ta'iala, ona lagona lea o loo ua aga'i i se ala e le o mautinoa. O lona uiga a aunoa ma ta'iala, e faapefea ona iloa le lelei ma le leaga, poo le leaga i le lelei? Mo tagata lutaia, o le tulafono a le Atua o se tuufatasiga o faailoga, i le tapasa o le amio lelei (moral compass), e ta'iala ai le amio tatau alo ese mai le amio sese. Mo Nuu ese, ua tusia i o latou loto le tulafono ina ia maua le amio tatau e agavaa mo le tulafono (Roma 2:15). Ua faamanino mai le naunautauga a le

apostetolo mo tagata talitonu i Roma, o le faatuatua i le faaolataga a Iesu, e faaolaina ai tagata uma ua le iloa, e tusa ma le alofa o le Atua na auina mai ai lona Alo, e faailoa le ala e laveaina ai i latou o loo sailia le ala tonu, ma faaolaina i e na le iloa (Luka 19:10).

**Tatalo:** Faafetai le Atua, i Lou auina mai o lou Alo e faailoa le ala mo i matou ina ia matou le fano i ala o le agasala. **Amene!**

**Aso Faraile – Mati 06: “O le amiotonu talu le faatuatua”**

**Tusi Faitau – Roma 3: 21–31** (*Righteousness through faith*)

**Matua – ff. 21, 22:** “*A o lenei, ua faaalua mai le amiotonu a le Atua, e le o i ai le tulafono, ua molimau i ai e le tulafono atoa ma le au perofeta; o le amiotonu lea a le Atua i le faatuatua ia Iesu Keriso, e oo i tagata uma, mo tagata uma foi o e faatuatua; auā e le eseese lava.*”

O Paulo sa avea muamua ma se tasi o ta'ita'i i tagata Iutaia ma sa ia sauaina le 'au Kerisiano. O le tagata poto i le tulafono, o loo ta'uamiotonuina o ia talu le tulafono. Peita'i, o loo ia faailoaina atu mo i latou o loo i le tulafono ma e o loo ua ta'uamiotonuina talu le faatuatua i le Atua e ala ia Iesu Keriso. E i ai manatu o nisi e sili atu o ia, nai loo isi tagata, ae leai! O le ana'ana i le tulafono, faatasi ai ma le faatuatua i le faaolataga ia Iesu Keriso. E le ua ta'uamiotonuina ea lena? Pe na tatou nonofo mau umi ea i le agasala? Manatua, o Iesu lava o lo tatou lavea'i sili.

**Tatalo:** Le Alii e, e le mafai ona matou manumalo i le agasala, pe afai e te le fesoasoani mai. **Amene!**

**Aso Toona'i – Mati 07: “Fa'atuatua o Aperaamo ma lona ta'uamiotonuina”**

**Tusi Faitau – Roma 4: 1–12** (*Abraham's faith and justification*)

**Matua – ff. 3, 11e:** “*Auā se a ea ua fai mai ai le Tusi? Na faatuatua Aperaamo i le Atua, ona ta'ua ai lea ia te ia e fai ma amiotonu...ina ia avea o ia ma tamā o e faatuatua...*”

Na silafia e le Atua o le a mulimuli Aperaamo i lana poloaiga (Kenese 17:1), ma faataunuu mea uma e tusa ma lana fetalaiga. O le usiuitai la ma le faatuatua o Aperaamo, faatasi ai ma lona lototele e faalagolago i le Atua ma lona faasinoala, i se faamoemoe matagofie o le a tapenaina e le Atua mo ia. O lea na fai ma leo e lagona pea e le Atua i lona finagalo, i le faaolataga e ala i lona Alo pele, o Iesu na iloa manino ai le faatuatua. O lea fo'i na fai ma molimau pupula mo Aperaamo lea lava faatuatua. E ui e le tatau ona atoatoa ia Aperaamo le faatuatua, peita'i ane, o Aperaamo o le faatusa o le Atua, o se tofiga e tusa ma le amiotonu a le Atua.

**Tatalo:** Fesoasoani mai le Atua e, ia matou usiuita'i ma faatuatua i lou Alo o Iesu Keriso. **Amene!**

**AUNU'UA MA LE AIGA MONI** (*Exile and home*)

**Tuli'esea** (*Driven away*)

**Aso Sā – Mati 08: “Ua tulua mai le faatoaga”** (*Banished from the garden*)

**Tusi Faitau – Kenese 3: 8–24**

**Matua – ff. 23, 24:** “*Ona tulua ai lea o ia e le Alii le Atua ai le faatoaga o Etena, ia galue i le elelee na faia mai ai o ia. Ua ia tuli atu lava ia Atamu; ua ia tofia foi kerupi e nonofo i le itu i sasae o le faatoaga o Etena, ma le pelu afi mumū, o loo feliiuiui e leoleo ai le ala i le laau o le ola.*”

O le a amatalia lenei vaiaso i se iloiloga mai ni auala o loo faailogaina ai tala o tagata ua tuua o latou aiga e ala i le Tusi Paia. O le tele o tala e masani ona faailoa mai ai se malosiaga o ni mea na tutupu. I le tele o nei faamatala ma itu o tala taitasi i lea ulutala, mai le tuli ese, se ia oo ina toe faatasia ma le aiga. O ni tala e moomia ai le toe faaleleia atili, e tusa ma talaaga o tala. Peita'i, o le tala lava i le ulua'i tagata i se faatoaga. O loo faamatalaina ai le tulaga o le tagata e uiga i le soifuaga. E feagai ma galuega mamafa, e tusa lea ma le galue malosi. O le lu'itau e ono tutupu ane i le olaga, e pei o le pologa, mafatiaga ma le feitagai e lalagaina ai le feeseeseaiga i le va o le tagata ma le isi tagata, ua

tulia ese ai mai le aiga moni. E pei ona tulia ese ai o Atamu ma Eva ina ua le usita'ia le faatonu a le Atua. E ui la i lea tulaga, peita'i o le naunautauga, **“o le toe fo'i lea i le aiga”**.

O le naunau i le toe fo'i, o se faamoemoe o loo ua toe fia maua se olaga saogalemu, filemu, ma le sa'olotoga. O lenei vaiaso ma lo tatou faitauga, a o folau i le lagi ma, ma le soifua ua maua i le alofa o le Atua. E tele ona feagai pea le tagata ma faafitauli ese'ese e tutupu pea. A o lea tala ua aumai ai se valaaulia e aga'i pea i luma la tatou faigamalaga. E tusa lava po a mea e tutupu e ono suia ai le lalolagi na foafoaina mai i lona tulaga matagofie. Pe taumafai foi e ta'ita'i ese mai i tatou i o tatou aiga moni. E le aveesea ai le fuafuaga alofa o le Atua e ala i le faaolataga, o le manumalo o Iesu Keriso i le agasala.

**Tatalo:** Iesu e le filemu, ia faatupuina lo matou mutimutialofa i lau Afio, e matou te manumalo ai e faavavau. **Amene!**

**Aso Gafua – Mati 09: “Se a le mea ua e faia?”** (*What have you done?*)

**Tusi Faitau – Kenese 4: 1-16**

**Matua – f. 9:** *“Ua fetalai atu le Alii ia Kaino, O fea o i ai Apelu lou uso? Ona tali mai lea o ia, Ou te lei iloa; o a'u ea le leoleo o lo'u uso?”*

I le feagai ai pea ma taua po feeseeseaiga e le ma'alofia, o fea e tatou te maua ai se fa'amoemoe va'aia? O lo o i ai i lea faitauga se faailoga e le'i fa'atauaina pe malamalama ai foi Kaino i ala o le Atua, ae po o le a lava le mafuaga, e toetoe lava a i ai le tala fa'asolopito na amata mai ai le feitaga'i. Ua aumaia i lea faitauga le lagona fesili faapea, afai e te faia se galuega lelei, e le talia ea oe? Afai foi e te musu e fai le amiotonu, pe agalelei ina oe? Ua taatele lagona faapea o le **“faiva alofi lima o le tagata o le sesē”**. O le sailiga o se auala e toe foi ai i le aiga moni. E mafaufau pe faapefea ona faalavelave le tiga i le olaga; ae pe fa'apefea ona pulea ia ituaiga lagona?

**Tatalo:** Ia faamalositia la matou faatuatua i lau Afio, e tupu a'e ai le agagalelei ma le alofa. **Amene!**

**Aso Lua – Mati 10: “O se lapataiga iloa”** (*A visible warning*)

**Tusi Faitau – Esekielu 12: 7-15**

**Matua – ff. 7e, 11:** *“...na ou eli le pa i le afiafi i lo'u lima; na ou tautuu atu ai i le pouliuli, ma ou faafuata i lo'u ua i o latou luma...Fai atu ia, O a'u nei o le faailoga ia te outou; e pei ona ou faia, e faapea ona faia ia te i latou; e o faatagataotaua i latou i le tafeaga.”*

O le fa'amanatu a le perofeta o Esekielu e tusa lea ma le pule silisili ese a le Atua. O le silisili ese a le Atua e fa'aalia ina ua fouvale Isaraelu i le Atua. E pei ona ta'ua *“o e ua ia te i latou mata e vaai, a ua latou le vaai, ua ia te i latou taliga, a ua latou le faalogo”*. O le musu faaleloto, o se autu faaauau pea i tusitusiga a le Feagaiga Tuai. E faapei o valoaga a perofeta i le taumafai lea e ta'ita'i le nuu a Isaraelu i le Atua, ina ia maua ai le ola. O lea na afua ai le naunautauga a Esekielu, e tusa lea ma le lapataiga mata'utia e le mafai ona maalofia mo Ierusalem ma ona tagata, ona o le lē faalogo mo se suiga o latou loto. A tatou manatunatu lelei i le luitau lea ua aumaia e Esekielu. E ono faalia ai se gaiouga e le na ona faailoa, ae ao foi ona saili pe faapefea ona faaalia le alofa o le Atua. Pe faapefea ona sailia metotia e nofofale ai i lagona o tagata le finagalo o le Atua e pei ona faailoa mai e Esekielu?

**Tatalo:** Le Atua alofa e, mo le sailiga o lagona fatufatua'i mo le atiina'e o le ola faatuatua a ou tagata, fesoasoani mai i le taumafai a ou tagata. **Amene!**

**Aso Lulu – Mati 11: “O le taunuuga o le agasala”** (*The consequence of sin*)

**Tusi Faitau – 2 Tupu 17: 5-23**

**Matua – ff. 22, 23:** *“Na savavali foi le fanauga a Isaraelu i agasala uma a Ierepoamo na ia faia, na latou le te'a ese ai lava. Ua oo ina tuueseina e le Alii ia Isaraelu ai ona luma, e tusa ma lana afioga i ana auauna uma le au perofeta. O lea na faatafeaina ai Isaraelu ai lo latou nuu i Asuria, ua oo mai lava i le aso nei.”*

I lea manatu autu, ua aumaia ai se fesoasoani e tusa ma tala faapitoa e tau aao ai se auivi mo le olaga e mafai ona faauigaina ai mea tutupu i le lalolagi. O nei faamatalaga

faalauaitetele o le taumafai e fausia le malamalama e uiga i le Atua, ma tiute tauave a le tagata ma lona taunuuga. O lea faamanatu taua e mafai ona avea ma mafutaga faaaauu pea a le Atua ma ona tagata. O le faitauga la o lenei aso, ua atagia mai ai le tuulafoaina o le faavae mautu. O le Atua o Isaraelu, lea na laveaiina ona tagata mai le nofo pologa ma tausia i latou, saili ina ia latou faatuatua ma ususita'i ina ia maua le tau. A o lea ua le faalogo ma liliu ese Isaraelu mai lo latou faavae. Ua musu Isaraelu i le ola mafuta ma le Atua. Ua latou filifilia e mulimuli i o latou lava manaoga. O le taunuuga o lenei filifiliga, "*O lea na faatafeai ai Isaraelu ai lo latou nuu i Asuria, ua oo mai lava i le aso nei.*" O se taunuuga na amata mai i le mautonu, ma le manao tele.

**Tatalo:** Le Alii e, foai mai le lototele ia faatumauiina ai pea le ola foa'i e pei ona e faatinoina. . **Amene!**

**Aso Tofi – Mati 12: "Sailiga o le mana" (Chasing power)**

**Tusi Faitau – Kenese 11: 4–9**

**Matua – f. 4:** "*Ona latou fai ane lea, O mai ia, ina tatou fai ia o se aai, ma se olo, ia oo lona tumutumu i le lagi, ia tatou faia foi se mea e ta'ua ai i tatou, ne'i faataapeapeina i tatou i le fogaelele.*"

O lea faitauga, ua aumaia ai uiga o le popole, vaivai, fememea'i, masalosalo, ma le pule. O le faitauga o loo tulimata'i ai se taufetuliga ua le mautonu i se taunuu mautinoa. Peita'i, o Iesu ma lana auunaga. Ua faamanino mai ai le auunaga sili. Ua na faamalolo i e mama'i, na mulumulu i vae, ma savalia pa pupuni o le faailoga tagata, ma taumafai e aoo tagata uma i aao alofa o le Atua. O Iesu o se faata'imuaga matuinoa lea i le taufetuliga o le 'au faatuatua. E le naunau i le pule, ae faasilisili le alofa saili, le alofa silisili ese o le Atua (Ioane 3:16). Ua filifili ai e Iesu le auuna mo le togiola a le lalolagi, ia maua ai le mana(power) (Mareko 10:45).

**Tatalo:** Le Atua amiotonu e, faamalosia i matou ina ia auuna ma faatuatua. **Amene!**

**Aso Faraiile – Mati 13: "Faamoemoe mai le loto vaivai" (Hope out of despair)**

**Tusi Faitau – 2 Nofoaiga Tupu 36: 2–23**

**Matua – f. 20:** "*O e na totoe na sao i le pelu na tafea e ia i Papelonia; sa i ai latou ia te ia ma ona atalii e fai ma auuna ua oo i ona po o le pule o le malo o Peresia.*"

Ua faaalai mai i lenei faitauga se fesili, pe faapefea ona tu'ufaatasia e le tagata ni faalavelave tutupu, e iloa ai le ola saogalemu ma le Atua? O tagata Isaraelu ua le iloa lo latou ala, ona ua le amanaiaina le finagalo o le Atua. Ua faatafeai ai i latou i Papelonia mai lo latou lauelele na faafailele ai o latou olaga. Ae, po o a lava faafitauli sa feagai ma Isaraelu, e oo foi i le loloto o le le iloa o se faamoemoe. Mo Isaraelu lava ia ma lea vaiata, na latou maua le faamoemoe e ala mai i le Atua, i a Kuresa le tupu o Peresia. O lea toefuataina na maua ina ua mavae tausaga a o faaunuu ai Isaraelu. E tusa lava po a lu'itau ma faigata, e tumau pea le alofa auai o le Atua; pe afai o loo tuliloaina lona alofa lavea'i ma le faatuatua.

**Tatalo:** Le Atua o le alofa mutimutivale, a'oa'o mai ia matou faia lou finagalo. **Amene!**

**Aso Toona'i – Mati 14: "Meaai i le malaga" (Food on the journey)**

**Tusi Faitau – Numeru 11: 1–23**

**Matua – ff. 18e, 20e:** "*...auā ua outou fetagisi i fofoga o le Alii, o loo faapea mai, O ai se na te aumaia ia te i matou o manu matou te aai ai? auā sa lelei i matou ina o i Aikupito; o lea, e avatu ai e le Alii o manu ia te outou, tou te aai ai...seia alu ifo ia i o outou isu, ma ave ma mea e inosia e outou; auā ua outou ino'ino i le Alii...*"

O le soifuaga lenei o loo fefiloi ai mafaufauga fa'alenuola (*tendency*), tete'e (*adverse*), ma le faitio (*those watching for fault*). O lenei uiga o lo'o saili'ili ai pea le tagata i natura o le soifuaga e tala feagai ma le ola. Ua fa'amanatu mai i lenei faitauga le fanauga a Isaraelu o lo'o i le toafa, ua latou fetagisi ma muimui i le Ali'i. Ua le fa'amalieina o latou mana'o e tusa ma le manai po o vavega e tusa ma le ta'ita'iga a le Atua. Ua sailia e Isaraelu se

taunu'uga o lo latou tauiviga, ae galo ai fa'amanuiaga sili e tapena ma saunia e le Atua i soo se taimi. O le Atua e auai i lo latou fia aai ma fia feinu. O le Atua e fa'amalieina le ola tauivi ma ta'ita'iina ona tagata i ana fa'amanuiaga sili.

**Tatalo:** O lo'o i lau Afio o matou ola ma o matou fa'amoemoega; ia foa'i mai ia te i matou au fa'amanuiaga e tatau. **Amene!**

### **AUNU'UA MA LE AIGA MONI** **O le ala i le aiga moni** (*The way home*)

**Aso Sā – Mati 15: “O le aiga moni o loo i ai le loto”**

**Tusi Faitau – Teueronome 6: 1–12** (*Home is where the heart is*)

**Matua – ff. 6, 7:** *“Ia i ai foi i lou loto o upu nei ou te fai atu ai ia te oe i le aso nei. Ia e matuā a’oa’o soo ai i lau fanau, ma ia e tautalatala a’i, pe a ē nofo i lou fale, pe a ē savali foi i le ala, pe a ē taoto, pe a ē tulai foi.”*

O le nofo faaunuua mai le aiga moni po o le atunuu, o se autu o loo faaogaina ma e talanoaina i tusitusiga o le Tusi Paia. O mafatiaga o le fa'ate'aeseina mai i se aiga, mai Etena agai i le Nuu folafolaina, ua tele ai mafaufauga ma talitonuga. Sa aofa'i ina lea mataupu i le manatu o Aokusitino e tusa ma lea manatu autu i se lagona e faapea, *“human heart is restless until it rest in God”*. O lea manatu na afua ai mafaufauga sailiili pea, ona o le aiga o loo i ai i se isi nofoaga, e lē faale-lalolagi, a e faale-lagi faatasi ma le Atua. E faapefea ona ta'ita'ia i tatou i se taunuuga lelei o lenei soifuaga, pe afai e le o moni lenei nofoaga, pe ua tatou te le o i ai foi ma le aiga moni? Afai foi ua tatou vaavaai o le Atua o loo i se isi nofoaga, pe ua tatou le maua ea le fiafia i lenei lalolagi ma le taimi nei. Ua le faamaoni ma sili atu le fesoasoani i le taliaina o le aiga moni o le loto lea? *“Ia i ai foi i lou loto o upu nei ou te fai atu ai ia te oe i le aso nei; po o fea lava tatou te nonofo faaunuua ai, ma i ai i se nofoaga e lē tumau. O le Atua o loo savali faatasi pea ma i tatou. E lotolotoi le Atua i soo se mea lava e tatou i ai.*

**Tatalo:** Le Tama e, ia mausali i o matou loto lau Afio i aso uma, ia matuinoa ai o loo matou i ai lava i lo matou aiga moni. **Amene!**

**Aso Gafua – Mati 16: “E o’o lava i manu iti e latou te maua se fale”**

**Tusi Faitau – Ieremia 29: 10–14** (*Even the sparrow finds a home*)

**Matua – f. 14:** *“E maua lava a’u e outou, o loo fetalai mai ai le Alii; ou te faafosia la outou tafeaga, ma ou faapotopotoina outou ai nuu uma, ma mea uma na ou tulia ai outou, o loo fetalai mai ai le Alii; ou te faafosia foi outou i le mea ua ou faatafea ai outou.”*

O le faaogaina o le upu 'faapotopotoina' i se nofoaga o loo feagai ma taua ma sauaga. Atonu o loo aumaia ai se faamalosi ina ia lotu tetele, ma tauasoa faatasi mafatiaga ma o latou tiute. O se upu e taumfai e uunaia le lotu, aua e oo lava i manu iti e latou te maua se fale e mapu ai. E mafai foi ia ona maua e tagata uma o loo sailia le filemu e ala i le upumoni. Pe mafai ea ona tatou faapea atu ma le mautinoa, a o tatou i ai i se nofoaga feteenai ma le le matuonu? O le se mea ua finagalo i ai le Atua e tatou te faapotopotoina ma toto i se tausaga o i luma?

**Tatalo:** Le Tama e, e matou te moomia lava lou fesoasoani ina ia matou lotu tetele e ofoina se fesoasoani mo soo se tasi. **Amene!**

**Aso Lua – Mati 17: “Manatua le mea sa i ai”** (*Remembering how it was*)

**Tusi Faitau – Salamo 137: 1–4**

**Matua – ff. 3, 4:** *“Aua na inoino mai ia te i matou i lea mea o e na ta'ita'i ia i matou i le tafeaga, ia matou pepese i upu o le pese; o i latou foi na faatiga mai ia i matou, ua inoino mai ia olioli, ua faapea mai, la outou pepese mai ia i matou ni pese a Siona. Pe faapefea ona matou pepese le pese i le Alii i le nuu ese?”*

O le upu faapotopototo, e masani ona faalogo ai i totonu o soo se mafutaga, sosaiete, ma faalapotopotoga. E pei ona masani i le faaogaina e faapea, *“Ua tatou potopototo/Ina*

faapotopoto mai ia". E ui lava i lona faaogaina. Ae o loo galo lava i le tagata poo tatou le uiga loloto ua ala ai ona faapotopoto se mafutaga, aiga, nuu, ekalesia, e oo lava foi i totonu o faiga malo. O lea uiga loloto o le faapotopoto faatasi, o loo aumaia ai se feau taua o le tu'u faatasi o tagata eseese mai se isi nofoaga. Ua faapotopotoina ina ia avea ma se aiga. Peita'i, i lea Salamo o loo aumaia ai se fesili, "*Pe faapefea ona matou pepese le pese i le Alii i le nuu ese?*" Pe faapefea? O le pese o se tasi o gaioiga e aumaia ai le lagona o le lototele, aumai ai fo'i ma faamafanafanaga; i taimi loloto o mafatiaga mo le togiola.

**Tatalo:** I le feagai ai i mafatiaga ma le le mautonu, fesoasoani mai le Alii e, ia faat mauaina la matou ola talitonu i lau Afio mo 'Au faamalologa. **Amene!**

**Aso Lulu – Mati 18: "O le nofoaga filemu o le agaga" (The spirit's tranquil home)**

**Tusi Faitau – Faaaliga 1: 1-13**

**Matua – ff. 10, 11:** "*Na ou i le Agaga i le aso o le Alii; ona ou faalogo ai leai o'u tua i le leo tele e pei o se pu, ua faapea mai, "O mea e te vaaia ia e tusi i se tusi, ma avatu i ekalesia e fitu o Efeso, ma Semurana, ma Perekamo, ma Tuatira, ma Sara-taisa, ma Filatelefaia, ma Laotikaia."*

So o se tamaoagia lautele, o loo taumafai e tu'uina mai se atiina'e mo se faamalologa i totonu o faafitauli. O lea se tusi fesoasoani ma se fautuaga i le mafaufau matua tele mo se faamalologa. O lea foi se toe saililiga o faamanuiaga o le taumafai e aveese mai i tatou lava, mai le lagona o le polepolevale (*removing ourselves from everyday stresses*) i aso ta'itasi, i le faaavanoa ina o le mafaufau i le taumafa e faapaleni le ola(life) ma le galue(work). O le uiga o le manatu, e mana'omia i le ola faa-le-agaga o lea fo'i ola paleni.

E i ai le avanoa o le ola tiga i totonu o le ola galue/gaioia. E ono punitia ai le mafaufau i le moomia ai o le filemu, po o le faia o se avanoa i se nofoaga tuufua i le toe saili ai o se mafaufau po o le malosi (**Mataio 1:35**). O le tatalo o se gaioiga e mafai ona maua ai le leo filemu, e ala i le galuega a le Agaga Paia i le toe faamallosia o tatou manatu mo se taunuuga manuia. O le molimau a Ioane, ina ua ave faapagota o ia i le nuu o Patamo i se faiga faamalosi "o le toe fo'i/retreat". Petia'i, o lona i ai i lea nofoaga, o se avanoa na maua ai se vaaiga mamao i se faamoemoe (vision of hope). E ui lava la ua taumamao o ia ma lona faamoemoe, ina o i ai o ia i le falepuipui. Ae o loo ua ia maua ai se faamoemoe mautinoa i mea e ono tutupu i le lumanai. Atonu o se vaaiga fou, a o se avanoa ua faaaliga ai gaioiga poo taunuuga mo tagata ta'itoatasi.

**Tatalo:** Le Atua e, faafetai ona o loo tu'u avanoa mai pea lau Afio ina ia matou toe mafaufau pea i lo tatou va feagai ai. **Amene!**

**Aso Tofi – Mati 19: "Aiga po o le nofo 'ese" (Home or away)**

**Tusi Faitau – 2 Corinthians 5: 1-10**

**Matua – ff. 6, 7:** "*O lenei, ua matou loto tetele e le aunoa, ona ua iloa, a o matou o nonofo i le tino, ua nofo eseese i matou ma le Alii, auā i le faatuatua ua matou savavali ai, a e le o le tino mai o mea."*

E i ai tu ma aga masani i le Ekalesia Katoliko Roma e ta'ua o le Tausaga paia (*holy years*). O le faamoemoe o lea faiga i le faamallosia ai o le ola faaleagaga, ina ia tuputupu pea e ala i le faatuatua i le Atua. O le faamanatuina fo'i o lea tu, o le sakarameta o le faamanatuga (*sacrament*). Talu ai ona o lea faiga, o loo faalauiloa ai foi se gaioiga o le toe faafou (*renewal*), so'o se faalapotopotoga faatuatua i le lalolagi atoa. O lea faatinoga i le faapaia ina e faapei o se tagata malaga faaleagaga o loo faalagolago i fuafuaga o le Atua i le lumanai, ma le faatuatua i le auai faatasi o le Atua i taimi faigata. O loo faamamafaina lea faamoemoe i le faailoa atu o le agalelei, ma le alofa o le Atua i le lalolagi (*spreading hope, kindness, and God love to the world*), i se sootaga loloto fa'ale-Atua (*deepening relationship with the Divine*). E mafai ea ona tatou ususitai i le Agaga Paia, ina ua ave'esea mai i tatou i lo tatou lava laufanua; po o le "faataapeapeina (*exile*)"?

**Tatalo:** I taimi loloto o faigata, Le Alii, ia avea i matou ma se tasi o fesoasoani i e ua moomia le fesoasoani. **Amene!**

**Aso Faraile – Mati 20: “Tagata ese i lo tatou matafaga”** (*Strangers on our shore*)

**Tusi Faitau – 1 Peteru 1: 1–9**

**Matua – ff. 1, 2:** “O Peteru, o le aposetolo a Iesu Keriso; i e ua āumau, ma ua faataapeapeina i Pono, ma Kalatia, ma Kapatokia, ma Asia, ma Pitunia, o e ua filifilia e tusa mona muai silafia e le Atua le Tamā, i le faapaiaina e le Agaga, ia iu ai i le gauai ma le saaluuga o le toto o Iesu Keriso.”

I se vaaiga i le lalolagi ma ona suiga i lea tausaga ma lea tausaga. Ua faitau aofai tagata ua tuua o latou lava laueleele ma aumau solo i lea atunuu. O nisi foi ua tuua faamalosi ona o va fetaua'i o malo, ma faoa ai o latou laueleele. O nei suiga ua taumafai nisi e saili ai se saogalemu ma le faamoemoe ina ia faatupulaia le alofa tunoa ma le filemu. O le tulafono tau i laueleele po fanua, e ao ona i ai le amiotonu ma le alofa.

**Tatalo:** Le Alii e, foai mai le malosi ma le lototele i le fesoasoani atu mo nisi o loo moomia le fesoasoani. **Amene!**

**Aso Toona'i – Mati 21: “Aga'i i le nofoaga aumau ai”** (*Homeward bound*)

**Tusi Faitau – Ione 14: 1–6**

**Matua – f. 2:** “E tele mea e nonofo ai i le maota o lo'u Tamā; ana leai, po ua ou fai atu ia te outou, ou te alu e sauni se mea e nonofo ai outou?”

O fea o i ai le maota o le Atua o loo taua e Ioane; pe faapefea foi foliga o lea maota? O loo ua toatele pea nisi e fesiligia pea taunuuga o le ola, pe a mavae le oti. O le faatapula'a o le gagana o le taumafai e faia se tala faatusatusa. E pei o le lagi, o se vaaiga i se nofoaga e malolo ai le tagata i gasologa masani o le soifuaga, e mapu atu ai le tagata e faavavau ma le Atua. E taofi o se auala faigofie mo le 'au faatuatua uma, o se nofoaga i le taunuuga o mea uma. Po o le a lava le taumafaiga o le tagata i lenei lalolagi, ae o loo tulimata'i pea le vaai ma le lagona e fia i ai le maota o le Atua. O se nofoaga ua faamautinoa mai e Ioane, e tatau ona saofaga ai tagata uma o e faatuatua ma talitonu i le Atua Soifua.

**Tatalo:** Le Atua e, fesoasoani mai ina ia matou taumafai e puipuia ma faamatagofie lau foafoaga. **Amene!**

## O LE TALALELEI IA MATAIO

**Leo o le Vaiaso Paia: mai le motu o tagata fiafia i le tatalo faito'atasi**

*(Voices of Holy Week: from cheering crowd to lone prayer)*

**Aso Sā – Mati 22: “Aga'i i le pogisa”** (*Towards the darkness*)

**Tusi Faitau – Mataio 16: 21–28**

**Matua – f. 21:** “Ona tali mai ai lea o Simona Peteru, “O oe le Keriso, o le Alo o le Atua soifua.”

Na faaauumia Iesu ia Peteru e tusa ma lona tali, aua ua na iloa faaliga mai i lona Tama o i le lagi. Peita'i, na faafuase'i ona lafoia le ataata o le lagona fiafia, ina ua faapea ifo Iesu, e tusa ma le molimau a le evagelia o Mataio 16:21 “e tatau ona alu o ia i Ieruselema, e faatigaina foi i mea e tele”... o se vaega fou i le tala o le Talalelei. A o se oototoga mamao e uiga i le satauro, faailoa mo le 'au soo e tatau ona aga'i i luma ma le mausali. O le aapa atu i faamanuiaga e tatau ona feagai ma mafatiaga, faanoanoaga, ma aga'i loa i le satauro. O se i'uleo(echo) e u'unaia le ola galue aga'i i faatinoga (action).

I le vaaiga o le satauro o se taulaiga matautia o le faalumaina, tiga, ma le faanoanoa. Na faaalii i tusitusiga o fai-Evagelia uma e 4, na silafia e Iesu le oo mai o nei faafitauli. Peita'i, e le'i taliaina e Iesu nei mafatiaga, pe na tau sailia foi se auala e taofia pe alo ese mai ai. Ae ua aga'i lava Iesu i luma ma faafesaga'i mo lea faafitauli, i se loto mama, ma le agaga ua mausali. O le aveva ma se tasi e fia mulimuli ia Iesu. E moomia ai le lototele, ma le onosa'i. E ui sa gatete le 'au soo e tusa ma fetalaiga a Iesu. Ae na maua lo latou faamalosi i le tali a Iesu, ia amo lou satauro ma mulimuli. O se ala taua mo le tautinoga o loo faamamafa ai le sailia nisi e fia aveva ma uo a Iesu.

**Tatalo:** Iesu le Alii, fesoasoani mai ina ia manino ou ala, i le fia aveva ai ma soo moni. **Amene!**

**Aso Gafua – Mati 23: “Alo o le tupu ma perofeta” (Prince and prophet)**

**Tusi Faitau – Mataio 21: 1-11**

**Matua – ff. 2, 6, 7:** *“Ua faapea atu ia te i laua, “Lua te o atu i le aai ua humanai oulua, ona iloa atu loa lea e oulua o le asini ua nonoa, o lana tama foi ua faatasi ma ia; lua te tatalaina, i le ta’ita’i mai ai ia te au...Ona ai lea o ia soo, ua faia foi e i laua pei ona fetalai atu ai o Iesu ia te i laua. Ua la ta’ita’iina mai foi le asini ma le tamai asini, ua faaee i ai o latou ofu, ma faatietie ai o ia..”*

O le tala a Mataio e uiga i le Aso Sa Laupama e amata lava i se auala maopoopo. O le ‘au soo, faatonuga, asini, faailoaina o tusitusiga o le Feagaiga Tuai ma se nofoa faatavalevale mo Iesu. O loo aumaia ai se faamoemoega filemu; a o se fiafia ma le naunau. Aisea ua faailoa ai lenei tala fiafia? O ai Iesu i le manatu o tagata? E lua ni tali o loo taua e Mataio. Muamua, o Iesu e tau lona gafa i le tupu(f:5); le Alo o Tavita(f:9). O le faamoemoega lea ma manaoga o tagata e tusa ma lo latou alalaga ‘Osana’, ia faaola mai, lavea’i mai, ma faasa’oloto i latou. Lua, ma o le vaega mulimuli foi lea. O Iesu e sili atu lona tulaga o ia o se Perofeta mai Nasareta i Kalilaia(f:11). O lea tulaga e pei o le tele o perofeta, e feagai ma tagata maualuluga i Ierusalem. E fetaiai foi ma faigata ma tiga, o se vaaiiga e amata i le fiafia ma faaiiina i le faanoanoa.

**Tatalo:** Le Alii e, ia faatuputeleina le fiafia i o matou loto e faailoa lau Afio o le tupu ma o le perofeta silisili. **Amene!**

**Aso Lua – Mati 24: “O tama foi ua alalaga ‘Osana’”**

**Tusi Faitau – Mataio 21: 12-16 (Children were singing ‘Hosanna!’)**

**Matua – ff. 12, 14, 15e:** *“Ua ulufale atu Iesu i le malumalu o le Atua...ma na fuli i lalo laulau a e na sui tupe...Ona o mai ai lea ia te ia le malumalu o e tauaso ma e pipili, ua na faamalolo ia te i latou...o tama foi ua alalaga i le malumalu, ua faapea ane, “Osana i le alo o Tavita”; ona matuā tiga ai lea o i latou.”*

O le malumalu o Ierusalem o loo i ai se avanoa tele. E faapea foi i totonu o le malumalu, o loo ua tele avanoa faaopoopo, lotoa, faapaologa, faatasi ai ma puipui faatamilo i le nofoaga atoa pe a ma le selau mita i itu ta’itasi. O le tele o ia avanoa, sa avea ma ala e faapotopoto ma feiloai ai toatele o tagata, e faia o latou pese, ma latou feiloai ai ma o latou uo masani, ma maua ai nisi uo fou. O le tele o ia avanoa, na faailoa ai e Iesu, ia faamuamua ma faasilisili ai le Atua. O avanoa uma foi ia i ai le alofa mutimutivale mo i latou o loo tauivi ma mafatia. O le faailoaina o le viiga sili, ‘Osana’ i le Alo o Tavita, e le o le ala i Ierusalem, a o le agaga ma loto o tagata o loo faapotopoto i le aai.

O le malumalu o le faavae malosi lea o le ‘au ositaulaga sili i Ierusalem. Na latou faitauina Iesu o ia o se faataitaiga le lelei, o se tagata o loo taumafai e faamautu ana aoaoga mo ia lava. Peita’i, o nei teena, sa lagona ai leo a tamaiti o loo pepese ma alalaga leo tele ‘Osana’. Ua siitia ai faapei o se galu o loto o tagata ma latou lagolagoina ai Iesu ona ua latou manaomia lea faaolataga.

**Tatalo:** Iesu e, foi mai le lototele e lagona ai i’uleo o ē moomia le fesoasoani. **Amene!**

**Aso Lulu – Mati 25: “Viiga o lima ma loto” (Praise of hand and heart)**

**Tusi Faitau – Mataio 26: 1-16**

**Matua – ff. 7, 10, 12:** *“Ona sau ai lea ia te ia o le fafine ma le fagu alapasa ua i ai le suauu manogi tau tele, ona liligi ai lea e ia i lona ao a o taoto ia e taumafa...ona faapea atu ai lea o ia ia te i latou...Auā o le mea lelei ua na faia ia te au nei...Auā ua liligi e ia lenei suauu manogi i lo’u tino e fai ma faataimuaga o lo’u tanuga.”*

O le tala a Mataio, e le o ta’ua ai le igoa o le fafine, ma e le’i faailoaina foi se leo a lenei fafine. Ae o lana faatinoga po ona gaoiga ua leotele atu lea nai loo le taumafai e faamatala. Po o fea lava e tala’iina atu ai le Talalelei, o gaoiga uma na ia faatinoina, o le a faailoa atu ai lava (f:13); ua faamaonia. O loo ua faailoa mai i lea tala se tasi o gaoiga o le ola faitaulaga. E uunaia faatasi ai ma i latou e fia mulimuli ia Iesu, e moomia ona ona mulimuli ma le loto atoa faatasi ma le tagata.

O le upu Mesia, o lona uiga i le gagana Eperu “faauuina e le Atua”. O le uaina la o le fafine o Iesu o se faailoga ma le faamoemoe i le faatunuina e Iesu o lona matafaioi. Ua faataua e Iesu lea faatinoga e tusa ma le mamalu, fiafia, agalelei, ma le faatuatuaina. O se sauniga o le falelauasi, i le tapenaga a o le i oo i puapuaga a ma le maluu o Iesu. Ua tau faaiuu le malaga a Iesu i le lalolagi, a o lea ua ofo e le fafine se meaalofo sili e faailogaina ai o ia lava i le Mesia, e tusa ma le faaaloalo, lagona mafatia, ma lona tatalo leai o se leo, o se meaalofo matagofie (f:10).

**Tatalo:** Le Alii e, o le faafetai, viiga, ma faamanu ia tumau lea i lau Afio e faavavau. **Amene!**

**Aso Tofi – Mati 26: “O le toe tausamiga” (Last supper)**

**Tusi Faitau – Mataio 26: 17-30**

**Matua – ff. 25, 26:** *“Ona tali mai ai lea o Iuta le na faalataina ia, ua faapea mai, Rapi e, o a’u ea? Ua fetalai atu o ia ia te ia, “O lena lava.” O loo latou aai, a e tago Iesu i le areto, ua faafetai, ona tofitofi ai lea, ma avatu i le au soo, ua faapea atu, “Ina tago ia, ina aai; o lo’u tino lenei.”*

O le talisuga mulimuli o se vaaiga i le faamalumu o le Atua i ona tagata. O se taumafataga e manatua ai le faasaolotoina o Isaraelu mai i Aikupito. E ui i le itiiti o se faamatalaga a Mataio e uiga i le toe paseka, peita’i o loo tulimatai le vaaiga a le evagelia le mea o le a tupu ia Iesu. Na amata i le faalataina, sosoo ai lea ma le faia o le paseka, ona faataunuu lea e Iesu le meaalofo sili mo le lalolagi e tusa ma fuafuaga a le Atua.

**Tatalo:** Faafetai tele le Alii, mo lea faamanatu ina ia manatua pea lo tatou feagaiga o le alofa. **Amene!**

**Aso Faraiile – Mati 27: “Ua faataapepeina le lafu” (Fearful flock)**

**Tusi Faitau – Mataio 26: 31-35**

**Matua – ff. 31, 32:** *“Ona fetalai atu ai lea o Iesu ia te i latou, “E tausui outou uma ona o a’u i lenei lava po; auā ua tusia, Ou te taia le leoleo mamoe, ona taapeape ai lea o le lafu mamoe. A e a mavae lo’u toe tu, ona ou muamua atu ai lea ia te outou i Kalilaia.”*

O le tala a Mataio e uiga i le Vaiaso Paia, o loo taumafai e faaititia ma faamaoopoopo lea tala e uiga i le mau ia Iesu. O lea vaaiga e aga’i i le ‘au soo, sa faauuina i Petania, ma latou talisua faatasi ma Iesu. Peita’i, o se vaaiga faanoanoa ua taapeape le ‘au soo ina ua faafesaga’i Iesu ma ona puapuaga. E ui i lea vaaiga o le faiaina ma le fefe. Ae na faailoa lava i lea vaaiga le fetalaiaga faamaoni o Iesu e uiga i le faataapepeina o le lafu. E toe faapotopotoina lava ma tu’ufatasia i le taunuu ai o fuafuaga o le Atua. *“E tausui outou uma ona o a’u i lenei lava po... ona taapeape ai lea o le lafu mamoe. A o le toe tu mai o Iesu, ua toe ta’ita’iina ai le lafu mamoe i le lotoa ma le saogalemu. A e a mavae lo’u toe tu, ona ou muamua atu ai lea ia te outou i Kalilaia.”* O se vaaiga e toe fuataina e Iesu le ola i le faamagalalo ma le alofa. E toe faamaoopoopo e leoleo mamoe le lafu mamoe.

**Tatalo:** Le Alii e, fesoasoani mai ina ia matou lototetele e tumau le ola faatuatua i lau Afio. **Amene!**

**Aso Toona’i – Mati 28: “Leoleo po” (Night watch)**

**Tusi Faitau – Mataio 26: 36-46**

**Matua – ff. 39, 40:** *“Ua maluu faaititi atu i lumam, ona faapau fao ai lea o ia ma tatalo, ua faapea atu, “Lo’u Tama e, afai e mafai, ia ave ese lenei ipu ia te au; a e aua le faia lo’u loto, a o lou finagalo. Ona maluu ane lea o ia i ona soo, ua maua i latou o momoe, ona fetalai atu ai lea o ia ia Peteru, “Pe faapena ea ona outou le lava ona tatou mataala faatasi ma a’u i le itu po e tasi?”*

O Ketesemane, o se fanua i le mauga o Olive i sasae o Ierusalem. O le nofoaga na lauiloa tele aua sa tatalo ai Iesu, ma o lea na faamatalaina e Mataio, ua le mafai e ona soo ma Peteru, ona latou mataala faatasi ma Iesu i le itu po e tasi. Peita’i, mo Iesu i lea lava tala, o loo ua faatumulia lona finagalo i le mafatia, ona ua latalata i ona puapuaga. O le tau

faailoa ina o tiute tauave, faailoaina o le tagata ua lagona le mata'u/fefe, ma le lagona vaivai i se nofoaga ese. O se tofotofoga mo le tau faamaonia o le tauaveina o tofiga mai galuega faigata, ma le faamoemoe i le auua faamaoni. Pe mafai ea ona tuu atu na o Iesu e tatalo na o ia, ma mataala faatasi ma ia? O le lagolago (support) o se faatinoga e moomia so o se tasi e ave ma ta'ita'i, mo le aga'i pea i luma o tiute.

**Tatalo:** Le Alii Iesu Keriso e, a o i ai i taimi faigata o filifiliga, fesoasoani mai ina ia taulai ma le loto tele i lau Afio. **Amene!**

## O LE TALA LELEI IA MATAIO

**Mai le oti i le toe tu** (*From death to resurrection*)

### *Aso Sā Laupama*

**Aso Sā – Mati 29: “Malosi ma auai”** (*Force and presence*)

**Tusi Faitau – Mataio 26: 47-56**

**Matua – ff. 52, 54:** *“Ona fetalai atu lea o Iesu ia te ia, “Inā toe sulu ia o lau pelu i lona faamoega; auā o i latou uma o e tago i le pelu, e oti i latou i le pelu. Fa te oe ea ou te le mafaia ona aoi atu nei i lo'u Tamā, ona auuina mai ai lea ia ia te au o agelu e sili ona toatele i lekeono e sefulu ma le lua? Ona faapea lea ona taunuu o Tusi, e tatau ona oo ia mea?”*

O le pelu ma le uatogi o loo i le f:47, o loo talanoa i le malosi ma le faamalosi (*strength and force*). O loo ta'ua ai foi i nisi o vaega o lenei fuaiupu le fesootaiga faaletino, i le tuuina atu o mana'oga malosi agai i le tino. A o le sogi o se faatinoga sa mua'i faia e Iuta le soo na faalataina Iesu, i le faailoaina o gaoiga o le pu'e (*seized*) ma ave faapagota (*arrest*) ia Iesu (f:50). O le ta o le pelu ma le uatogi ua valaaulia ai faafitauli agai i le tino. E sili ona faigata lea ituaiga faatinoga, auā o le tagata ua mana'o tele i le malosi ua manumalo ia te ia le faamaligi toto. Ua sili atu lea malosi nai lo le faia o se faatinoga lelei. O le faaoleole ma savalia ala o le pogisa, ua faateteleina ai le fa'asauā (*brutal*).

O le fesootaiga o Iuta o le aufaitaulaga lea. Ae ua ia faia ai se gaoiga le lelei ma le sese. A o Simona Peteru, o lona taumafai e tauti le agaleaga a Iuta o se faatinoga e ta'ita'i atu i se faiga taua. Peita'i, o le tala a Mataio, o manatu a Iuta ma Peteru ua faateleina ai le sese. O le tali atu o Iesu i le va o faafitauli, na ia faailoa ai e faapea, , *“Inā toe sulu ia o lau pelu i lona faamoega; auā o i latou uma o e tago i le pelu, e oti i latou i le pelu.”* E le o le faatupuina o sauaga o le tali e fofu ai faafitauli. Aisea? Aua e filifili ai e tagata le pogisa, ae o saunoaga ma fetalaiaga a Iesu, o loo ofoina mai ai le malamalama. Ua faailoa mai ia Iesu se auala o le lotomaulalo (21:5), ma ofoina mai lona ola e fai ma togiola mo tagata uma (20:28). Ua faataunuu ai ia te ia tusitusiga uma o le Tusi Paia (26:54-56).

**Tatalo:** E i ai taimi e sese ai o matou filifiliga, e moomia le faamagaloga, ma le ta'ita'iga o lau Afio. **Amene!**

**Aso Gafua – Mati 30: “Kaiafa ma le 'au Saneterini”**

**Tusi Faitau – Mataio 26: 57-68** (*Caiaphas and the Sanhedrin*)

**Matua – ff. 57, 59:** *“O e na pue ia Iesu ua latou ta'ita'i ia te ia ia Kiafa le ositaulaga sili, na faapopoto ai le au tusiupu ma toeaina... A o le au ositaulaga sili, ma le taupulega uma, ua latou saili ni e molimau pepelo ia Iesu, ina ia latou fasioti ia te ia.”*

O le ulua'i faapotopotoga o le 'au ositaulaga sili ma le au tusiupu, na latou taupulepule faatasi ai ma Herota i le fia faaoo ai o le oti ia Iesu le pepe lea na fanau i Peteleema i Iutaia (2:4). A o lea ua latou toe faapotopototo i le molia ai o Iesu e tusa ma lona faamasinoga ma faaoo ai le oti ia te ia. *“O e na pue ia Iesu ua latou ta'ita'i ia te ia ia Kiafa le ositaulaga sili, na faapopoto ai le au tusiupu ma toeaina... A o le au ositaulaga sili, ma le taupulega uma, ua latou saili ni e molimau pepelo ia Iesu, ina ia latou fasioti ia te ia.”* O lea faamasinoga na faailoa le le malilie o le ositaulaga sili ma le taupulega, ua latou tuuaia le solitulafono a Iesu ma le taumafai e faoa le mamalu o le Atua. O le a sou manatu, pe a oo ina feagai ma le taufaafefe, faamata'u mai, poo le tofotofoina o le ola taumafai?

**Tatalo:** Faafetai le Alii e, i lou faailoaina o auala e ao ina matou manumalo ai i lenei soifuaga faigata. **Amene!**

**Aso Lua – Mati 31: “Faafiti o Peteru”** (*Peter’s denial*)

**Tusi Faitau – Matthew 26: 69-75**

**Matua – ff. 74, 75:** *“Ona augani ai lea o ia ma tauto, ua faapea atu, “Ou te le iloa lava lea tagata.” Ona vivini loa lea o moa. Ona manatua lea e Peteru o le upu na fetalai atu ai Iesu ia te ia, “E le vivini moa seia e faafiti faatolu mai ia te au.” Ona ulufafo ai lea o ia, ua tagi lotulotu.”*

Pe i ai ea se eseese o tiga o le malosiaga faa-le-mafaufau na feagai ma Iesu i lona faamasinoga, ma Peteru i lona faafiti ina o Iesu? A o tula’i Iesu ma tautino, ua le mafai e Peteru ona tautala faamaoni e tusa ma le la mafutaga ma Iesu, se ia oo ina ua savali ese Peteru ma ona loimata ua le matū. O Peteru o se tagata e finau malosi. O se tasi fo’i o soo e gaua’i lona loto ia Iesu. Peita’i, o lona gaua’i (allegiance), ua tatou le mafaia ona vaavaai ai, i le feagai ai o Iesu i ona taimi faigata. A o’o ina lutia lo tatou faatuatua i faigata o le ola, o lagona ia e oo mai; fefe, vaivai, pogisa, ma le faanoanoa o ni lagona e omai faatasi ma tofotofoga.

A o le faafiti o Peteru, o se vaauga e sili atu ona faigata pe afai e faatino, nai lo se isi lava gaioga. E i ai le pologa o le mafaufau ma le maliu o Iesu e faailoa mai pea pe afai e tatou te faafitia Iesu o ia o lo tatou Alii ma le faaola. A o tatou tulata i le vaiaso Paia, ia manatua lo tatou faatauva, tagata agasala, a o ni auuana e le aoga. Aua e leai se eseese o Peteru ma i tatou tagata faatuatua. O le faailoa mai pea o le satauro mo i tatou, ina ia faamanatu mai ai pea lo tatou ola faiaina, ma le faamagaloina o a tatou agasala. O le tagi a Peteru, ua faailoa mai ai le tagata o loo tapena se isi laasaga fou, ma galuega sili atu mo Iesu na puapuagatia ma faasatauroina. O se avanoa mo le toe fuataina o le ola taumfai, e auuana ma faia le tiute o le tautua pea.

**Tatalo:** Iesu Keriso e, a o matou faiaina i lenei soifuaga. Ia faamallosia o matou loto e galulue pea mo lau Afio. **Amene!**

**Aso Lulu – Aperila 1: “Muta le ala”** (*Dead end*)

**Tusi Faitau – Matthew 27: 1-10**

**Matua – ff. 3, 5e** *“Ua iloa e Iuta, o le na faalataina o ia, ua faasalaina o ia, ona salamo ai lea o ia, ua toe ave tupe e tolugafulu i le au ositaulaga sili ma toeaina, ua faapea atu, “Ua ou agasala, ina ua ou faalata le ua le sala”...ua alu ese; ona alu ai lea o ia ua noa o ia e ia.”*

Aisea ua faaosofia ai lagona o Iuta i le faalataina o Iesu? Tupe? Po o le faia o le agasala? Po o le taumafai e faalavelave i galuega a Iesu? Po ua le mautonu ia Iesu? E ui i le fesiligia pea o Iuta ma lona faaiuga, ae ua tatou vaavaai i se i’uga o le faatinoina o lea gaioga o le faalataina; *ona alu ai lea o ia ua noa o ia e ia.* O le pule i le ola, o se mataupu ogaoga e tele ona aafia ai soo se atunuu o lenei lalolagi; e oo lava i le ‘au Kerisiano. Manatua pea, o le ola e aoga tele, ma e sili ona taua (*precious*). O nisi o tagata e latou te fetai’i loa ma faafitauli o le olaga, ona vaavaai loa lea i nei gaioga mata’utia. Ae mo nei ituaiga tagata, e moomia le faatuatua ma le talitonu, e mana’omia le lagolago o aiga, nuu, ekalesia, e oo lava i uo. O le tagata e mo’omia le onosai (*patient*), tali atu (*respond*), a’apa atu (*reach out*), fa’atelelele gese faaiuga (*deal gently*), ae aua le faatiga ma faamasino atu. O le ‘au ositaulaga sili ma toeaina, na latou le manatunatu mamafa i le lagona salamo a Iuta. Ae ua tuu fatalia lava Iuta, e faafesaga’i ma ona faaiuga. Manatua pea, o le feagai ma le popole o loo i ai lava se tasi e mafai ona fesoasoani ma faasaoina le ola.

**Tatalo:** Le Ali’i e, foai le lototele i o matou tagata ta’itoatasi, ia mafai ai ona pulea o matou loto. **Amene!**

**Aso Tofi – Aperila 2: “Fa’asinoina lima”** (*Passing the buck*)

**Tusi Faitau – Mataia 27: 11-31**

**Matua – ff. 22, 24a:** “...Se a foi le mea ou te faia ia Iesu o le ua igoa ia Keriso?” Ona fai mai ai lea o i latou uma ia te ia, “Ia faatasuroina ia.” A ua fai atu le alii, “Pe se a foi se leaga ua ia faia?”... Ua iloa e Pilato, ua le aoga lana upu,... ua fafano ai ona lima i luma o le motu o tagata...”

O le molia ai o Iesu e le ‘au ositaulaga sili ma toeaina, ua tuuaia e tusa ma lona tali, “O ia o le tupu o tagata luitaia.” E faapea foi i tuuaiga sese ua ia faifai i le Atua (*blasphemy*). Peita’i, e le’i faaleaogaina e Iesu le tulaga o le Mesia (26:64). Aua ana fai ua faailoa e Iesu o ia o se tupu, atonu e tatau ai ona popole ma tapenapena le malo a Roma. O lea faafitauli, sa taumafai ai Pilato e faailoa atu se lagona i se auala e faasaoloto ai Iesu. Atonu, o lea lagona na afua i le miti o lana avā. E ui lava i lea gaoigā, ae na manumalo lava le alalaga o tagata i le fa’a-satauroina o Iesu. Peita’i, o le fafano o lima a Pilato, ua faailoa ai lagona le mau-tonu, ma ua tu’uāia ai le au ositaulaga, “Faitalia lava outou.”

**Tatalo:** Le Ali’i e, alofa mai i lo matou le mautonu, ua matou faiaina ai i lou alofa saili mai. **Amene!**

### **Aso Faraile Lelei**

**Aso Faraile – Aperila 3: “Puapuagatia ma mamalu”**

**Tusi Faitau – Mataio 27: 32-56** (*Misery and majesty*)

**Matua – ff. 45, 50:** “Ua afua mai i le tutonu o le la, ua po uma ai le nuu, ua oo lava i le itula e tolu. Ua lata i le itula e tolu, ona alaga ai lea o Iesu ma le leo tele...” “Lo’u Atua e, lo’u Atua e, se a le mea ua e tuulafoai mai ai a’u?”...Ua toe alaga Iesu ma le leo tele, ona tuuina atu ai lea e ia o lona agaga.”

O le itula e tolu, o le taimi lea na tetele ai tiga ma le lagona puapuagatia o Iesu, ma tauivi ai ma le malosi o le pogisa (*powers of darkness*). I lea lava taimi o loo feagai ai foi fitafita ma lo latou foi galuega saua. E tosina ai tagata fegasoloai e vaai ma matamata ia Iesu o loo faalavaau i le satauro. Ua taueму tagata na ui ane i le ala. Atonu, o ia leo o tofotofoga, o upu faifai o le ata o le pogisa, a o se vaaiga autu o le faaosoosoga na feagai ma Iesu i le vao (4:1-11). E ui lava o loo manatu nisi o loo fesiligia e Iesu le auai o lona Tamā i lea taimi. Peita’i, afai o lea nofoaga o loo i ai se faamoemoe autu, na auina mai ai Iesu (Ioane 3:16). O lona uiga e le o tuulafoaina Iesu e lona Tamā. Ae o faailoga o loo aumaia ai le mamalu i le va feagai o Iesu ma lona Tamā(f:49-51,54).

O faailoga tetele o le pogisa, ma le satauro, e le’i aveesea ai le faasinomaga o Iesu, a ua faamautinoa mai ai mea lilo (*mysteriously*). Ua faamanino ai le pogisa faaletagata, i le faailoaina “*E moni, o le Alo lava leni o le Atua.*” Na amata lava i le puapuagatia, ae faaiuina i lona mamalu silisili ese. O le faamoemoe filemu, i le faaitiitia o tiga, puapuaga, ma faafitauli o le ola masalosalo. Ae tosina ai lagona i se suiga fou o le ola taumafai, agai atu i le mamalu ma le ola faavavau.

**Tatalo:** Le Atua e, faamagalō lo matou ola le mautonu i lau Afio. **Amene!**

**Aso Toona’i – Aperila 4: “Avea ma so’o maasiasi”**

**Tusi Faitau – Mataio 27: 57-66** (*Discipleship of disappointment*)

**Matua – ff. 57, 60:** “Ua oo i le afafā, ona sau ai lea o le tasi tagata mauoa, o le Arimataia, e igoa ia Iosefa, o ia foi o le soo o Iesu; ua alu atu o ia ia Pilato, ua faanoi atu ai i le tino o Iesu. Ona fai atu ai lea o Pilato ia tuu ane le tino. Ua ave e Iosefa le tino, ona aui ai lea i le ie lino e mamā. Ua tuu ai i lona tuugamau fou na foa i le papa; ua fuli atu e ia le maa tele i le gutu o le tuugamau, ona alu ai lea o ia.”

Na faamatalaina i le amataga o tusitusiga a le evagelia o Mataio, talaaga e uiga ia Iosefa o se tagata amiotonu ma faatuatua. O le sailiga ma le mulimuli i ala o le Atua i taimi o le pogisa ma taimi o faafitauli. Peita’i i le toe faaalua mai ai o le isi Iosefa. Ua faailoa mai ai le faamaeaina o le feagaiga a Iesu i le lalolagi, ma oo atu ai o ia i lona nofoaga mamalu. Ma, o lea lava na maluu ai Iesu ma tuu atu i le tuugamau na foa i le papa, e Iosefa le Arimataia o se mauoa. Peita’i, o Iosefa le Arimataia o le soo a Iesu. O lona tautinoga na avea ma se faamoemoe e na te mulimuli, faaa’oa’o i ala o Iesu, ia mafai ona molimau i le

alualu i luma o le Talalelei. E ui lava na ia lagona le loto vaivai i lea taimi faigata. A o lona faamaoni ia Iesu na maua ai le lototele ma le mautinoa, ua toilalo mea uma i le malosi o le faatuatua ia Iesu. O le mamalu lea ma le fiafia o le Aso Toona'i Paia, o se laasaga e tapena atu ai i le toe tu o Iesu.

**Tatalo:** Le Alii e, foi mai le lototele e matou te galulue ma faailoa lou mamalu ma lou silisili ese. **Amene!**

### *Aso Sā Eseta*

**Aso Sā – Aperila 5: “E moni ua toe tu”** (*Risen indeed*)

**Tusi Faitau – Mataio 28: 1-20**

**Matua – ff. 8, 10:** *“Ona la vave o ai lea nai le tuugamau ma le fefe ma le fiafia tele...Faauta foi, ua fetaiiai Iesu ma i laua...Ona la o mai ai lea ua fetagofi i ona vae, ma ifo mai ia te ia. Ona fetalai atu ai lea o Iesu ia te i laua, “Aua lua te matatau; ina o atu ia, lua te ta’u atu i o’u uso, ina ia latou o atu i Kalilaia, latou te iloa mai ai a’u.”*

Na molimau Maria le Makatala, ma le isi Maria a’o tuuina atu e Iosefa le Arimataia le tino a Iesu i le tuugamau. O lea gaoiga i se faamoemoe e la te toe asia le tuugamau. E ui lava sa faamauina le tuugamau ina ne’i gaoia le tino a Iesu. Ae na vaaia i lea faamauina se vavega malosi faalililo ma le mamalu silisili ese(f:2). O le mamalu e le manaomia ai le mata’u po o le fefe. A o le mamalu ma le malosi e faailoa atu ai ua toe tu mai Iesu(f:6). O lea mataupu o loo ua manino ai le manumalo o Iesu mai le oti ma le malosi o le pogisa (*power of darkness*). Ua faafouina ai le faamoemoe, ma faamalosi ai le faatuatua i le faataunuina o le faaolataga. O loo faamautinoa mai ai le savaliga faa-le-faatuatua ia lototetele e maua le faamafanafanaga i le toe tu o Iesu. O le faailoa o Iesu ia Maria le Makatala ma le isi Maria, ua faamautu ma faamaonia ai le toe tu mai o Iesu nai le oti ma le tuugamau. O le faailoaina o Kalilaia e vaaia ai Iesu e ona soo. O loo faailoa mai ai le malosi ma le mamalu o fetalaiaga a Iesu e tusa ma folafolaga i lona toe tu mai nai e ua oti, e faamaoni lava. e ala i galuega ma le ola tautua o tatou tagata i aso uma. Ma, sei toe faamanatu le nofoaga na muai valaauina ai e Iesu lona ‘au Soo, ma na faailoa ai le mamalu o pulega a le Atua e tusa ma lona malo(4:17).

**Tatalo:** Ia via lava lau Afio le Atua le Tama, le Alo, ma le Agaga Paia. I le faamaoni o lou auai mai, ma le mamana o le toe tu mai o Iesu. **Amene!**

### **O LE ALOFA TOEFA’AFOISIA O LE ATUA**

*(The restorative grace of God)*

**Alofa tunoa** (*Grace*)

**Aso Gafua – Aperila 6: “Feagaiga faavavau”**

**Tusi Faitau – Kenese 9: 8-17** (*An everlasting covenant*)

**Matua – ff. 9, 12, 13a:** *“Faauta foi, o a’u, ou te faatumauiina la’u feagaiga ma outou, ma a outou fanau pe a mavae outou... O le faailoga leni o le feagaiga ou te faia ma outou... ua ou tuuina la’u nuanua i le ao...”*

I le mavae ai o le lolo, sa ofoina e le Atua se feagaiga faavavau i le foafoaga. O lea feagaiga na faaalua e ala i le nuanua; ma faailoa ai le alofa tunoa o le Atua. E toe faafouina le foafoaga ma faaolaina. O le nuanua o se feagaiga loloto faale-agaga i le lotolotoi ma le mafuta mai o le Atua i taimi ma aso o feteenaiga o le soifuaga. Aemaise ai le tapenaina o se siosiomaga lelei ma le matagofie, mai se lalolagi ua faaleagaina. O le mataupu leni i le tusi o Kenese o loo talanoa i le toe amataina po le toe faafoisia o le feagaiga faavavau a le Atua. Ua aumaia ai se tusi valaaulia ina ia toe faafoisia le foafoaga i lona matagofie ma le lelei mai lava i lona amataga. O se valaaulia ia manatua ai sootaga taua, ia maua ai foi tamaoiga, ma ia faasilisili ona faia se faamalologa i le foafoaga ae faapea ma tagata.

**Tatalo:** Le Alii e, ia faafoisia o matou lagona ma leoleoina o matou loto i lou filemu. **Amene!**

**Aso Lua – Aperila 7: “Alofa tunoa e faaalii i le alofa mutimuti vale”**

**Tusi Faitau – Salamo 86: 1-17** *(Grace shown through compassion)*

**Matua – ff. 15, 16a:** “A o oe le Alii e, o le Atua oe le alofa mutimuti vale ma le alofa fua, o le tele gese lona toasa, a e tele le alofa ma le faamaoni. Ia e liuliu alo mai ia te au, ma ia e alofa mai ia te au...”

O lea Salamo 86, o le alaga a Tavita i le Atua a o feagai ma ona puapuaga. Ua ia saili atu i le alofa fua ma le alofa mutimuti vale o le Atua. O lea valaau ina ia faateleina ai le alofa o le Atua. O se valaau loloto e tusa lea ma le feagai ai ma lagona mafatia. Ua iloa lelei e Tavita, e le mamao le Atua ma ona tagata i taimi faigata. Ua faailoa mai ai le Atua e auai, mafuta, ma saunia lona alofa mutimuti vale i soo se taimi. O lea foi Salamo e mafai ona avea ma se mataupu mo se suiga faaletagata i le toe fuataina o le ola taumafai, ma faatupuina ai le ola faaleagaga.

**Tatalo:** Faafetai le Atua, i le avea o lau Afio ma o matou Atua. Ua avea ai lou alofa mutimuti vale ma ala matou te maua ai lou faamalologa. **Amene!**

**Aso Lulu – Aperila 8: “Sauni le Atua e faamagaloga ma toefaafoisia”**

**Tusi Faitau – Mika 7: 18-20** *(God’s readiness to forgive and restore)*

**Matua – f. 18:** “O ai ea se Atua e tusa ma oe o le faamagaloga agasala, ma ua le manatua solitulafono a e o totoe o lona tofi? Na te le faamoemoe pea i lona toasa, auā e fiafia o ia i le alofa.”

Ua faamautinoa mai e le perofeta o Mika, se Atua e sili atu lona mamana. O le Atua e faafoisia ma faaola. O le Atua foi e faamagaloga ma faagaloga o solitulafono. O le molimau a Mika i se Atua e le naunau i lona toasa. O se ata manino o le Atua e faasilisili o lona alofa tunoa e le mavae lea. E tusa lava pe mamao le tagata ma le Atua, po a lava foi faigata e feagai ma le tagata. E le suia ai lona alofa faamagaloga ma toe futai le ola. E ese le matagofie o le molimau a le perofeta i le Atua e tumau pea lona finagaloga i le alofa e faamoemoe i le faailoa ina o se Atua e faamaoni lona alofa, mo taimi ma aso o puapuaga. O le manatua pea o le Atua e tumu i le alofa mutimuti vale. O le lagona ina lea o lona alofa fua, ua na finagaloga ai e faamagaloga ma faafoisia le atoatoa o mafutaga vava lalata o le tagata ma le Atua faamaoni lona alofa.

**Tatalo:** Faafetai tele le Atua, i lou alofa e le uma i ai matou le tagata agasala. Ia fesoasoani mai ia matou talia lou alofa tunoa, ia matou saoloto ai. **Amene!**

**Aso Tofi – Aperila 9: “O le alofa tunoa o le Atua e faaalii i faamanuiaga”**

**Tusi Faitau – Ieremia 32: 36-44** *(God’s grace shown through provision)*

**Matua – ff. 36, 37:** “A o lenei, o loo faapea ona fetalai mai o le Alii, le Atua o Isaraelu, i le aai nei, o loo ua outou fai mai ai, ua tuuina atu ia i le lima o le tupu o Papelonía... Ou te faapotopoto ia te i latou ai nuu uma ua ou tulia ai i latou...”

O lea ua tatou vaavaai i se vaega taua e tusa ma le alofa tunoa o le Atua, e faaalii i le feagai ai o tagata ma lagona popole, faanoanoa, ma le lē mautonu. Ua afua lea lagona ona ua latalata lava le faatafunaina o Isaraelu. E ui lava ua latalata le faatafunaina ma le faaumatia. A o lea ua faamalosi le perofeta, e saunia e le Atua ona faamanuiaga e ala i lona alofa tunoa. O se faailoga ma se faamoemoe mautinoa, i le toe faafoisia ina e le Atua o laueleele a Isaraelu. O lea molimau faatuatua e faailoga ai le ola talitonu ma le faatuatua ua mautinoa. Aisea? Auā e latalata ma auai le Atua i taimi faigata o ona tagata. O le Atua e faia le togiola i ona tagata, e faapea foi le toefuataiga o laueleele ua faaleagaina. E ui lava la o loo i ai le lē mautonu ma le popole vale. A o le alofa tunoa o le Atua e faaalii i taimi faigata e ala i ana faamanuiaga.

**Tatalo:** Iesu e, ua maeu lava lou alofa faamaoni, ua e faataunuuna ai le togiola mo le lalolagi agasala. Faafetai! **Amene!**

**Aso Faraile – Aperila 10: “O le loloto o faamagaloga mana a le Atua”**

**Tusi Faitau – Neemia 9: 13-20** *(The depth of divine forgiveness)*

**Matua – ff. 13, 16a:** *“Na e afio foi i luga i le mauga o Sinai, ma fetalai ma i latou mai le lagi, na e tuu mai foi ia te i latou faamasinoga tonu, ma tulafono faamaoni... A o i latou ma o matou tamā, na latou faamaualuga, ma faamaaa i o latou ua, ma ua latou le faalogo i au poloaiga,”*

I le mataupu e 9, i le tusi a Neemia. Na toe faamatala ai lava e Isaraelu lo latou talafaasolopito, e uiga i fouvalega ma se gaoiga toilalo e uiga lea i o latou lava talaaga. Ua latou faailoa lo latou vaivaiga, na alia'e mai ai se manatu autu tūa tele; e tusa lea ma le loloto o faamagaloga mana a le Atua i lona nuu o Isaraelu. Ua atagia mai i lea manatu le Tulafono na tuuina e le Atua mo Isaraelu. O le tulafono ia ususitai ai Isaraelu, peita'i ua le faapea ina ona latou ususitai i ai. E ui lava i nei uiga faiaina ma le toilalo, ae na faaalua lava le alofa tunoa o le Atua ma lona alofa mutimutivale. O le Atua e faamagaloga ma finagalo ia maua e le tagata le loto salamo ma le ola toe fuataina; Auā o le Atua e silafia le loto ma tapulaa o le malosi o le tagata. Ae, e moomia e le tagata ona faamalosi ma taumafai pea.

**Tatalo:** Le Atua agalelei e, faafetai ina ua e finagalo ia matou maua le ola. **Amene!**

**Aso Toona'i – Aperila 11: “O le meaalofa o le alofa faavavau”**

**Tusi Faitau – Isaia 49: 8-18** *(The gift of everlasting love)*

**Matua – f. 8:** *“O loo faapea ona fetalai mai o le Alii, o ona po o le alofa ua ou tali ai ia te oe; o le aso e faaolaina ai ua ou fesoasoani ai ia te oe; ou te leoleo foi ia te oe, ma a'u avatua oe e fai ma feagaiga a le nuu; ina ia faaeaina le lalolagi, ia faia nuu ua faatafunaina mo latou tofi.”*

O loo ua valivali mai i lenei faitauga se ata o le alofa o le Atua e faafailele, faamafanafana, leoleo, ma ofoina mai se fesoasoani e tusa ma le feagaiga mautinoa e faaolaina. O le faaolataga e faamautinoa mai ai lona lava alofa faamaoni. O le alofa e faavavau. O lenei alofa faavavau o se tautinoga e mautinoga lona faataunuuina. O le meaalofa e agavaa ai tagata uma. E mafai foi ona mapu ai nisi ua mafatia ma feagai i sauaga, e oo lava i le lē mautonu. E lē tuulafoaina e le Atua i tatou ia feagai pea ma le ola mafatia. Auā o lona alofa e faavavau o le faamoemoe ma le faavae lea o le ola tauivi.

**Tatalo:** Le Atua alofa e, fesoasoani mai ina ia matou mautinoa i lou lava alofa e faavavau, matou te ola fefaasoaa'i ai. **Amene!**

## **FA'AMAUALUGA MA LE FA'AITU'AU (1)**

*(Pride and prejudice)*

**Aso Sā – Aperila 12: “O le laugutu molemole”** *(The boastful tongue)*

**Tusi Faitau – Salamo 12: 1-4**

**Matua – ff. 3, 4:** *“E vavae ese e le Alii o laugutu molemole uma lava, ma le laulau-faiva e tautala i mea faasausili; o e ua fai mai, o tatou laulaufaiva tatou te manu-malo ai, o tatou laugutu o tatou lava ia; o ai ea so tatou alii?”*

I lenei vaitau, e toaitiiti i latou te le iloa le malosi o ala o upega tafailagi, poo ala faasalalau lautele ma lona aafiaga i le soifuaga o le tagata. O nisi e fa'aaoga o ia ala e faaalua ai o latou lagona ma manatu, ae ua faailoa faatasi ai ma lagona o le fa'amaualuga, feteenaina, pe taumafai foi e fa'a'ole'ole ma fa'atiga i nisi. O nei fa'amaualuga e mafai ona fa'aalia ai le maualuga o le tali atu ma fesoasoani i e o loo moomia. Peita'i, ua fa'aalia faatasi ai ma le leai o se loto maualalo ma le fa'aaloalo i isi. Ua saili ai le lagona faamaualuga o e maua le tele o tupe i se auala faatosina. O le tatalo a Tavita, o loo auagani i le Atua e faafilemu loto o e tautala faasausili ma ua le mafai ona pulea o latou loto. A ua latou taumafai e pulea nisi ina ia latou maua faamanuiaga; ma saili ai lava o latou manuia. E moni, *“E vavae ese e le Alii o laugutu molemole uma lava, ma le laulaufaiva e tautala i mea faasau-sili; o e ua fai mai, o tatou laulaufaiva tatou te manumalo ai, o tatou laugutu o tatou lava ia; o ai ea so tatou alii?”*

**Tatalo:** Le Atua e, foai mai manatu ma lagona e atagia ai lau Afio. **Amene!**

**Aso Gafua – Aperila 13: “Fa’asausili i tulaga” (Pride in status)**

**Tusi Faitau – Eseta 5: 9-13**

**Matua – f. 11:** “Ona faamatalaina atu lea e Hamanu ia te i latou o le mamalu o lona tamaoaiga, ma le toatele o ana fanau, ma mea uma ua faasilisiliina ai o ia e le tupu, ma ona ua faaaina ai o ia ia sili i alii ma auuana a le tupu.”

‘E muamua le faamaualuga i le malaia; e muamua foi le loto faasiasia i le paū’ (Faataoto 16:18). O le faataoto o loo faamatalaina ai le tagata atoa, i lona faailoaina o ia lava, ma oo atu ai i se tulaga e le manuia. O lea manatu e tusa ai ma le mamalu na tuuina atu e le tupu, ua na mitamita ai i lona tamaoaiga, ma lona tulaga. Na avea ai lea ma auala ua faatauasoina ai o ia i le faatosina o le faamaualuga i lona tulaga. Na iloa le faamaualuga o Hamanu i ona tofiga, ua fai ma ala o lona vaivaiga i le vaai atu i manaoga o nisi. O Eseta, na ia taula’i atu i le lotomaulalo ma le lototele mo se manuia o nisi. E mafai faapefea e le faamaualuga ona tetea atu i lagona feteenai?

**Tatalo:** Le Alii e, alofa mai i le tagata agasala. **Amene!**

**Aso Lua – Aperila 14: “Fa’asausili fa’aleagaga” (A spiritual pride)**

**Tusi Faitau – Ioane 9: 32-41**

**Matua – f. 34:** “Ua latou tali atu ia te ia, “Ua fanau mai oe ua tumu i le agasala, e te a’oa’o mai ea ia te i matou?” Ona latou tulia lea o ia i tua.”

O le faitauga o le aso, ua tatou vaavaai i le mafuaaga na afua ai ona tupu le pule soona fai, i le faaleagaina o se mitamita/faamaualuga faaleagaga. O le faamaualuga faaleagaga na faatausuai ai le ‘au Faresaio o e ua malamalama i faatuatuga/talitonu faale-ekalesia, ua latou taumafai e faailoa o latou lava lagona e tusa ma lo latou lava amiotonu. Na manino lo latou faamaualuga faaletaga i le faafiaamiotonu ma latou taumafai e teena le vavega na faia e Iesu, ma tuuaia i le faasalaina. Ua faasili atu i le ‘au Faresaio le tausia o tulafono, ma puipuia o latou tulaga nai lo le sailia o le amiotonu o le Atua. E mafai faapefea ona tatou saili le amiotonu a le Atua i le faamaualuga faaleagaga?

**Tatalo:** Le Atua e, ia faamalamalama ina i matou i lou alofa tunoa. **Amene!**

**Aso Lulu – Aperila 15: “E muamua le fa’amaualuga i le paū” (Pride before a fall)**

**Tusi Faitau – Mareko 14: 27-31, 66-72**

**Matua – f. 31e:** “E ui lava ina ta oti faatasi ma oe, ou te le faafiti lava ia te oe.”

Na fa’ataunuuina lava le valoaga e tusa ma le faalataina o Iesu, e pei ona valoia e le Perofeta o Sakaria 13:7: o le ta o le leoleo mamoe ma le taapeape ai o mamoe. O lea valoaga, na faailoa ai e Iesu o le a faafiti faatolu e Peteru o ia a o le’i vivini faalua moa, a e finau maumaua’i Peteru, “E ui lava ina ta oti faatasi ma oe, ou te le faafiti lava ia te oe.” O le manatu autu o se tasi o faataoto ‘E muamua le faamaualuga i le malaia; e muamua foi le loto faasiasia i le paū’ (Faataoto 16:18); o loo faamala ai talitonuga e le’i malamalama lava ia Iesu. Ua tautino ma lona faamaualuga tele (pride), na taitai atu ai Peteru i se lagona faasiasia. E ui lava la i lagona faanauanu faamaoni o Peteru, ae e foliga mai ua na faalogo ae na te le’i lagonaina. O le avea o le faamaualuga ma ogatotonugalemu o se filifiliga, atonu e i ai taimi e lelei ai, ae i ai foi taimi e avea ai ma lagona faiaina ma le toilalo. O le talatala ina o lagona o se faailoga e faamautu ai le mafutaga. E faapefea ona tatou faia se faaleleiga ina ua muamua le faamaualuga i le paū?

**Tatalo:** Faamagalalo o matou manatu ina ua le tutusa ma lou finagalo. **Amene!**

**Aso Tofi – Aperila 16: “Ua faamaualaloina ē faamaualuluga”**

**Tusi Faitau – Tanielu 4: 28-37 (The proud are humbled)**

**Matua – f. 37:** “O lenei, o a’u o Nepukanesa ou te faamanu, ma vivii atu, ma faaneenee atu i le Tupu o le lagi, e faamaoni ana galuega uma, ma ona ala ua tonu; na te mafaia foi ona faamaualaloina e o savavali ma le faamaualuga.”

O le manatu autu o lenei aso ua aumaia ai se aoaoga taua o le aafiaga na o’o ia Nepukanesa. O se mataupu na faavae e tusa ma lona faamaualuga lea ua faamaualaloina,

lea na ia toe faamatalaina i le (f:36-37). Mo Nepukanesa lava ia, ua na iloa lelei o loo i ai le e pule aoao ma le pule silisili ese. Ua tautino ai lona faamaualuga e ala i le Atua o Tanielu. O le Atua e faamaualoina e o savavali ma le faamaualuga. O le Atua e i ai lona mana e faaeaina ai e o loo i ai loto maualalo, ma toe fuatai e ua salamo.

**Tatalo:** Faafetai le Atua i lou tuu avanoa pea i le tagata agasala. **Amene!**

**Aso Faraile – Aperila 17: “Fa’aeteete i mea e te mitamita ai”**

**Tusi Faitau – Iakopo 4: 13-17** (*Careful what you boast about*)

**Matua – ff. 15, 16:** “A e tatau ona outou faapea, “A finagalo i ai le Alii, tatou te ola ai, ma tatou faia lea mea ma lea mea”. A o leni, ua outou mitamita i a outou upu faamaualuga; e leaga le mitamita faapena uma lava.”

O se faamanatu a le Aposetolo i le lotomaualalo ma le gauai atu i le Atua, o ia lava e faatoailoina lagona feeteenai. Ua aumaia ai se tusi faamalosī ina ia iloa le atoatoa o faamanuiga a le Atua e tusa ma lona pule aoao. Auā e faaalii lava i e lotomaualalo ma faia galuega lelei. O le mitamita i mea o i le lumana’i e tusa ma le finagalo o le Atua, o se lagona lelei. A o le mitamita i le lumana’i aunoa ma le finagalo o le Atua e afua ai le leaga.

**Tatalo:** Ia faamatala atili mai pea lou finagalo le Atua, ia matou tautala ai i lou alofa faamaoni. **Amene!**

**Aso Toona’i – Aperila 18: “Tau lava ia aoga”** (*All that really matters*)

**Tusi Faitau – Kalatia 6: 12-18**

**Matua – ff. 14, 15:** “A o a’u, aua ne’i ou mitamita i se mea, tau lava o le satauro o lo tatou Alii o Iesu Keriso, ua faasatauroina ai le lalolagi ia te au, o a’u foi i le lalolagi. Auā e le aoga le peritomeina, tau lava ina ia toe faia ia fou.”

O le lu’itau masani e faali ai le mea moni ma le taua i le olaga a le tagata. E masani ona tutupu tofotofoga i faafitauli o leni soifuaga, a o ia gaioga e ao ona oo mai a o faavae le ola faatuatua ma le talitonu i le alofa. O le alofa e mafai ona galulue faatasi ai lagona i le gatasitasi o manatu ma mitamita ai i faatinoga na faia e Iesu Keriso, , ua faasatauroina ai le lalolagi ia te au, o a’u foi i le lalolagi. Auā e le aoga le peritomeina, tau lava ina ia toe faia ia fou.” Pe faapefea ona tatou mitamita i le maluu o Keriso?

**Tatalo:** Le Atua o le alofa tunoa e, tatala o matou loto ina ia malamalama atili pea i lou finagalo alofa. **Amene!**

## **FA’AMAUALUGA MA LE FA’AITU’AU (2)**

*(Pride and prejudice)*

**Aso Sā – Aperila 19: “O amioga fa’amaualuga”** (*An attitude of superiority*)

**Tusi Faitau – Ioane 7: 40-52**

**Matua – ff. 47, 48:** “Ona tali meai lea o le au faresaio ia te i latou, “Po ua faaseseina foi outou? Po ua talia o ia e se tasi o le au faipule, po o se tasi o le au faresaio?”

O loo ua faaaauu pea le manatu aoao mai le Aso Sa ua tuanai atu, i leni foi Aso Sa, ‘Faamaualuga ma le Faailoga Tagata’. Peita’i, o leni vaiaso o loo taulai atu i le afa lona lua o le manatu autu ‘Faailoga Tagata’. O le masani lava faaletagata e taumafai e faalii foliga fiafia pe a feiloai ma isi tagata. O se faatinoga e faalii ai le amanaia, atonu foi o le taliaina. O le fesili a le au Faresaio na manino ai lagona faamaualuga ua le mafai ona latou taliaina Iesu. O lo’o ua taumafai lava e te’ena pe fa’aleagaina a’oa’oga a Iesu, ua atagia ai le fa’ailoga tagata. Ua fa’amoemoe lava i le tausia, o le fa’aeseeseina ma le fa’aleagaina. O a’oa’oga a Iesu, o loo i ai se vaaiga masani e taumafai e siitia le lotomaualalo, agamalu, filemu, ma le alofa i soo se tagata. O a’oa’oga foi o loo luitau ai e o loo faamaualuga, ma faatupuina le le mautonu, atonu foi o se teena ma le masalosalo. O ia mau faatinoga o loo aumaia ai le toe faaolaola (*revive*) i le tetee atu i faiga o le faailoga tagata, ae faatumauiina pea le pule ma le faasausili. O le mataupu silisili i le pule silisili ese, e i ai le sau, ma le faalumaina, e mafai foi ona teena lea atamai e tagata i le le amanaia o le upu moni.

**Tatalo:** Le Atua alofa e, foai mai se loto fou ma le loto maualalo e talia ai tagata uma i lou lava alofa tunoa. **Amene!**

**Aso Gafua – Aperila 20: “Fa’aitu’au e faavae i luga o le fefe”**

**Tusi Faitau – Esoto 1: 6-14** (*Prejudice based upon fear*)

**Matua – ff. 9, 10:** *“Ua ia fai atu i lona nuu, Faauta, o le nuu o le fanauga a Isaraelu ua sili ona totele ma le malosi ia i tatou; ina o mai ia, ina tatou togafiti poto ia i latou, ne’i tupu tele, ona iu ai lea, pe a oo se taua, ina ‘au faatasi i latou ma e ‘ino’ino mai ia i tatou, ma latou tau mai ia i tatou, ma o ese i le nuu nei.”*

O le faailoga tagata ua manino mai i le matua. Ua tupu le le maotonu ma le atuatuvaale i tagata Aikupito na afua ai lo latou taumfai e fai se togafiti poto ina ne’i faoa lo latou malo. O le fefe e mafai ona aveesea ai le malosiaga o le pule o lea na mafua ai se faatinoga a Farao e faasaga ia Isaraelu. O lea lagona ua fai ma manatu faapitoa e faatino ai se agasala mamafa, ma faatupuina ai le feteenai ma le fevaevaea’i. O lenei elemene o le fefe e le gata ua faia ai se faatinoga malosi, ae ua faasaga tau ai le tagata i le foliga vaaia o le Atua i tagata uma. E faapefea ona taofia le fefe ina ia le tupu ai le faailoga tagata?

**Tatalo:** Le Atua faavavau e, foai mai le lototele ma le alofa ina ia faatumauiina ai le ola fealoni. **Amene!**

**Aso Lua – Aperila 21: “Fa’aitu’au ua feagai ma Iesu”**

**Tusi Faitau – Mareko 6: 1-6** (*Prejudice against Jesus*)

**Matua – f. 3:** *“E le o le tufuga ea lenei, le tama a Maria, o lona uso foi o Iakopo, ma Iose, ma Iuta, ma Simona? E le o iinei foi ea ia te i tatou ona tuafafine? Ona latou tausuai ai lea ia te ia.”*

O lea ua feagai Iesu ma le faailoga tagata i lona lava nuu, ma lona aiga(f:4). O le masalosalo na aufua ai se faiga faailoga tagata i le nuu o Iesu. Ua faailoa mai se lagona faaituau ma le vaai maualalo ia Iesu, *“E le o le tufuga ea lenei, le tama a Maria, o lona uso foi o Iakopo, ma Iose, ma Iuta, ma Simona? E le o iinei foi ea ia te i tatou ona tuafafine? Ona latou tausuai ai lea ia te ia.”* E ui lava o Nasareta le aai na faamemelo i ai Iesu. Peita’i, ua filifili e tagata o Nasareta le tausuai, nai lo le amanaiaina. O lea ua latou faatinoina se gaioiga e iloa ai le faailoga tagata, ua faatauasoina ai i latou mai le upu moni, ma le taliaina o Iesu ma lona faasinomaga.

**Tatalo:** Ia faapupula ina o matou mata le Alii e, ina ia manino o le faailoga tagata, e faapogisaina ai o matou lagona. **Amene!**

**Aso Lulu – Aperila 22: “Fa’apito i o tatou lava ituaiga”**

**Tusi Faitau – Luka 6: 32-36** (*Favouring our own kind*)

**Matua – f. 35:** *“Peita’i outou, ia outou alolofa atu i e o fai outou mo latou fili, ma ia agalelei atu, ma ia avatu tupe e nonoina, aua le faamoemoe i se mea e tasi e au mai; e tele ai lo outou tau, e avea foi outou ma fanau a le Silisili ese; auā o ia le agamalu i e agavale, atoa ma e amio leaga.”*

O le faitauga o lenei aso, o loo taula’i lea i le auala e tatau ma faatinoga a le tagata talitonu ma faatuatua i le Atua. O se faatinoga e faalia ai le alofa i soo se tagata o loo moomia. Ua faamalosi ai foi le agalelei, ma faamoemoe i le Atua ma lona agamalu i soo se tasi. O lea faamalosi e uunaia ai le lototele e taofia le solitulafono, ina ne’i fai ma pa pupuni o galuega lelei. O se a’oa’oga faigata tele, ae mafai ona faigofie ona o le alofa. *“Peita’i outou, ia outou alolofa atu i e o fai outou mo latou fili, ma ia agalelei atu.”* O le faatusaina o se tulaga maua luga o le alofa mutimutivale e aofia ai le alofa atu mo i latou ua ita mai. O se faatinoga e atagia ai uiga o Keriso i ana galuega ma faaa’oa’oga. O le tuu faafeagai o faatinoga e tusa ma le faailoga tagata, ma le alofa i lo tatou lava ituaiga. E atagia pea le faailoga tagata ma avea o se faamai sosolo, a o le tagata e saili auala ma faatupuina le fealofani i le va fesootai.

**Tatalo:** Le Atua e, aoao mai ina ia faatupu tele ina le filemu ma le alofa i o matou loto. **Amene!**

**Aso Tofi – Aperila 23: “Fa’aitu’au ona o le lanu”** (*Prejudice due to race*)

**Tusi Faitau – Eseta 3: 8-14**

**Matua – f. 8e:** “...O loo i ai le tasi nuu ua taaapeape ma nonofo solo faatasi ma tagata o itu malo uma o lou malo. E ese foi a latou tulafono i tulafono a nuu uma, ma ua latou le ususitai i tulafono a oe le tupu; o le mea lea, e le tatau ai i lau afio ona tuu pea ia te i latou.”

Ua aumaia i lea ulu tala se faamatalaga o le faailoga tagata ona o ituaiga, e tusa ma fuafuaga a Hamanu na faamata’uina ai tagata lutaia uma. O se tau-mafaiga e faasese ai le tupu o Asueru e tusa ma o latou tulafono, ua ta’u faamata’u i le tupu. O nei tuuaiga eseese, ua faatupu ai le fevaevaea’i le ola galulue faatasi. O le faailoga tagata na taumafai e aveesea mai ai le tagata i lo latou faasinomaga. O lea feeseeseaiga na faalia ai le faailoga tagata ma le faamoemoe ia manuia ai lava le tagata lava ia.

**Tatalo:** Lo matou Tama e, foai mai le loto fou ina ia aveesea ai le loto maa (Esekielu 36:26). **Amene!**

**Aso Faraile – Aperila 24: “Aua le faaalua le manatu fa’apito”**

**Tusi Faitau – Iakopo 2: 5-10** (*Do not show favouritism*)

**Matua – ff. 8, 9:** “Afai foi ua atoatoa ona anaana o outou i le tulafono silisili, e tusa ma le Tusi, Ia e alofa atu i le lua te tuaoi, ia pei o oe lava ia te oe, tou te amio lelei ai. A afai tou te faailogaina tagata, ua outou agasala ai, ua faailoaina ai i le tulafono o solitulafono outou.”

Ua faailoa mai e le aposetolo o Iakopo, o le faailoga tagata o se agasala ua soli ai le poloaiga alofa o le Atua i le alofa atu i le lua te tuaoi e pei o oe lava ia te oe. O le tagata atoa na fausia i le faatusa o le Atua, ma o tagata uma e tutusa o latou tulaga fesootai i faamanuiaga e oo foi i le alofa atu i le Atua ma le loto atoa. O le alofa o le tasi i le isi, o se faailoga i le fausiaina o le nofo fealofani ma le ola fiafia o tagata i le lalolagi na foafoa e le Atua. O le faailogaina o tagata, ua tatou tuu ai le avanoa i le feitagai, fefulitua’i, leai se nofo lelei, ma ua sailia ai lava le pule soona fai. O le faamalosi a Iakopo, i le taumfai e aveese le faailoga tagata aua e faaleagaina ai le faavae alofa o le Atua ma aoaoga a lelu.

**Tatalo:** Ia fesoasoani mai le Alii e, ia mamao i o matou loto le faailogaina o lou lava faatusa. **Amene!**

**Aso Toona’i – Aperila 25: “E lē faailoga tagata le Atua”** (*God is impartial*)

**Tusi Faitau – Galuega 10: 34-48**

**Matua – ff. 34, 35:** “Ona oo atu lea o le lauga a Peteru, ua faapea atu, “E moni, ua ou iloa e le faailogaina tagata e le Atua; a e peitai o le mata’u ia te ia i nuu uma lava, ma fai le amiotonu, ua talia i latou e ia.”

O lea ua faaii i le faitauga o le aso, le ulu tala o lenei vaiaso, “Faamaualuga ma le Faailoga tagata”. O le lauga la o Peteru, lea ua faamanino mai ai o le Atua e le faailogaina se tagata. E tolu manatu tāua ua faasoa mai ai le aposetolo o Peteru: (1) E lē faailoga tagata le Atua, (2) e talia e le Atua tagata e matata’u iā te ia, ma le vaega lona (3) e talia foi e le Atua i latou uma o loo taumafai e ola i lona amiotonu. O se faasoa e uunaia ai le ola taumafai i le amiotonu, ma le alofa atu mo soo se tagata e ala i faatinoga e tusa lava po o tulaga ma ituaiga tagata.

**Tatalo:** Faafetai le Atua, ua e faailoa ala ina ia matou ola ai ma le mata’u i lau Afio. **Amene!**

## O LE TALALELEI IA MATAIO

Fesoasoani ma fa’amalolo (*Help and healing*)

**Aso Sā – Aperila 26: “Ia pei o Iesu e fa’amalolo ma fesoasoani”**

**Tusi Faitau – Mataio 8: 28-9:8** (*Be like Jesus the healer and helper*)

**Matua – ff. 9: 6, 8:** “...O i ai i le Atalii o le tagata i le lalolagi le pule e faamagalalo ai agasala” —ona fetalai atu ai lea o ia i le supa— “Ina tulai ia, ina ave lou moega, ma alu i lou fale.” Ona tulai ai lea o ia, ua alu i lona fale. Ua iloa e le motu o tagata, ona taufaiofo ai lea; ua latou vivii atu i le Atua le ua foaiina mai le pule faapena i tagata.”

A o femaliua'i Iesu e fesoasoani ma faamalalo i tagata, sa toatele nisi na fesiligia ma latou tali eseese e tusa ma lana faiva. I le mataupu 8 fuaiupu 28, ua faamatalaina mai ai, na faamalalo ai e Iesu tagata toalua na uluitinoina e temoni, ma sa avea ma ala na le fiafia ai nisi i lenei galuega fesoasoani na ofoina e Iesu mo ia tagata. Atonu, ona sa latou le fiafia i aafiaga tau tamaoaiaga poo aganuu. Ua maliu atu Iesu i lona lava aai, a ua o ane tagata ua avatu ia te ia le tagata supa, e ui i manatu masalosalo ma lagona eseese o tagata, ae na fai lava le galuega faamalalo a Iesu. Ua fesoasoani Iesu ma faamagalalo le agasala o le tagata supa. E ui lava foi i lagona o le au tusiupu, a ua faatino lava e Iesu lana galuega faaola mo tagata o loo moomia. E mafai faapefea ona tatou faapei o Iesu e faamalalo ma fesoasoani i se atunuu o loo atagia ai le faailoga tagata?

**Tatalo:** Le Atua e, foai mai le lototele ia matou faapei o Iesu e faamalalo ma fesoasoani i soo se tagata. **Amene!**

**Aso Gafua – Aperila 27: “Ua soloia e Iesu pavaeloto uma”**

**Tusi Faitau – Mataio 9: 9–17** (*Jesus has broken all barriers*)

**Matua – ff. 10, 11:** “Ua taoto o ia i le fale e taumafa, faauta foi, o tagata ao lafoga e toatele ma e ua agasala ua o mai ai, ua latou taoto e aai faatasi ma Iesu ma ona soo. Ua iloa e le au faresaio, ona latou fai atu ai lea i ona soo, “Se a le mea ua aai faatasi ai la outou d’oa’o ma e ao lafoga ma e ua agasala?”

E tusa ai ma faatinoga sa faia e Iesu, e mafai faapefea ona faatusatusa i lenei vaitaimi ua tatou i ai? Atonu o lea faatinoga sa fai ma lagona popole i le au Faresaio. Aua ua aai faatasi Iesu ma Mataio ma nisi o tagata ao lafoga. Peita’i, o lea faatinoga ua faalia ai se gaioiga i le taumafai lea e soloia le pa puipui o talitonuga faa-le-lotu ma aganuu eseese. O se faatinoga e taumafai lea e aapa atu i soo se tagata, ma ofoina atu ai se fesoasoani. Po ua tatou tapena ma sauniuni e mulimuli i faaitaiga sa faatinoina e Iesu? Pe ua tatou taumafai foi e aapa atu ia i latou o loo manaomia le Talalelei e ala ia Iesu Keriso, ae le ona o le aganuu? Pe afai foi e ofoina le fesoasoani, pe mafai ona talia ina?

**Tatalo:** Ia faamalosia o matou loto i faaa’oa’oga na faia e Iesu. **Amene!**

**Aso Lua – Aperila 28: “Fa’atuatua e maua ai”** (*Faith to receive*)

**Tusi Faitau – Mataio 9: 18–34**

**Matua – ff. 28, 30a:** “Ua ulufale ia i le fale, ua o mai ai ia te ia o ia tauaso; ona fetalai atu ai lea o Iesu ia te i laua, “Ua oulua faatuatua mai ea ia te au ou te mafaia lenei mea? Ona la fai mai ai lea ia te ia, “Ioe, le Alii e.” Ona pa’i atu ai lea o ia i o la mata, ua faapea atu, “E pei ona oulua faatuatua, ia faapea lava ona faia ia te oulua.” Ona pupula ai lea o laua mata...”

A o femaliua'i Iesu e faamālōlō tagata ma'i eseese, na iloa lelei ua na faaogāina auala eseese e faatino ai lana galuega faamālōlō. O ia metotia na afua mai i mana'oga eseese, e faapea foi le malamalama ia Iesu. Atonu, e le mafai lava ona faatinoina e Iesu lana galuega fesoasoani, pe ana leai se faatuatua i tagata na aafia i ma'i eseese. Peita'i, na iloa lelei e Iesu le mafuaaga na latou saili fesoasoani ai, ma le manaomia moni lava o Iesu ma lona galuega faaola i ai i latou. Ua fa'aailoa mai i galuega faaola a Iesu, e na te tausia lava o tatou mana'oga. E tali mai foi i taimi ma aso e tatou te moomia ai. Peita'i, e moomia e Iesu le faatuatua o i latou uma na feagai ma ma'i eseese. O le ola talitonu e mafai ona suia ai lagona popole, ma o latou tulaga, o latou faia, e ala i faamalologa mana e faatinoina e Iesu ina ua faatuatua ma le faamaoni. “E pei ona oulua faatuatua, ia faapea lava ona faia ia te oulua.” Ona pupula ai lea o laua mata.”

**Tatalo:** Le Alii e, ia faatuputeleina lo matou faatuatua i lau Afio e matou te malolo ai. **Amene!**

**Aso Lulu – Aperila 29: “Tala lelei ma le agaalofa”**

**Tusi Faitau – Mataio 9: 35-38, 10: 10** *(Good news with compassion)*

**Matua – ff. 36, 38:** *“Ua silifia e ia le motu o tagata, ona mutimuti vale ai lea o lona alofa ia te i latou, ona ua lailoa i latou ma tuulafoaiina, e pei o mamoe e leai so latou leoleo. Ona fetalai atu ai lea o ia i ona soo, “E tele le saito e seleseleina, a o le au fai galuega e toaititi ia; o lea ia outou aoi atu ai i le Alii e ana le saito e seleseleina, ina ia aauina mai e ia ai e galulue i lana saito e seleseleina.”*

Sa silasila atu Iesu i le motu o tagata ua moomia lava le fesoasoani ua tuulafoaina. Ona faaosofia lea o lona alofa mutimuti vale ma ofoina se fesoasoani ia i latou, ma poloaia Ona soo e tatalo ma aapa atu e fesoasoani i ai latou. O lenei lalolagi ua tuuina mai le laueleele e galueina e oo i le seleselega a le Atua, ma e manaomia ai lo tatou galulue faatasi se ia oo i le aso o le seleselega. O le ekalesia o se nofoaga e faasoa atu ai le agalelei o le Atua ma ofoina atu se fesoasoani mo tagata uma. E toatele nisi e latou te manaomiaina lo tatou fesoasoani ma faasoa atu le Tala e Lelei e ala ia Iesu. Atonu o se gaoiga e mafai ona avea ma se auala i suiga fou faatasi ai ma suiga moni. O le alofa mutimuti vale o Iesu i le lalolagi o lana lea e selesele mai, ma o loo faamoemoe i Ona soo ia i ai i ai latou o lea lava alofa mutimuti vale e tasi mo le lalolagi atoa.

**Tatalo:** Le Atua e, faamalosia o matou tagata e fesoasoani ma laveai mo e o loo ua mafatia ma tiga ma moomia. **Amene!**

**Aso Tofi – Aperila 30: “O mea e sauniuni ai”** *(What to expect)*

**Tusi Faitau – Mataio 10: 11-23**

**Matua – ff. 16, 18:** *“Faauta, ou te aau atu ia te outou e pei o mamoe i le va o luko; o lenei, ia outou atamamai pei o gata, a ia fifilemu e pei o lupe. Ia outou ma tagata; aua latou te tuuina atu outou i fono, ma latou sasa ia te outou i o latou sunako. E ta’ita’iina atu foi outou i luma o alii ma tupu ona o a’u, e fai ma molimau ia te i latou atoa ma nuu ese.”*

Na auina atu e Iesu Ona soo i mamoe ua leiloloa o Isaraelu, (fuaiupu 6). Ua faailoa e Iesu se tulaga uiga ese e oo i ai le ‘au soo, a iā latou sauniuni i le fetalai ai ma faigata pe oo ina latou tufa atu ma faasoa le Tala Lelei. O le aauina atu Ona soo e pei o ni mamoe i le va o luko. O le ata i le oo ai i le lagona vaivai, gaoiga e fai ma fa’alavelave mata’utia i lo latou galuega, o se folafolaga ia agai pea i luma lo latou faamalolosi e faia le galuega e tusa ma le faamoemoe mautinoa. E mafai faapefea ona tatou faatuatua, ma fesoasoani, faasoa atu lo tatou faatuatua ma talitonu ia Iesu, i le feagai ai ma luko?

**Tatalo:** Le Atua e, ia faaola mai ma faatumauiina pea lou lava alofa mutimuti vale. **Amene!**

**Aso Faraile – Me 1: “Ae aua tou te matata’u, ou te ia te outou”**

**Tusi Faitau – Mataio 10: 24-42** *(But do not be afraid I am with you)*

**Matua – ff. 28, 31:** *“Aua fo’i tou te matata’u i e fasioti le tino, a e latou te le mafaia ona fasioti le agaga; a e lelei ona outou matata’u i le ua mafai ona fano ia te ia le agaga atoa ma le tino i Kena. E le fa’ataulia ea ni manu iti se lua i le asari? E leai fo’i so la’ua e pa’u i le elelee e aunoa ma lo outou Tama. A o outou lauulu lava ua faitaulia uma ia. O lea aua tou te matata’u ai; e sili outou i manu iti e tele.”*

“Aua tou te matata’u,” o se lapataiga ua fa’atolu ona fetalai i ai Iesu i ona so’o. Ina ia latou o e ta’uta’u atu le tala lelei ia Iesu i tagata uma o le lalolagi. Aua o Iesu lava na lapata’i, e mafai ona ia puipuia i latou pe a o’o mai sauaga ma puapuaga. O lona fa’atasi mai, e te’a ai le fefe. Aua e iai lo tatou fa’asinomaga, ua uma ona tofia i tatou e o e fai nu’u uma lava ma so’o. “Ae aua tatou te matata’u, i e fasioti le tino, a e ia tatou matata’u i le Atua, o le mafai ona fano ai le tino ma le agaga i Kena.” E i ai se tamaitai Hindu, sa fai lana molimau i Sigapoa, o ia o se ulua’i Kerisiano i lona aiga. I le amataga sa taumafai e nana lona talitonuga fou ia Iesu, ae na tatalo lava i le Atua e aumai se avanoa na te fa’asoa atu ai le tala lelei i lona aiga. E ui lava i lona fefe, ae aumai lava e le Atua le filemu ma le olioli i lona

loto, i taimi uma na ia fa'asoa atu ai i tagata o lona aiga. O le valaau lena a Iesu i tagata uma e talitonu ia te ia, "Aua tou te matata'u, ou te ia te outou, ou te leoleo fo'i ia te outou."

**Tatalo:** Iesu, fa'afetai fa'amalosi mai. **Amene!**

**Aso Toona'i – Me 2: "O lu'itau a loane le perofeta sili"**

**Tusi Faitau – Mataio 11: 1-19** (*The challenge of John the great prophet*)

**Matua – ff. 2, 6:** "Ua lagona e loane i le fale puipui o galuega a Keriso, ona aauina mai ai lea e ia ni ona so'o se to'alua, ua fa'apea mai ia te ia, "O oe ea le maliu mai, pe matou te fa'atali i se tasi? Ona tali atu ai lea o Iesu, ua fa'apea atu ia te i laua, "Ina o atu ia oulua, ma fa'ailoa atu ia loane o mea na oulua fa'alogo i ai, ma va'ai i ai. E manuia fo'i se le tausuai ia te a'u."

O lenei mau e ofoofogia tele ma e faigofie ona faafeso'otai ma mea e tutupu i le olaga. Aua o mea na tutupu i le olaga o loane le Papatiso, na lu'itau ai o ia. A e ui i lea, na auina mai e le Atua lana auuana na te fa'aleleia le ala mo le Ali'i. Ou te manatua ai se tina sa ma'i tigaina lana tama ma ua tutuli ai. Ua avea le ma'i o si ana tama ma mea ua maluelue ai lona fa'atuatua aemaise lona aiga. Aua ua le mafai nei ona latou toe talanoa i si ana tama e pei ona masani ai. A e fa'aaoga le gagana fai taga (*sign language*). Ae faimai lenei tina, na fa'amalosi mai lava lenei tusi faitau ua fai ma matua. O a lava luitau o lenei olaga, e faigofie mea uma i le Atua pe a tumau lona fa'atuatua i le Atua. Ua ia le fa'avaivai ai pe masalosalo i le fa'amaoni ma le alofa o le Atua.

**Tatalo:** Fa'afetai Le Atua e, i lou fa'amalosi mai i lo'u fa'atuatua. **Amene!**

### **O LE TALALELEI IA MATAIO** **Fa'ailoga ma lesona** (*Signs and lessons*)

**Aso Sā – Me 3: "O le a maua e outou le malologa mo outou agaga"**

**Tusi Faitau – Mataio 11: 20-30** (*You will find rest for your souls*)

**Matua – ff. 28, 29:** "Ia outou omai ia te a'u, o outou uma o e tigaina ma mafatia i avega, o a'u fo'i e malolo ai outou. Ia outou amoina la'u amo, ma ia outou fa'aa'oa'o ia te a'u, aua o a'u le agamalu ma le loto maualo; ona maua lea e outou o le malologa mo outou agaga."

O lo'o fa'aali mai ni ata i le televise o le taua i Palestina. O lo'o tumu le ala i tagata sulufai ua sosola ese ma o latou nofoaga, ina ne'i lamatia lo latou ola i le taua. O le tele o latou fale ua fa'aleagaina e a'upega malolosi o le taua. Ma ua latou fa'atalise atu mo se nofoaga latou te saogalemu ai. Ua na o ni nai mea taua lava e pei o ofu ma ulo fai meaa, ma nai lavalava e tumu ai le atopa'u e mafai ona ofi i le ta'avale. Fa'aopopo iai ma tamaiti, ma tagata matutua o lo'o savavali ma amo a latou ato. Aua ua toe sau fo'i le lapataiga o se osofaiga. Ma o se fesili o lo'o tu mai pea, O fea ea oe le Atua? O fea ea a maua ai e nei mau tagata se malutaga?

O lo'o savavali le to'atele o tagata sulufai e fia maua se filemu, a o se fa'amasinoga tonu. Ae o lo'o pisi solo ta'ita'i o malo o le lalolagi e fao se feutagaiga ina ia filemu ai le taua. Ae peita'i, o taitai lava ia o lo'o taumafai e fa'atupu le filemu, o lo'o latou fefa'ataua'i aupega malolosi o lo'o fa'aaogaina i le taua. O fea ea o i ai oe le Atua? Ua tali Iesu i lea fesili, omai ia te a'u, outou uma o e tigaina ma mafatia i avega, o a'u e malolo ai outou.

**Tatalo:** Fa'afetai tele Le Atua e, i lau fa'amalologa. **Amene!**

**Aso Gafua – Me 4: "O le alofa ae le o le taulaga"** (*Mercy not sacrifice*)

**Tusi Faitau – Mataio 12: 1-21**

**Matua – ff. 2e, 10e:** "Fa'auta, ua faia e ou so'o le mea e le tatau ona faia i le Sapati... E tatau ea ona fa'amalolo i le Sapati?"

"Ua maoona e fia aai, ua malolo foi e manunu'a," o se tala e lelei i le fa'alogo. A e tatau ea ona tatou fa'amalolo i le Sapati? O le to'atele, e talitonu o se mea lelei. A o nisi, e leai. O le Sapati o se aso ua fa'aavanoaina e malolo ai, ma mafaufau ai i le Atua, ina ia fa'afouina e le Atua lo tatou malosi, ma tatou maua ai se malosi fa'asili. E i ai se tasi faifeau e tape

lana telefoni ma lana TV ma ana *electronics* i le aso e tasi o le vaiaso, ae faitau lana Tusi Paia ma mafuta i le Atua i le tatalo. E fa'apena foi pe a alu se faifeau i sana fa'amalologa, e toe fa'afouina ai lona malosi. Ma, o le Sapati o se malologa e maua ai le malosi fa'afouina e pei ona faia e Iesu. Sa saili e le motu o tagata, po o fea ua alu i ai Iesu, ae o lo'o malii atu o ia i luga o le mauga e tatalo ma mafuta i lona Tama. Ua fa'amanatu e Iesu i le au faresaio le sili atu o le alofa nai lo le taulaga.

**Tatalo:** Le Atua e, fa'afetai tele i l lou alofa ua sili lea. **Amene!**

**Aso Lua – Me 5: “I le Suafa o le Atua” (In God's Name)**

**Tusi Faitau – Mataio 12: 22-37**

**Matua – ff. 33e, 36:** *“Aua o ona fua ua iloga ai le laau...Aua o le tele o mea i le loto e tautala mai ai le gutu...A ou te fai atu ia te outou, o upu fa'atauva'a uma e faia e tagata, latou te talatala atu ai le tala i le aso fa'amasino.”*

Sa ou fa'ataia i le leitio i se fa'asalalauga le sa'o a se faipule. O le manatu o lea faipule e ese mai i lo'u talitonuga. Ou te le fiasia i le ta'uamitonuina e le faipule o le sauaina o isi tagata na faia e le Atua. E pei ua avea mea leaga e fai ma mea lelei. Ou te talitonu, o le agasala lava lea i le Agaga Paia. Aua e famasino i tatou e le Atua i a tatou upu. Na fa'amalolo e Iesu le gugu. Ae matua'i ofo le motu o tagata. A o le au Faresaio, ua latou masalosalo po o fea e sau ai lea ituaiga mana fai vavega. Ua fa'amanatu atu e Iesu i le motu o tagata, “e iloa le laau i ona fua.” O le tausiga lelei o le foafoaga, o le fa'atinoga lea o le alofa ma le fa'aaloalo i le Atua, o le na faia le lagi ma le lalolagi ma mea uma lava o i ai.

O le masani a se tasi ekalesia e ta'utino le latou fa'atuatuaga i sauniga lotu uma. Ua latou ta'utino atu ai, “Na faia i latou ia foliga i le Atua. Ma ua fai i latou ma uo a Keriso. Ma ua fa'amanaina i latou e le Agaga Paia. Ua latou ta'utino atu i le lelei atoatoa o le Atua, i lona alofa mutimutivale i tagata uma tusa lava pe tele a tatou agasala. Ua fa'aioaina le mata'utia ma le ofoofogia o foafoaga a le Atua. Aua o ona fua e iloa ai le laau. E iloa le tagata ua fa'aolaina i upu e tautala ai. O upu tatou te tautatala ai, e fa'amasino ai i tatou.

**Tatalo:** Fa'afetai le Atua i le fa'amanatu mai o le Aso Fa'amasino. **Amene!**

**Aso Lulu – Me 6: “O le faailoga o Iona” (The sign of Jonah)**

**Tusi Faitau – Mataio 12: 38-50**

**Matua – ff. 48e, 50:** *“O ai ea lo'u tina? O ai fo'i o'u uso?” Ona fa'aloaloa ai lea e ia o lona aao i ona so'o, ua fa'apea atu, “Fa'auta, o lo'u tina ma o'u uso, aua o le faia le finagalo o lo'u Tama o i le lagi, o lo'u uso lea, ma lo'u tuafafine, ma lo'u tina.”*

“O le faailoga o Iona,” o le tali lena a Iesu i le fesili a le 'au tusi upu ma le 'au faresaio, ina ua latou fia vaai i se fa'aailoga e faia e Iesu. E fa'aailoa atu ai e Iesu, ua tu'uina atu ia te ia e le Atua le pule aoao i mea uma lava. Na foloina Iona e le i'a, ma sa i le manava o le i'a i aso e tolu ma po e tolu. O le fa'atusa lena o le malii, ma le toetu manumalo o Iesu i le aso tolu. O le talaiga a Iona na fa'aolaina ai le nu'u o Nineva. Ua sili atu ai le fa'atuatua o tagata Nineva, o tagata o nu'u ese, nai lo lenei tupulaga leaga ma le mulilulua i le vaitau o Iesu. Na malaga atu foi le Masiofo o le itu i toga e fia fa'alogologo i le poto o Solomona. O le mea lea ua tu'uina atu ai e le Atua i tagata Nineva ma le Maisofo o le itu i toga le fa'asalaga o lenei tupulaga leaga. Aua ua latou le fa'atuatua ia Iesu. Ua fa'asilisiliina ai e Iesu le taua o le fiasia fa'aleagaga e feso'ota'i ai tagata uma ma le Atua. O le finagalo o le Atua, ia tatou usiusita'i i ana poloaiga. E sili atu le fiasia o le Atua i lana mafutaga vavalalata ma i tatou, nai lo se isi lava sootaga fa'aletagata.

**Tatalo:** Fa'afetai tele le Atua e, i le tatou mafutaga vavalalata. **Amene!**

**Aso Tofi – Me 7: “Va'ai! Fa'alogo!” (Look! Listen!)**

**Tusi Faitau – Mataio 13: 1-23**

**Matua – ff. 13, 16:** *“O le mea lea ou te tautala atu ai ia i latou i fa'ataoto, aua o lo latou vaai latou te le vaai ai, o lo latou fa'alogo fo'i, latou te le fa'alogo ai, pe lagona. Amuia o outou mata, aua ua va'avaai; ma o outou taliga, aua ua fa'alogo.”*

Afai tatou te va'ava'ai, ma fa'alologologo lelei, i lenei tala, tatou te maua ai se a'oa'oga lelei. E taua mata ma taliga i le Atua. Aua a tatou fa'aogaina lelei, tatou te mautinoa tino ai, o lo'o soifua le Atua. E mafai ona tausi lo tatou soifua i se fa'atoaga, aua o lo'o maua ni mea taumafa. Ma o le fa'atoaga o se nofoaga e maua ai le fa'amalologa. E malu lona ea, ma e tele le okesene e fa'alelei atili ai le soifua maloloina. O le to'atele e fiafia e o i le fa'atoaga e toto ai laau aina, ma fa'amalosi tino i le vele ina o le vao, ma le fa'amamaina o le fanua. A fua loa laau aina, ma matua le fa'atoaga, e matua lagona le fiafia tele, aua o le a selesele ma fa'aoga fua o le fa'atoaga. O mea uma ia e iloa ai le mata'utia o le Atua. Aua o le alofa o le Atua, na ia fa'amanuia mai ai i le laueleele e ola ma tausi ai le soifua. O le viiga lena o le Atua. Aua o fua o le fa'atoaga, e fai ai taulaga i le Atua, e fa'atau ai ofu o le fanua aoga, ma fafaga ai le nu'u, ma fai ai to'onai mo le faife'au. A tatou va'avaai ma fa'alologologo lelei i lenei tala, tatou te maua ai le agaga fa'afetai tele i le Atua o le na faia i tatou ma mea uma lava. Ia viia pea le Atua, o le na faia mata ma taliga tatou te vaai ma fa'alogo ai.

**Tatalo:** Fa'afetai tele le Atua i lou alofa mai. **Amene!**

**Aso Faraile – Me 8 : “O le vaoleaga i le saito”** (*The weeds in the wheat*)

**Tusi Faitau – Mataio 13: 24-30, 36-43**

**Matua – ff. 24e, 25 :** *“Ua fa'atusaina le malo o le lagi i le tagata na luluina le saito lelei i lona fanua; ua momoe tagata, ona alu ane ai lea o le ua ita mai ia te ia, ua na luluina le titania i totonu o le saito...”*

O lenei fa'ataoto o lo'o fa'ailoa mai ai e le Atua o lo'o ola fa'atasi tagata lelei ma tagata leaga i le lalolagi, e pei ona ola fa'atasi o le saito ma le titania. Ae a o'o i le taimi o le seleselega saito, ua ilo ese le titania ma lafo i le afi. E fa'apena fo'i i tatou pe a o'o mai le fa'amasinoga a le Atua i lo tatou ola. E ilo ese e le Atua tagata leaga ma lafoa'i i le afi e mu pea, e le pe. O lona uiga, o le a tagi aueue ai lava lena tagata leaga i le fia ola, ma lilivau ona nifo i le vevela o le afi, ae le oti lona agaga. E na o lona e'e lava lana mea e fai. A'o tagata lelei e ulufale atu i le Malo o le Atua, i le ola e fa'avavau. I le fa'ataoto a Iesu, o le tagata lulu saito, o Iesu lava lea, o le ana le upu o le ola, ma a'oa'oga lelei uma lava. O le fanua e faasino i le lalolagi ma tagata uma lava o lo'o iai. O le fatu saito lelei ua fa'asino i le fanua a le Atua, o e talitonu ma fa'atuatua ia Iesu. O le fili, o le tiapolo, po'o Satani na ia totoina le fatu leaga o le titania. O le seleselega o le taimi lena o le fa'amasinoga. O e selesele, o agelu, pe a o'o mai le fa'amasinoga, latou te aofa'i uma e amio leaga ma lafoa'i i le afi. A o e amiotonu, latou te ulufale atu i le Malo o le Atua.

**Tatalo:** Fa'afetai tele le Atua, i lau fa'aolataga. **Amene!**

**Aso Toona'i – Me 9: “Fa'ataoto e uiga i le malo i le lagi”**

**Tusi Faitau – Mataio 13: 31-35, 44-52** (*Parables about the kingdom of heaven*)

**Matua – f. 44:** *“E tusa fo'i le malo o le lagi i le oa ua natia i le fanua; ua iloa e le tasi, ona nana ai lea e ia; ua alu fo'i ma le fiafia, ma fa'atau atu ana mea uma, i le fa'atau a'i mai lea fanua.”*

O le oa ua natia i le fanua, e laititi se vaega o le fanua o lo'o natia ai, ae matua'i tele lona taua. O lona uiga, aua ne'i o tatou vaai maulalo i le laititi, aua e fai vavega le Atua i mea iti. Aua fana fetalai Iesu, a e fa'amaoni i mea iti, e te pule i mea e tele (Luke 16:10). O le malo o i le lagi, ua fa'atusaina i se oa ua natia i fanua. A tatou mauaina, tatou te le toe mana'omia ni oa fa'alalolagi. Pe tatou te le toe manana'o i ni mea fa'aletino, ae tatou te ave ese uma mea o lo'o tatou agasala ai i lenei olaga. Ina ia tatou maua le ola e fa'avavau. O lona uiga, o le oa ua natia i le fanua, ua fa'atusaina lea i le ola lea e fa'avavau. O lo tatou oliolisaga lena tatou te fiafia ai pea e ofoina atu o tatou ola mo Iesu ma lana fa'aolataga. E tatau ai lava ona tatou mulimuli atu ia Iesu, ma fa'atuatua atu ia te ia, i ana a'oa'oga, ma ana poloaiga, ina ia maua e i tatou uma le ola e fa'avavau.

**Tatalo:** Fa'afetai tele Iesu, i lau fa'aolataga. **Amene!**

## MASALOSALOGA MA MEA E FEFE AI (*Doubts and Fears*)

### Masalosaloga (*Doubts*)

#### Aso Sā o Tina – Me 10: “Ua masalosalo Mose” (*Moses doubts*)

##### Tusi Faitau – Esoto 4: 1-17

**Matua – f. 1:** *“Ona tali atu lea o Mose, ua fa’apea atu, Fa’auta, latou te le talia mai a’u, latou te le fa’alogo mai fo’i i la’u upu, aua o le a fai mai i latou, E le’i fa’aali mai le Ali’i ia te oe.”*

Sa tumu Mose i le masalosalo ina ua vaai o ia i le tagata, ae le vaai i le Atua. Ua fefe Mose e fesaga’i ma tagata, a ua le mata’u i le Atua. Ua va’ai o ia i ona vaivaiga ma ua le mautonu ai, ma le talitonu ai i le Atua, e mafai e le Atua ona avatu upu e tautala ai i luma o tagata. A o le alofa tunoa o le Atua, ua tali atu ai le Atua i le alofa, i lona masalosaloga. Na faia ai e le Atua ni vavega, ua liu gata ai le to’oto’o, ua liu lepela ai lona lima ma toe lelei, ma faaliu toto ai le vai. Tiga lava ona fa’aali atu i ai e le Atua ni vavega e fa’amalosia ai lona loto, a ua ia le talitonu lava i vavega na faia e le Atua. Ua sili atu ia Mose lona fefe ia Farao ma tagata, nai lo le mata’u i le Atua. Sa ia Mose foi le fefe aua sa ia fasioti i le Aikupito ma sola i Mitiana. O lea la ua toe valaau le Atua e toe fo’i i Aikupito, e fa’asa’oloto mai ona tagata o lo’o nonofo pologa ai. A ua atili ai lona fefe. Pe fa’apefea ona ia toe foi e fesagai ma Farao? Pe fa’apefea fo’i ona fa’alogo mai le nu’u o Isaraelu ia te ia? Ia fa’asaga a’e o tatou mata i le Atua, e maua mai ai lo tatou fesoasoani, e toa ai o tatou loto. E mafai ai ona tatou ta’uta’u atu le upu o le ola i tagata Aua le fefe. E lavea’i ma fa’asa’olotoina e o noanoatia e le Atua.

**Tatalo:** Fa’afetai tele le Atua e, i lou alofa e le uma. **Amene!**

#### Aso Gafua – Me 11: “Ua masalosalo Na’amanu i le perofeta”

##### Tusi Faitau – 2 Tupu 5: 1-19a (*Naman doubts the prophet*)

**Matua – f. 13:** *“A ua fa’alatalata ane ana auauna, ua fai ane ia te ia, ua fa’apea ane, Sena e, ana fai atu e le perofeta se mea tele ia te oe, e te le faia ea? A o lenei, e te le faia ea ina ua e fai atu ia te oe, E te taele, e te mama ai?”*

Ua masani Na’amanu, le ta’ita’i ‘au, i le usita’i mai o ana fitafita ia te ia. Ae peita’i, ua masalosalo Na’amanu i le fai atu o le perofeta o Elisaia, e alu e taele i le Ioritana, ona malolo ai lea o ia. E iai le taimi tatou te fiafia ai e fa’atonu ma usita’i mai isi tagata ia te i tatou. A e a fai mai loa se fa’atonuga a se isi ia i tatou, ua tatou le fia faia. Aemaise lava pe afai tatou te masalosalo. Sa valaauina i ma’ua ma lo’u to’alua ma te o i Vietnam e fa’atu ai se aulotu. Ae na oso mai lava le masalosalo pe fa’apefea ona ma o e fa’atino lea galuega ona e to’atele le ma fanau laiti. Ae na fa’amalosi mai lava le tasi auauna a le Atua ma te o pea e fa’ataunu’u le valaau a le Atua. O se vavega na faia e le Atua, aua ma te o atu ua uma ona saunia e le Atua, tagata, fale, ta’avale, tupe, ma mea uma e fai ai lana galuega. E pei fo’i o Na’amanu, na fa’amalosi atu ia te ia lana auauna, na ia fa’ataunu’uina ai lava le fetalaiga a le perofeta o Elisaia, ma taele fa’afitu i le Ioritana, ona mama ai lea o ia. Ona ou salamo ai lea ma ou fa’atoese i le Atua ona o lo’u masalosalo i lana fa’aolataga e ala ia Iesu Keriso lo tatou Ali’i Fa’aola.

**Tatalo:** Fa’afetai tele le Atua e, i lou fa’amalosi mai pea. **Amene!**

#### Aso Lua – Me 12: “Ua masalosalo Ieremia i fuafuaga a le Atua”

##### Tusi Faitau – Ieremia 20: 7-18 (*Jeremiah doubts God’s intention*)

**Matua – f. 7:** *“Le Alii e, ua e fa’aoleole ia te a’u, ona fa’aoleoleina lea o a’u; ua sili ona e malosi ia te a’u, ma ua e manumalo; ua fai a’u ma mea e tapisa ai i aso uma, ua tauemu mai ia te a’u tagata uma.”*

Sa feagai Ieremia ma puapuaga. Ona maua ai lea o Ieremia i le loto tiga, loto fa’anoanoa, ma le loto vaivai. Ua tupu ai lona le fiafia tele, ma lona ita i le Atua. Ua ia masalosalo ai i le finagalo o le Atua, ma fa’apea atu, “Le Ali’i e, ua e fa’oleole ia te a’u, ona fa’oleoleina lea o a’u; ua sili ona e malosi ia te a’u, ma ua e manumalo; ua fai a’u ma mea e tapisa ai i aso uma, ua tauemu mai ia te a’u tagata uma.” Na tagi aue ma faitio Ieremia i le

Atua. Ma ua tu'uai e Ieremia le leaga i le Atua. O tu'uaiaga pepelo a tagata ma a latou ulaga ia Ieremia na tiga ma popole vale ai lona loto ma ua a'afia ai lana vaai i le Atua. O le upu moni, e fa'aogaina e Satani le loto vaivai, le fefe ma le popole vale e punitia ai la tatou vaai i le Atua. Tatou te fesiligia ai fo'i le Atua pe moni lona alofa i taimi e o'o mai ai puapuaga ma faigata. Ae tatau ona tatou manatua le alofa silisili ese o le Atua. Na ia auina mai ai lona Alo Pele e to'atasi, ina ia fa'aolaina i tatou uma, o e fa'atuatua ia te ia. Aua o Iesu lava na afio mai e fa'amalolo i e loto momomo, ma fa'asa'oloto le lalolagi mai le agasala.

**Tatalo:** Viia lava oe le Atua, i lou alofa ma lou agalelei. **Amene!**

### **Aso Lulu – Me 13: “Ua masalosalo Toma i le toetu”**

**Tusi Faitau – Ioane 20: 24-29** (*Thomas doubts the resurrection*)

**Matua – f. 27:** *“Ona fetalai atu lea o ia ia Toma, “Au mai ia lou tamatama'i lima nei, vaai mai fo'i i o'u lima; au mai ia fo'i lou lima, ma tu'u mai i lo'u itu; aua fo'i e te masalo vale, a ia e fa'atuatua.”*

E i ai le taimi tatou te fia vaai ai i le tino, tatou te iloa ai, o le tagata moni lea tatou te vaai ma fetagofi i ai. E pei o Toma, e le i talitonu o ia ua toetu mai Iesu, a e se'iloga lava e tago atu ona lima i ona manu'a ma vaai ona mata ia Iesu, ona talitonu lea. E moni lava lea saunoaga. Aua o le to'atele o tagata e le mafai ona latou talitonu seiloga lava latou te vaai ma fetagofi i ai, ona latou talitonu lea. E fa'apena fo'i le fa'ataoto a Iesu, “Amuia o e le vaai mai, ae fa'atuatua mai pea.” O lona uiga, e sili atu le tagata e le i vaai, ae fa'atuatua atu pea. E taua ia Iesu le fa'atuatua, le talitonu i lona toetu tusa lava pe tatou te le'i vaai ia te ia. O lona uiga, o le fa'atuatua, e fai ma o tatou mata ma o tatou lima, tatou te talitonu ma mautinoa ai, o Iesu lava lea na toetu manumalo i le oti. Ua ofo Toma ina ua tago ma vaai i manu'a o Iesu. O le fa'atuatua tatou te talitonu ai, ae le o le masalosalo.

**Tatalo:** Fa'afetai tele le Atua i le fa'atuatua o lo'o e foai mai pea. **Amene!**

### **Aso Tofi – Me 14: “Ua masalosalo Anania ia Saulo”** (*Ananias doubts Saul*)

**Tusi Faitau – Galuega 9: 10-19**

**Matua – ff. 13, 14:** *“Ona tali atu lea o Anania, “Le Ali'i e, ua ou fa'alogo i tagata e to'atele i lena tagata, i mea leaga e tele ua na faia i ou tagata paia i Ierusalem; e ana fo'i le pule mai le au ositaulaga sili, e fusifusi uma lava i e ua valaau i lou suafa iinei.”*

Na lagona e Anania lona fefe ia Saulo, ina ua fetalai atu le Atua ia te ia e alu i le ala ua fa'aigoaina o le Sa'o, e saili i le tagata ua igoa ua Saulo, i le fale o Iuta, e fa'amalolo ia te ia. O lona fefe, ua masalosalo ai Anania i le Atua. Pe mafai ona ia faia lea fa'atonuga, ne'i sauaina o ia e Saulo, ona o Saulo ua lauiloa i lona sauaina o tagata kerisiano. Ae na silafia e le Atua Saulo, o se tagata filiga i le Atua. Sa ia faia lona tiute o le fa'afaresaio, o lona puipuia lea o le fa'a-Iutaia mai a'oa'oga sese. Na ia fasiotia ma saisaia ai tagata kerisiano ona o lona talitonuga o lo'o ia faia mo lona Atua. Na filifilia ai e le Atua Saulo e fai ma ana mea faigaluega, aua ia ia silafia le loto o Saulo, o se tagata filifiliga ma le maelega i le Atua. E silasila le Atua i le loto ae le o le tino. Ona usita'i lea o Anania ma alu. Ua fa'ae'e ona lima i luga o Saulo ona toe vaai ai lea o Saulo. Ua tu fo'i o ia i luga ma ua papatisoina. Ona malosi ai lea o ia. Ma ua alu atu ma talai atu le tala lelei ia Iesu Keriso ma lana fa'aolataga.

**Tatalo:** Fa'afetai tele le Atua ona o Paulo lau auauna. **Amene!**

### **Aso Faraile – Me 15: “Ua masalomia le fa'amaoni o Peteru”**

**Tusi Faitau – Galuega 11: 1-18** (*Peter's integrity is doubted*)

**Matua – ff. 1, 3:** *“Ua fa'alogo le au Aposetolo ma le au uso o i Iutaia, ua talia e nu'u' ese le afioga a le Atua. Ua alu a'e fo'i Peteru i Ierusalem, ona fefinaua'i lea ma ia le au peritome, ua fa'apea mai, “Na e alu atu i tagata e le peritomeina, na outou a'ai fo'i fa'atasi ma i latou.”*

O Peteru sa gatete i lona fefe i fitafita Roma ma fa'afiti fa'atolu i lona Ali'i o Iesu Keriso. A o lea ua le toe fefe aua ua fa'atumuina o ia e le Agaga Paia i le tusi o Galuega. Ua ia lauga atu le upu a le Atua ma lona loto toa. Ua le toe fefe e ta'u atu le Suafa o Iesu. E le i fefe e ulufale atu i le fale o le ta'ita'i 'au o le to'aselau a Italia, o Konelio lona igoa, ma latou

aa i ai, ma ia fa'asoa atu ai le tala lelei (Galuega 10:1-48). O i latou uma na fa'alologolo ai, ua talitonu ma papatisoina. E lei fefe foi Peteru ina ua molia ma fa'amasinoina o ia e ta'ita'i luitaia. O le mana o le Agaga Paia, na liligi mai i o latou luga, na le fefe ai Peteru e lauga atu (Galuega 2:1-18). Ua masalosaloina ai e isi tagata le fa'amaoni o Peteru i lona fa'atuatua ia Iesu Keriso. Pe fa'apefea ona suia Peteru mai se tagata palaai i se tagata toa ma le le fefe? Aua e tofu lava le tagata lava ia ma le mea e fefe ai. E fefe le to'atele i le pogisa, ma mea e le mautinoa, ma e fefe fo'i i le oti. Ae ua fai Peteru ma fa'ataitaiga mo i tatou uma, ua le fefe a ua fa'alagolago i le mana o le Agaga Paia.

**Tatalo:** Fa'afetai tele le Atua e i le mana o lou Agaga Paia. **Amene!**

**Aso Toona'i – Me 16: “Tagata talitonu” (Believers)**

**Tusi Faitau – Iakopo 1: 1-7**

**Matua – ff. 2, 3:** *“O’u uso e, ia outou manatu, o le mea e fiasia tele ai pe a maua outou i tofotofoga eseese; ina ua outou iloa o le tofotofoina o lo outou fa’atuatua e tupu ai le onosa’i.”*

Na fetalai mai Iesu o le a o'o mai puapuaga (Ioane 16:33). O le lagona la e o'o mai ia te a'u pe a tofotofoina lo'u fa'atuatua, o le loto ita, loto vaivai, fa'anoanoa, popole, ma le lei o se fa'amoemoe. O le upu moni, e le finagalo le Atua tatou te mafatia na o i tatou lava pe a tatou fetai'i ma puapuaga ma faigata. Ae o lo'o fa'atasi mai le Atua ma fa'amalosi mai ia i tatou i le taimi tatou mafatia ma tiga ai. O fa'amanatu mai ia te a'u le tala ia Elia. Na saili e Iesepela Elia e fasioti ia te ia, ae sola ese ma taoto fa'apupu'u i le toafa ma ole atu i le Atua ina ia ave ese lona ola. Ona auina atu lea e le Atua o le agelu e faamalosi ia te ia. Ona toe savali lea o ia i aso e 40 ma lafi i le ana i le Mauga o Sinai. Na vaai ai Elia i le matagi, le mafui'e, ma le afi, ae le o i ai le Atua. Ae na lagona e Elia se leo itiiti ma le filemu, o le leo o le Atua, ua musumusu atu, ona toe fa'afouina lea o lona malosi e fa'aauau ai lana galuega. O lona uiga, e fa'atupuina e le Atua le olioli ma le fiasia i o tatou loto pe a tatou iloa, o lo'o fa'atasi mai o ia i le taimi o tatou mafatiaga.

**Tatalo:** Fa'afetai tele le Atua e, i le onosa'i ma le fa'atuatua. **Amene!**

## MASALOSALOGA MA MEA E FEFE AI

**Fefe (Fear)**

**Aso Sā – Me 17: “Aperamo” (Abram)**

**Tusi Faitau – Kenese 12: 10-20**

**Matua – ff. 12e, 13:** *“Ona latou fasioti lea ia te a'u, a e fa'aolaina oe. Se'i e fai atu o lo'u tuafafine oe, ina ia ou saogalemu ai ona o oe; e ola ai fo'i a'u ona o oe.”*

Ou te fiasia lava i le Tusi Paia, ona e moni ma fa'amaoni le fa'amatalaina o tagata ma o latou uiga, e o'o lava i tagata e le atoatoa e pei o Aperamo. Ua masalosalo ma fefe ne'i fasiotia o ia e Farao i Aikupito. Ona fai lea e Aperamo o se togafiti, ina ia fa'asaoina ai o ia. Ua fai Aperamo ia Sarai lona to'alua, aua nei ta'ua o ia o sana ava, ae ta'u o ia o lona tuafafine. Ona ave lea e Farao, Sarai e fai ma ana ava. Ae fa'auta, ua fa'atigaina e le Atua Farao ma lona aiga i mala tetele ona o Sarai. Ona ita lea o Farao ia Aperamo, ma fesili pe aisea na ia le ta'u atu ai o Sarai o lana ava. Se manu na te le avea Sarai e fai ma ana ava. On tuli ese lea e Farao o Aperamo ma Sarai ma ana mea uma. E iai le taimi e masalosalo ma fefe ai le tagata e ta'u le upu moni. A e na tumau pea le fa'amaoni ma le alofa o le Atua ia Aperamo. Ua fai lenei tala ma lu'itau, aua e fa'afia ona ou pepelo ina ia fa'asaoina mai a'u, mai lo'u to'alua. Ou te le o mafaufau foi pe i ai se aafiaga o si o'u to'alua i la'u pepelo. Po'o le a lava lo'u pepelo, e tumau pea le alofa ma le fa'amaoni o le Atua. Tusa lava pe ou te pa'u fa'afia, e toe fa'atu lava a'u i luga e lo'u Atua. O le mea lea na tusi atu ai Paulo i lana ekalesia i Koronito, E te agasala ea ona ua e iloa e toe fa'amagaloina oe e le Atua? E le o le mea lena na ou fai atu ai. Aua ne'i e toe agasala.

**Tatalo:** Fa'afetai tele le Atua e i lou fa'amaoni ia te a'u. **Amene!**

**Aso Gafua – Me 18: “Iakopo ma Esau” (Jacob and Esau)**

**Tusi Faitau – Kenese 32: 3-21**

**Matua – ff. 11, 12:** *“Ou te aioi atu, ia e lavea’i mai ia te a’u ai le lima o lo’u uso, o le lima lava o Esau; aua ou te fefe ia te ia, ina ne’i sau ia ma fasia a’u, ma tina, atoa ma fanau. Na e fa’apea mai fo’i, Ou te agalelei atu lava ia te oe, ou te faia fo’i lau fanau ia pei o le oneone i le sami, e le mafaitaulia ina ua tele.”*

O se galuega taua na faia e Iakopo ina ua fefe o ia i lona uso. Ua tatalo atu Iakopo i le Atua e lavea’i mai ia te ia ai le lima o lona uso o Esau. O lona uiga, o le tali o le fefe, o le tatalo. Aua o le Atua e te’a ai le fefe. Aua sa fefe Iakopo i lona uso matua, ona o lana agasala sa fai ia te ia. Ua ia fao ai i le tofi o le ulumatua i auala fa’atogafiti. Ona sola lea o Iakopo ma aumau ia Lapana, le tuagane o lona tina. Ma nonofo ai ma le fa’anau teine a Lapana, o Lea ma Rasela. Ua leva ni tausaga talu ona sola ese Iakopo, ae ua toe fetalai le Atua, e toe fo’i i lona aiga. Ae peita’i, e le o mautonu Iakopo po’o ita pea ma fia fasioti lona uso ia te ia. Ua ia aauina atu ai nisi o ana auauna ma le feau i lona uso o Esau. Ua toe fo’i atu auauna ma le tala, o lo’o sau Esau e fa’afetaia’i ia te ia i le ala, ma tagata e fagalau. Ona fefe ai lea o Iakopo, ua vaelua e ia lona aiga i ni vaega se lua. Ne’i mea ane ua fasia se vaega ona fa’asaoina lea o le isi vaega. A e fa’auta ina ua la feiloa’i, ua momo’e atu Esau ma fusi ia te ia, ma tu’u lona ulu i lona ua, ma la feasogi ma fetagisi i le fiafia. Ona fa’apea atu lea o Iakopo ia Esau, Ua ou iloa atu ou fofoga e pei o fofoga o le Atua (f.10).

**Tatalo:** Fa’afetai tele le Atua mo lou mana lavea’i. **Amene!**

**Aso Lua – Me 19: “O le Isaraelu” (The Israelites)**

**Tusi Faitau – Esoto 14: 10-14**

**Matua – f. 14:** *“O le a tau le Ali’i mo outou, a e fa’alologo outou.”*

Na fafagu a’u e se leo tele, o le pa’o o le faitoto’a, o lo’o fea’a, ma fetu’i e se tagata o lo’o taumafai e talepe i lalo le faitoto’a. Sa ou fefe ina ua ou vaai atu o le a malepe le faitoto’a ae ou te le iloa po’o ai o lo’o fia sau fa’amalosi i totonu. Ua vevela mai lo’u toto, ma ou valaau atu, “O le a vili le leoleo.” Sa ou vili atu ae fai mai le telefoni, “E sese le numera lea e te vili ina.” O lo’u fefe ma le gatete o o’u lima ua sese ai le numera. O le potu ou te nofo ai e tu i luga o le foga fale lima o se fale foga fale sefulu. E le mafai la ona ou oso i lalo, pe sola ese, pe lafi fo’i. E fa’apena le mea na tupu i le fanauga a Isaraelu, ina ua tau atu i le sami ulaula, a ua latalata atu Farao i o latou. Ua leiloa pe fa’apefea ona latou sosola. E le mafai fo’i ona vili se leoleo. Aemaise ai le faitio o tagata, sa sili ai lava ona latou nonofo pologa pea i Aikupito. Ae ua tali Mose, “Aua tou te fefefe, a ia outou laulau tutu ma vaai atu i le olataga mai le Ali’i, o le a faia e ia mo outou i le aso nei...O le a tau le Ali’i mo outou, a e fa’alologo outou.” Na matua’i malepe lo’u faitoto’a ae na tu le tamaloa ma tilotilo mai i totonu ae le’i sau i totonu o lo’u fale. Na toe alu ese le tamaloa i le alofa o le Atua.

**Tatalo:** Fa’afetai i lou laveaina o i matou mai tagata faomea ma le agasala. **Amene!**

**Aso Lulu – Me 20: “O le ‘au so’o” (The disciples)**

**Tusi Faitau – Mareko 4: 35-41**

**Matua – f. 40:** *“Se a le mea tou te fefefe ai fa’apea? Se a le mea tou te le fa’atuatua mai ai?”*

O le a sou lagona i a’oa’oga a Iesu? O ni a’oa’oga ea e a’oa’o mai ai le ita, po’o le alofa? Sa ou le fiafia i a’oa’oga a Iesu i se vaitaimi ona e fa’asaga tonu mai lava ia te a’u. Ua fai si umi o o’u tauivi pea ma lo’u fa’atuatua. O le upu fa’atuatua ou te fa’auigaina i le upu talitonu ona e faigofie ona ou malamalama ai. E pei o le fesili a Iesu i ona so’o, “Se a le mea tou te fefefe ai fa’apea? Se a le mea tou te le fa’atuatua mai ai?” O lo’o fia iloa e Iesu le mafuaaga o lo latou le fa’atuatua ia te ia. Aua ua latou le iloa o Iesu e pule i afa ma mea uma lava na faia e le Atua. Ua latou fafagu ai ia Iesu ae ua latou le fa’atuatua ia Iesu o lo’o fa’atasi ma i latou. O le taimi lava na fafati mai ai galu tetele ma ua sao mai i totonu o le va’a, o le taimi lava lona na latou popole vale ai, ma fafagu ia Iesu. O se fesili e lu’itau ai pea i tatou, “Se a le mea tatou te fefefe ai fa’apea?” Ua tali le tusi faitau o lena aso, o le fa’atuatua, tatou te maua ai le filemu.

**Tatalo:** Fa'afetai Iesu i le fa'atuatua ma le filemu ua matou maua. **Amene!**

**Aso Tofi – Me 21: “Peteru” (Peter)**

**Tusi Faitau – Ioane 18: 15-18, 25-27**

**Matua – ff. 26, 27:** *“Ua fai mai ia te ia le tasi auauna a le ositaulaga sili, o le aiga o le na tipiese lona taliga e Peteru, “Ou te le'i vaai atu ea ia te oe fa'atasi ma ia i le fanua? Ona toe fa'afiti atu lea o Peteru, ona vivini loa lea o moa.”*

Mo a'u, o le vivini o moa o le fa'aילו lea o le amataga o se aso fou. A o Peteru, o le vivini o moa o le faailo lea o lona toilalo. E le'i umi lava ona fai le ta'utinoga a Peteru ia Iesu, a e pu'eina loa Iesu, ma noanoa. Ona latou ave lea ia te ia ia Ana le tama o le ava a Kaiafa, le ositaulaga sili (18:12). Ma ua taunu'u ai le fetalaiga a Iesu ia Peteru, “E moni, e moni, ou te fai atu ia te oe, e le vivini moa, se'ia e fa'afiti fa'atolu mai ia te a'u (13:38).” Ou te manatu, na matua o'otia Peteru ma tagi aueue, i lona alofa ia Iesu, ina ua to'ia lona loto i le vivini o moa. Aua ua ia manatua, ua uma ona ia fa'afiti fa'atolu, i lona Ali'i. Ua matua uma lava le toa o le loto o Peteru i le tipi ese ina o le taliga o le auauna a le ositaulaga sili (18:10). A ua palaai ma ua fefe ne'i noanoatia o ia ma molia. E fa'apena fo'i a'u, ou te fai i le Atua o le a ou fa'amaoni lava ia te ia. A e i ai lava le taimi ou te le fa'amaoni ai, ma ou le faia lona finagalo. Ae fa'auta, na toe fa'aatoatoaina e Iesu le fa'atuatua o Peteru, ina ua toetu manumalo o ia. Ua ofo ina atu ai e Peteru lona soifua mo Iesu e fai ma ana Aposetolo.

**Tatalo:** Iesu, fa'afetai tele fa'amalosi mai. **Amene!**

**Aso Faraile – Me 22: “Iesu” (Jesus)**

**Tusi Faitau – Mareko 14: 32-42**

**Matua – f. 36:** *“Ua fa'apea atu, “Ava lo'u Tama e, e te mafaia e oe mea uma lava; Ia e aveeseina lenei ipu ia te a'u; a e aua le faia lo'u loto, a o lou finagalo.”*

Ou te le'i mafafuaina e toe fanau lo'u tina. Ae maise ai ua ma matutua ma lo'u tuagane o lo'o ma ao'oga i le Univesite. E le'i atoa se lima masina o tauave e lo'u tina lana pepe ae na fa'afuase'i ona fanau. Sa ou vaai i le tino o le tama'i pepe, o tama'i lima ma tama'i vae, o lo'o tau fa'aolaia i le falema'i. Sa ou tatalo i le Atua e alofa mai i le pepe ma lavea'i lona ola. Ae ua le mafai lava e togafiti a foma'i ona fa'amanava le pepe. Ua uma lona ola. Sa ou ita ma i le Atua. Pe aisea na le mafai ai e le Atua ona fa'aola i si o'u uso? E fitu masina o o'u ita pea. Ou te talitonu, e silafia e Iesu lo'u tiga. Aua sa o'o ia Iesu mafatiaga tetele ma puapuaga. Na ia valaau ai i lona tama, “Ava lo'u Tama e... ia e aveeseina lenei ipu ia te a'u; a e aua le faia lo'u loto ae o lou finagalo.” Ou te talitonu o se a'ioi a se tagata ua mafatia tele i ona puapuaga. Aua o le oti o le a o'o mai (14:34). E lu'itauina a'u e lenei fuaiupu (14:36). Aua e i ai le taimi ou te popole ai, pe a ou le tagolima. Ae ou te talitonuina pea i le Atua ma lona finagalo, aua e galulue mea uma lava mo le lelei o i latou uma o e fa'atuatua atu ia te ia.

**Tatalo:** Le Atua e, ia faia pea lou finagalo. **Amene!**

**Aso Toona'i – Me 23 : “Alofa” (Love)**

**Tusi Faitau – 1 Ioane 4: 16e-21**

**Matua – f. 18:** *“E leai se fefe i le alofa, a o le alofa atoatoa e fa'ate'aseina ai le fefe; aua e a le fa'asala le fefe; o le ua fefe, e le fa'aatoatoaina o ia i le alofa.”*

E matua i o'u lili'a lava, pe a ou tu i se mea maualuga. E tetete o'u vae ma gaogao lo'u manava i le palaai, pe a ou vaai mai i lalo, ne'i o'u pa'u o'u oti ai. Ou te le iloa pe aisea ou te fefe ai i mea maualuluga. Pe ou te alu i luga o se va'alele pe ou te tilotilo mai fo'i i lalo o se fale maualuga. E oso ai lo'u popole ma lo'u sela i lo'u fefe tele. O le mea lea na umi ai se taimi o o'u tauivi ma lenei fuaiupu, “E leai se fefe i le alofa, a o le alofa atoatoa e fa'ate'aseina ai le fefe; aua o le fa'asalaga le fefe; o le ua fefe, e le fa'aatoatoaina o ia i le alofa.” Tusa lava pe ou te faitau fa'afia i lenei fuaiupu, e le mafai lava ona ou manumalo i lo'u fefe i lo'u lili'a pe a ou tu i i mea maualuluga. O le a'oa'oga la mo a'u ua o'o mai, o lo'u fefe i mea maualuga, o se lapata'iga lelei lea mo a'u. Ia ou fa'aeteete nei o'u pa'u o'u tigaina,

pe oti ai fo'i. O lenei fuaiupu o lo'o fa'atautau i le taimi o le fa'amasinoga. Ina ia ou sauniuni ai, ne'i o'o mai le taimi ou te oti ai. Aua e le fa'ailogaina e le oti se tagata, po'o se taimi e o'o mai ai lana valaau i lo tatou ola. E faapefea la ona ou manumalo i le fefe i le fa'amasinoga ma le oti? O le tali o lenei fesili, o le alofa o le Atua e fa'ate'aeseina ai le fefe.

**Tatalo:** Fa'afetai tele le Atua i lou alofa ua malosi ai lo'u loto. **Amene!**

### **ALOFA TUNOA**

**Meaalofa fo'aifua a le Atua** (*God's gracious gifts*)

**Aso Sā – Me 24: “Agaga Paia; Aso Sā Penetekoso”**

**Tusi Faitau – Tito 3: 3-8** (*Holy Spirit; Pentecost Sunday*)

**Matua – ff. 4, 5:** “*A ua fa'aalia mai le agalelei ma le alofa i tagata o lo tatou Fa'aola le Atua, ona fa'aola mai ai lea o ia ia i tatou, e le ona o galuega o i le amiotonu sa tatou faia, a e tusa ma lona lava alofa i le fa'ateleina i le toefuataina ma le fa'afuina e le Agaga Paia.*”

Ua a'oa'o mai le tusi faitau o lenei aso, o le faaolataga o le meaalofa fo'aifua a le Atua mo i tatou uma. Aua e alofa le Atua ia i tatou uma. E le ona o a tatou galuega po'o se amiotonu a se tagata sa ia faia, ae ona o le alofa tunoa o le Atua na ia toe fuataina ma fa'afuina ai i tatou e lona Agaga Paia. O lona alofa mutimutivale ia i tatou na fa'amamaina ai o tatou agasala e ala i lona malii ma lona toetu manumalo. O lenei tusi, o lo'o fa'amanatu mai ai, o le Fa'aolataga o le toe fanaufuina lea o le agaga. Tatou te valaau atu ai i le Agaga Paia e afio mai ma nofofale i totonu o tatou loto ina ia tatou maua le ola fa'atasi ma ia. Ina ua le toe ola oe, le toe ola a'u, a o Keriso ua ola i totonu ia i tatou. O lea ia tatou talia ai Iesu Keriso e fai ma o tatou Ali'i Fa'aola. O le Agaga Paia o lo'o fai lea ma o tatou so'otaga ma le Atua. Ma o le Agaga Paia fo'i e liua ai o tatou loto ma avea i tatou ma tagata fou.

**Tatalo:** Fa'afetai tele le Atua i lou Agaga Paia. **Amene!**

**Aso Gafua – Me 25: “Fa'a'aupegaina e auauna atu”** (*Equipped to serve*)

**Tusi Faitau – 1 Koronito 12: 4-7**

**Matua – f. 4:** “*E matalasi mea alofa, a e tasi lava le Agaga ia*”

E lua ni fesili taua lava tatou te manatunatu loloto i ai. Muamua, o a ni meaalofa o le Agaga Paia ua fa'aa'upegaina ai i tatou e le Atua? Lua, E fa'apefea ona tatou fa'aaogaina meaalofa ua faaa'upegaina ai i tatou mo lona malo? O i le tagata lava ia lana tali. “Aua e matalasi mea alofa, a e tasi lava le Agaga ia.” O lo'o taualuga lenei tusi o Koronito i le alofa tunoa o le Atua. I meaalofa eseese a lona Agaga Paia, ua ia foa'i fua mai, e atina'e ai lana ekalesia. E le o ni meaalofa e mitamita ai, ae o meaalofa e fa'aaogaina ai mo le Atua, tatou te auauna atu ai, ma viia o ia. E le ona o so tatou lelei na tatou maua ai nei meaalofa, ae ona o le alofa tunoa o le Atua. O nei meaalofa uma e galulue fa'atasi mo le viiga o le Atua. E le mafai ai e le tasi meaalofa ona fa'apea atu i le tasi meaalofa, e le taua oe, pe le mana'omia fo'i oe. Aua o meaalofa uma mai le Agaga Paia, a galulue fa'atasi, i le viiga o le Atua. E le mana'omia e le Atua se tagata e manatu fa'apito, po o se tagata e vaai maualo i le isi tagata ona o meaalofa a le Atua ua ia maua. Ae ia lagona e le tagata lava ia lona loto maualo ma fa'apea ifo o i tatou lava o auauna le aoga, pe uma ona tatou faia se galuega.

**Tatalo:** Fa'afetai tele le Atua i meaalofa ua e foai mai. **Amene!**

**Aso Lua – Me 26: “Ua taunu'u ia Iesu le alofa tunoa o le Atua”**

**Tusi Faitau – Ioane 1: 9-17** (*God's grace fulfilled in Jesus*)

**Matua – f. 14:** “*Ua liu tino tagata le Upu, sa mau fo'i o ia ma i tatou, na matou matamata i lona mamalu; o le mamalu lava lea o le Alo e to'atasi o le Tama, ua tumu o ia i le alofa tunoa ma le fa'amaoni.*”

Ua liua o tatou loto i le matagofie ma le mamalu o Iesu Keriso. O lona mamalu o le fa'aailoga lea o le maualuga o lona alofa tunoa ma lona fa'amaoni. Ua taunu'u ai ia te ia le alofa tunoa o le Atua. Ua na fa'aolaina ai le tagata ua agasala. O lea, ia tatou vivi'i ma fa'afetai ai ia Iesu Keriso aua o ia o le upu na liu tino tagata. O lona alofa tunoa foi ma lona

malamalama e le mafai ona tatou masu'esu'eina. Aua e tulaga ese Iesu Keriso. Na molimau loane ia Iesu Keriso o ia o le upu na i le amataga, ma o ia fo'i o le upu na liu tino tagata. E le ina ia fa'aitiitia lona mamalu ae ina ia fa'a'ailoa atu i le lalolagi, lona mamalu atoatoa, o ia te ia lava o le tagata ma o ia foi o le Atua. E sili atu Iesu nai lo loane le papatiso po'o se isi lava tagata. Aua o Iesu na i le amataga o le foafoaga. O lona tumu ua tatou maua ai lona alofa tunoa. E lei vaai se isi i le Atua ae ua fa'a'ailoa mai le Atua e lona Alo o Iesu Keriso. Ua tumu o ia i le alofa tunoa ma le fa'amaoni.

**Tatalo:** Fa'afetai tele Iesu i lou alofa tunoa ma lou fa'amaoni. **Amene!**

### **Aso Lulu – Me 27: “O le tamaoaiga o le alofa tunoa o le Atua”**

**Tusi Faitau – Efeso 1: 3-10** (*The riches of God's grace*)

**Matua – f. 4:** “Fa'apei ona ia filifili mai ia i tatou ona o ia, a o le'i fa'avaeina le lalolagi, ina ia paia i tatou ma ia le mata'uleagaina i ona luma, i le alofa.”

O le alofa tunoa o le Atua e tamaoaiga. Aua e le tasi se mataupu o lo'o fa'asoa mai ai Paulo i lana tusi i Efeso. O mataupu ia ia, o le Atua na te silafia le taunu'uga o le tagata ae le'i fanau mai (*predestination*), o le avea ma tama fai (*adoption*), o le atali'i (*sonship*), o le togiolaina (*redemption*), fa'amagaloga (*forgiveness*), poto (*wisdom*), malamalama (*understanding*), fa'amoemoega ma le lotogatasi (*purpose and unity*). O le tele ia o manatu o lo'o tu'u fa'atasi e Paulo i se mataupu e tasi. Ae o le auga o lona tusi atu fa'apea, ia fa'a'ailoa atu i Efeso le mata'utia ma le ofoofogia o le Atua. Ina ia mafai ona tutu fa'atasi le au kerisiano i Efeso i le loto ma le agaga e tasi ia Iesu Keriso. O lenei tusi e mafai ona fa'atusa i se ato e tumu i fua o laau aina. E tele manatu autu, tele foi mataupu silisili e filifili ma mafaufau loloto i ai, fa'aopoopo i ai ma le galulue fa'atasi, ma le loto e tasi, ma le avea ai ma so'o o Iesu. O le oa fa'alelalolagi e le mafa'atusatusaina i le oa fa'alegaga. Aua ua tatou tamaoaiga i le oa fa'alegaga, i le fa'atuatua ia Iesu Keriso, ma le mautinoa, o lona maliu ma lona toetu manumalo i le satauro, na fa'amagaloina ai a tatou agasala. Ina ia tatou maua le ola. O mealofa na o le alofa tunoa o le Atua na ia foa'i mai mo i tatou uma. Tatou te filifili ai po'o fea le fua o le Agaga o lo'o tatou aai ai.

**Tatalo:** Fa'afetai tele le Atua i lou alofa tunoa ua matou mauoa ai. **Amene!**

### **Aso Tofi – Me 28: “Na fa'aalia le alofa tunoa i le galuega tala'i a Iesu”**

**Tusi Faitau – Mareko 5: 25-34** (*Grace expressed in Jesus' ministry*)

**Matua – f. 30:** “Ua silafia loa e Iesu i lona lava finagalo, ua alu atu le mana nai ia te ia, ona faliu lea o ia i le motu o tagata, ua fa'apea atu, “Po o ai ea na pa'i mai i o'u ofu?”

Ua fa'aalia le alofa tunoa i le galuega talai a Iesu, ina ua malolo le fafine puna toto, i le taimi lava na pa'i atu ai o ia i lona pito ofu. Ua silafia e Iesu ua alu atu le mana nai ia te ia, ona faliu lea o ia ma fesili i le motu o tagata, “Po'o ai lea na pa'i mai i ona ofu?” O le mata'utia lea ma le ofoofogia o lenei tala. Aua ua fetalai atu Iesu i le fafine puna toto, “Lou afafine, o lou fa'atuatua ua e malolo ai. Ina alu ia oe ma le manuia, ma ia e malolo i lou ma'i tiga.” Ua utu lona puna toto, ma ua malolo. E le o ta'ua le igoa o lenei fafine, ae e sefulu lua tausaga o fesaga'i pea lenei tina puna toto ma le maasiasi i lona ma'i. E le gata i le tele o tausaga o tiga ma maasiasi, a e o le tele fo'i o ana oa na fa'aalu i le tologiina o foma'i, ae le'i aoga ia te ia. Sa lagona ai e lenei tina lona popole po'o fea e saili manuia i ai. Ae na fa'alogo loa ia Iesu, ona alu loa lea, ma lona mautinoa. O le taimi lava na pai atu ai le fafine puna toto i le ofu o Iesu, o le taimi fo'i lona na iloa ai o ia e Iesu. O se tina sa le tauoloaina, a'o lea ua gau'a'i atu i ai le finagalo o Iesu na te fia iloa po'o ai lea na pai atu ia te ia. Ua fa'afeiloa'i e le alofa tunoa le atuatuvaale o lenei tina, ma fa'amalolo e Iesu ona puapuga.

**Tatalo:** Fa'afetai tele Iesu i lau fa'amalologa. **Amene!**

### **Aso Faraille – Me 29: “O le alofa tunoa ua tatou maua ai le fa'aolataga”**

**Tusi Faitau – Efeso 2: 4-10** (*By grace we find salvation*)

**Matua – f. 5e:** “O le alofa tunoa ua fa'aolaina ai i tatou.”

O lo o a'oa'o mai le Efeso 2:4-10, o le fa'aolataga o le mealofa foai fua a le Atua mo i tatou, ona o lona alofa tunoa. E le ona o se lelei o se tasi, po'o se lelei o a tatou galuega, ae ona o le alofa tunoa o le Atua, ua tatou maua ai le ola, ona o le fa'atuatua. Na fasioti i tatou e le agasala, ae ua toe fa'aolaina i tatou e le Atua i lona alofa tunoa. A e le i o'o mai le fa'aolataga, na ola le lalolagi i le agasala ona o le tino ma ona tu'inauga. Ua fa'amalieina ai e le tagata agasala manaoga o le tino. A e ona o le aao lavea'i o le Atua, e tumu ia i le alofa ma le alofa mutimutivale, na ia saunia ai le fa'aolataga mo tagata uma lava, e ala i le maliu ma le toetu manumalo o Iesu Keriso. O le fa'aolataga o le mealofa foai fua a le Atua e ala ia Iesu Keriso, o le mea lea e le mafai ai ona mitamita se tasi ma faapea ifo, o a'u lava na mafua ai ona ou maua lea lelei. O *John Newton* na tusia se pese lotu lauiloa i le lalolagi ua fa'aigoaina o le *Amazing Grace*. O lo o ia fa'amatalaina ai i upu o lana pese le alofatunoa o le Atua, ua toe fa'aolaina ai o ia.

**Tatalo:** Fa'afetai tele le Atua i lou alofa tunoa ma lau fa'aolataga. **Amene!**

### **Aso Toona'i – Me 30: “O le faiva o le fa'aleleiga”**

**Tusi Faitau – 2 Koronito 5: 17-21** (*A ministry of reconciliation*)

**Matua – f. 18:** “*O mea uma fo'i mai le Atua ia, ua uma ona fa'aleleia e ia o i tatou ia te ia e ala ia Iesu Keriso, ua tu'uina mai fo'i ia te i matou le galuega o le leleiga.*”

O lo o fa'amatala mai e le 2 Corinthians 5:17-21 le fa'aleleiga a le tagata ma le Atua e ala i le maliu ma le toetu manumalo o Iesu Keriso i le satauro. O i latou o lo o ia Keriso o tagata fou. Ua mavae atu le ola tuai ae ua o'o mai le ola fou. Ua avea ai i latou ma avefe'au o le tala lelei latou te faia le faiva o le fa'aleleiga i le lalolagi. Ua mafai ona faia lenei fa'aleleiga ia Iesu Keriso, aua na le iloa e Iesu se agasala. Ae fa'auta, ua fai Iesu ma agasala e le Atua, ina ia avea i tatou ma amiotonu a le Atua. Ona o Iesu Keriso, ua fa'alelei, ma fa'amagaloina, ma ua le toe manatuaina e le Atua le agasala a le lalolagi ua salamo ma taliaina Iesu e fai ma o latou Ali'i Fa'aola. Ma ua valaauina i tatou uma e fai ma ave feau a le Atua, tatou te faia le faiva o le fa'aleleiga, i tagata uma o le lalolagi. Ina ia latou iloa, o lo'o i ai le avanoa, e toe fa'alelei ai le latou mafutaga vavalalata ma le Atua, e ala i le salamo ma le fa'atuatua ia Iesu Keriso. O *John Wesley* sa le lelei ma lona uso o *Charles Wesley* ona o se tama'itai na la fia fa'aipoipo uma i ai. E tele ni tausaga ua mavae, fa'ato'a toe fa'alelei lea au uso, ina ua tupu se fa'alavelave ia *John Wesley* ma toetiiti lava a oti ai. O se fa'aleleiga e le o se mea e faigofie ona fai, se'i vagana lava ua liua moni e le Atua le lotu o le tagata e mafai ai ona ia fa'amagalalo i le isi tagata o lo'o ia ita i ai.

**Tatalo:** Fa'afetai tele le Atua mo lau fa'aleleiga. **Amene!**

## **ALOFA TUNOA**

**Taliaina ma Foa'iina** (*Receiving and giving*)

### **Aso Sa – Me 31: “O se ufiufi fofoga ua aveesea”** (*A veil removed*)

**Tusi Faitau – 2 Koronito 3: 7-18**

**Matua – f.17:** “*O le Ali'i fo'i o le Agaga ia; o le mea o i ai le Agaga o le Ali'i, o i ai le sa'olotoga.*”

O lo o fa'amatala mai e le 2 Koronito 3:7-18 le eseese o le mamalu na susulu mai i fofoga o Mose i le Feagaiga Tuai ma le mamalu o Iesu Keriso i le Feagaiga Fou. Na ufiufi e Mose ona fofoga i le ie, aua ua le mafai ona pulato'a atu i ai le fanauga a Isaraelu ne'i oti i latou. A o Iesu, a tatou va'ai ia te ia i lona malamalama, e le ufitia o tatou mata. Aua o lona pupula, e maua ai e i tatou uma le ola. O le Feagaiga Tuai o lo o fa'atauaina le tulafono, e le tumau, ma o lona i'uga lava, o le oti. A o le Feagaiga Fou, o lo'o fa'atauaina ai le Agaga Paia, tatou te maua ai le saolotoga, le mamalu, ma le ola e fa'avavau. Sa i ai se tasi tina ma si ana tama na fa'atalosaga i le latou ekalesia, e fia nofo totogi i le fale o le galuega, ona ua manana'o nai tagata o totoe o le ekalesia e tapuni le lotu. Aua ua leai ni tagata o le aulotu, ma ua le mafai fo'i e i latou ona totogi le faifeau. Ona fa'apena lea ona fai. Ae na vaai loa nisi o le aulotu i luga o le tusi foliga ua pu'e atu ata o si tina lea i le fale o le ekalesia ma nisi o tina ma a latou fanau o lo'o fai ai se latou aiga fiafia o le aso fanau, feosofi mai loa

ma fesili mai e manana’o e toe amata ona fai se aoga Aso Sa. Ua alu ese o latou ufiufi mata, ae matala le latou vaai i auala e toe fa’aleleia ai le latou ekalesia.

**Tatalo:** Fa’afetai le Atua i lou tatalaina o matou ufi mata. **Amene!**

**Aso Gafua – Iuni 1: “E fesoasoani le alofa tunoa o le Atua i o tatou vaivaiga”**

**Tusi Faitau – 1 Koronito 2: 1-5** *(God’s grace helps in our weakness)*

**Matua – f. 4:** *“E le’i sauni atu fo’i la’u upu, i la’u tala’iga i upu malie o le poto o tagata, a e peita’i o le fa’asino mai e le Agaga ma le mana.”*

Na a’oa’o atu Paulo i se gagana faigofie ona malamalama ai tagata i le fa’asatauroina o Keriso. E lei tala’i atu Paulo i upu malie po’o le poto o tagata, ae na talai atu i le Agaga ma le mana o le Atua. O le fa’atuatua moni e sau mai le mana o le Agaga o le Atua, ae le o le poto fa’aalialia vale o tagata. O le mea lea e le’i taumafai ai Paulo e fa’a’ofo le ekalesia i Koronito i ni ana upu mai lona lava tomai fa’aletagata. Ae na ia fa’amalosi atu, o le fa’atuatua ua latou maua, e afua mai i le mana ma le Agaga o le Atua. E le’i mana’o Paulo e ta’u atu se isi lava mea, ua na o Iesu Keriso lava ma lona fa’asatauroina. Ina ia aua nei tuua lo latou fa’atuatua i le poto o tagata, a o le mana o le Atua. Aua e fesoasoani le alofa tunoa o le Atua i o tatou vaivaiga. Sa fai se aoga Tusi Paia a le mafutaga a tina e valaaulia uma ai tagata o le nu’u, ma tagata e le masani ona omai i le lotu. Fai mai o le to’atele o tagata o le nu’u e le o i ni lotu, ae fiafia e mafuta mai i lenei mafutaga e a’oa’o ai le Tusi Paia. E mafai ai fo’i ona fefa’asoa’i i fa’afitauli o lo’o tutupu i totonu o latou aiga, ma latou tatalo fa’atasi ai ina ia fa’afo’ia ia fa’afitauli. Fai mai le molimau a le to’atele, e sili atu lo latou fiafia i lenei mafutaga ona e amanaia ai o latou lagona, ma fa’amalosi atu ia i latou le upu a le Atua.

**Tatalo:** Fa’afetai tele le Atua i le mana o lau upu ma lou Agaga Paia. **Amene!**

**Aso Lua – Iuni 2: “Tuputupu a’e i le malamalama”**

**Tusi Faitau – Kolose 1: 3-12** *(Growing in understanding)*

**Matua – f. 9e:** *“Ma te aioi atu fo’i ina ia atoatoa ona outou iloa lelei o lona finagalo i le poto uma atoa ma le mafaufau fa’aleagaga.”*

E lei tuua lava e Paulo lona tatalo atu pea mo se fa’alapotopotoga e lei feiloa’i muamua atu i ai. Aua na fa’alogo Paulo, o le ekalesia i Kolose, e fiafia i le ola fa’aleagaga, e fa’atuatua fo’i ia Keriso Iesu, ma e loto alolofa fo’i i le au paia uma lava. Aua ua talitonu le ekalesia i Kolose i le fa’amoemoe o lo’o teu e le Atua mo i latou i le lagi. Aua ua latou fa’alogologo i le tala lelei, ma latou talia le alofa fa’amaoni ma le alofa tunoa o le Atua mo i latou e ala ia Iesu Keriso, i lona maliu ma lona toetu manumalo i le oti. Ua lagona ai e Paulo lona loto fa’afetai tele i le Atua ona o le fiafia o le ekalesia i Kolose e tatalo ma le loto fa’afetai i le Atua i aso uma. Na tatalo atu foi Paulo ina ia fa’atumuina i latou i le poto mai le Atua ma ola malamalama i le finagalo o le Atua. Ma ia latou ola i se olaga e fiafia i ai le Atua. Ia fua mai ni fua lelei i a latou galuega ua faia ma le poto mai le Atua. Ma ia fa’amalosi atu pea le mana o le Atua latou te maua ai le onosai ma le filemu o le Ali’i i taimi latou te fetaia’i ai ma luitau o lenei olaga. Ma ua fa’afetai atu ai Paulo ina ua avea i latou ma sulii o le au paia i le malo o le malamalama.

**Tatalo:** Fa’afetai tele le Atua i le poto ma le mafaufau fa’aleagaga. **Amene!**

**Aso Lulu – Iuni 3: “O le agalelei o le foa’i atu”** *(The grace of giving)*

**Tusi Faitau – 2 Koronito 9: 1-7**

**Matua – f. 7:** *“Ia ta’ito’atasi ma foa’i e pei ona filifili i lona loto; aua ma le tiga, aua fo’i ma le fa’atauanauna; aua e alofa le Atua i le ua foa’i ma le loto malie.”*

E i ai le talitonuga, e fa’ateleina e le Atua le alofa tunoa i le tagata e foai ma le loto malie, ma le loto fiafia. Aua e fia silasila le Atua i le loto pe moni le agaga o le foa’i. E le taua i le Atua le tele o le foai, ae taua i le Atua le loto fia foa’i atu ma le loto malie. Aua e i ai le to’atele e foa’i ona o viiga fa’aletagata. E i ai foi nisi e foa’i ma le tiga ma le fa’atauanauna, ae le o le finagalo lena o le Atua. Aua fo’i, o le alofa tunoa o le Atua na ia foai mai ai lona Alo Pele e to’atasi e maliu ma toetu ina ia ole le lalolagi uma e fa’atuatua atu ia te ia. E i ai

se aulotu na fai se latou su'egatupe mo le au ta'aalo a latou fanau. Ae na tete'i i latou i le to'atele o tagata e le aulotu ia i latou, ae na latou foa'i se tupe tele lava mo le fanau ta'aalo. Fai mai le latou molimau, o lenei aulotu sa fesoasoani tele mo i latou i le vaitaimi o le koviti. O se vaitau na latou mana'omia ai se fesoasoani tau mea'ai. O lea la ua latou fiafia ai e toe foa'i atu mo le fanau ta'aalo, ona sa mua'i alolofa atu lenei aulotu ia i latou.

**Tatalo:** Fa'afetai tele le Atua i lau foa'i o le alofa tunoa. **Amene!**

**Aso Tofi – Iuni 4: “Agaalofa i se mafutaga”** (*Grace in relationship*)

**Tusi Faitau – 2 Samuēlu 9: 1-7**

**Matua – f. 7:** *“Ona fai ane lea o Tavita ia te ia, Aua le fefe, aua ou te agalelei lava ia te oe, ona o Ionatana lou tama; ou te toe tu'u atu lava ia te oe le fanua uma o Saulo lou tama; a o oe, ta te aai fa'atasi ma a'u i la'u la'o'ai e le aunoa.”*

O le alofa tunoa o le Atua na agalelei ai Tavita ia Mefiposeta le atali'i pipili o Ionatana. Ona o le la Feagaiga na osia ma Ionatana, ua toe tu'u atu ai lava e Tavita fanua o Saulo ia Mefiposeta ma ua fai fo'i le laulau 'ai a Tavita ma laulau 'ai a Mefiposeta. O le alofa o Tavita ia Mefiposeta ua atagia ai le alofa tunoa o le Atua i le lalolagi agasala. Aua, e le i saili atu Tavita ia Mefiposeta ina ia taui atu ia te ia le agaleaga o Saulo, i lona fia fasioti ia te ia. Ae na agalelei atu Tavita ia Mefiposeta ma toe fa'af'o'i atu ia te ia le mamalu e tatau ai mo le aiga tupu, ona o lona alofa ia Ionatana. Ma, o le agalelei o Tavita ia Mefiposeta, ua atagia ai le alofa tunoa o le Atua, i lona loto fa'amagalo. O le alofa tunoa o le Atua na saili atu ai Tavita pe o i ai se tagata o le aiga o Saulo o totoe po o soifua pea. Aua o le natura lea o le Atua, e saili mai pea mo e ua leiloloa. E toe fa'afouina foi e le Atua lana mafutaga vavalalata ma ona tagata pe a salamo ma toe fo'i atu ia te ia. Ua avea ai Iesu Keriso ma alofa tunoa o le Atua, i lona maluu ma lona toetu manumalo i le oti, ua maua ai e le lalolagi fa'atuatua le malo o le Atua. Fa'amata la e atagia le alofa tunoa o le Atua ia i tatou pe a tatou alolofa atu i e ua agaleaga mai ia te i tatou?

**Tatalo:** Fa'afetai tele le Atua i lou alofa tunoa. **Amene!**

**Aso Faraile – Iuni 5: “O le lu'i o le alofa tunoa”** (*The challenge of grace*)

**Tusi Faitau – Luka 6: 27-31**

**Matua – ff. 30, 31:** *“Ina avatu ia i tagata uma o e ole mai ia te oe; o le fao i au mea, aua e te toe aamiina atu. Pei ona outou loto i tagata ona ia latou faia ia te outou, ia fa'apea lava ona outou faia ia te i latou.”*

O le lu'i o le alofa tunoa, o le fesili lea o oe lava ia te oe, pe mafai ona e agalelei atu i e ua fai oe ma o latou fili. E pei o tagata ua falepuipui ona o solitulafono. O le a sa tatou vaai i pagota ua tatala mai ua magalo, ae lolotu mai ia tatou? O tagata sa falepuipui i le fasioti tagata, mulilua, fa'amalosi teine, gaio, po'o le a lava le agasala. Aemaise pe afai na latou faia se mea leaga ia i tatou po o nisi o tatou aiga? O le lui lea mo i tatou, pe tatou te toe alolofa atu i e sa fai ma o tatou fili. O a'oa'oga ia a Iesu, ina ia tatou alolofa atu i e ua fai tatou mo o latou fili. Aua ua fetalai mai Iesu, ia tatou agalelei atu i e ita mai ia te i tatou, ia tatou fa'amanuia atu fo'i i e fetu'u mai ia te tatou, ma ia tatou tatalo foi mo e tu'ua'i fua mai ia te outou. Ma ia liliu atu le isi alafau pe a po mai le isi alafau. E mafai ea ona tatou faia? O lui lena o le alofa tunoa ina ia tatou faia mo le isi tagata se mea lelei e te mana'o i le isi tagata na te faia mai mo i tatou. O le tulafono fa'aauro lena a Iesu. O mea uma ia a tatou faia ona atagia lea o le Atua ia i tatou. Aua o le Atua o le Atua alofa, o le Atua fa'amagalo, ma o ia lava o le Atua o le alofa tunoa. Na ia auina mai ai lona Alo Pele e to'atasi ina ia le fano se tasi e fa'atuatua ia te ia.

**Tatalo:** Fa'afetai tele le Atua i lou alofa tunoa. **Amene!**

**Aso Toona'i – Iuni 6: “O mea uma tatou te mana'omia”**

**Tusi Faitau – 2 Peteru 1: 3-8** (*Everything we need*)

**Matua – ff. 7, 8:** *“...ia fa’aopoopo fo’i le fealofani o le au uso i le amio Atua, o le alofa fo’i i le fealofani o le au uso. Aua pe a maua e outou ia mea, ma ua fa’ateleina, ona avea ai lea o outou ma e ua le paie, a o e fua mai le iloa lelei o lo tatou Alii o Iesu Keriso.”*

Sa i ai se tasi tama e leai sona aiga ma e nofonofo solo i le auala tele ma aisi i tagata. E i ai la le aso na savali atu ai se faifeau i le auala, ae valaau atu le tama lea ma savali atu ia te ia. Ona tu lea o le faifeau ma fa’atali se’i o’o atu po’o le a se mea e mana’o ai. O le manatu na oso mai i le faifeau, masalo fo’i e fesili atu le tama lea i se tupe. Ae fa’auta, na alu atu lenei tama e leai se aiga ma talosaga atu mo se tatalo mo ia. Ona pai atu lea o le faifeau i lona tauau ma tatalo. O se galuega pito sili lea ona taua i le Atua. E i ai le taimi e mana’omia ai e le tagata se tatalo po’o se fesoasoani, ae o lo’o i ai lana au faigaluega latou te tali atu i se manaoga. O lo’o fa’amalosi mai lenei tusi, 2 Peteru 1:3-8, e mana’omia lo tatou iloa lelei o le Atua, i lona mamalu ma lona silisili ese. E mana’omia fo’i lo tatou amio Atua ma uiga fa’atasi ma le Atua. Aua e maua ai e i tatou le ola. A tatou maua ia mea uma, ona tatou fua tele mai lea ma le i’u vale. Ae tatou te ulufale atu i le malo e fa’avavau o lo tatou Alii Fa’aola o Iesu Keriso.

**Tatalo:** Fa’afetai tele le Atua i lou fa’amalosi mai pea. **Amene!**

### ISAIA 1-39

#### Lavea’i mai i le fa’amasinoga *(Rescued from Judgement)*

**Aso Sā – Iuni 7: “Omaia se’i tatou fefa’asoa’ai” *(Come now let us reason)***

**Tusi Faitau – Isaia 1: 10-20**

**Matua – ff. 16, 17:** *“Ia fafano ia outou, ina fa’amama ia outou; fa’ate’a ese ia a outou galuega leaga i o’u luma, soia tou te fai mea leaga. Ia outou fa’amasani i le amio lelei, sailiili ia i le fa’amasinoga; ia outou fa’asaoina le ua sauaina, ia outou fa’amasino i le ua matuaoti, ia outou finau mo le fafine ua oti lana tane.”*

Ua ala atu i le perofeta o Isaia le valaau atu a le Atua i le fanauga a Isaraelu. Ia latou omai se’i o latou fefa’asoa’i ma ta’u atu ia i latou lona le fiafia ma lona inoino i a latou osiga taulaga. Aua ua latou omai i ona luma ma taulaga e tele ae le aoga. O taulaga mu ma mea manogi, ae ua latou le iloa le Atua. Ua tupu tele le agasala le amio leaga ma ua latou inoino i le paia o le Atua. O se avega mamafa lea i le Atua, ma o lo’o fia fa’ailoa atu e le Atua, a fa’aloaloa atu o latou lima ma tetele atu a latou tatalo, e alo ese ona fofoga ma i latou. Aua ua tumu o latou lima i le toto. O lea ia latou fafano ai ma fa’amama o latou lima, ona o mea leaga o lo’o latou faia. A ia latou amio lelei, ma sailiili i le fa’amasinoga tonu, ia latou laveai atu i e ua fa’asauaina, ia latou puipui atu i e ua matua oti, ma ia latou finau mo le fafine ua oti lana tane. O le finagalo o le Atua, ia latou ola fa’amamaina, ma toe fa’afouina ia latou mafutaga vava lalata ma ia.

**Tatalo:** Fa’afetai tele le Atua i lau upu faasoa. **Amene!**

**Aso Gafua – Iuni 8: “I le aso e gata ai” *(In the last days)***

**Tusi Faitau – Isaia 2: 6-18**

**Matua – f. 11:** *“E fa’amaualoina mata fa’asiasia o tagata nu’u; e fa’amaualoina fo’i le fa’amaualuga o ali’i; na o le Ali’i lava e viia i lea aso.”*

O lo’o lapatai atu Isaia i le aiga o Iakopo o loo tumu i le fa’amaualuluga, ifo i tupua, ma le fia pule i tagata na faia e le Atua. Aua o le a o’o mai le aso e gata ai, o le aso o le Ali’i, e fa’amaualoina ai i latou. E o’o lava i e fa’asiasia, ma e fa’amaualuga uma lava, o ali’i atoa fo’i ma e o fa’afefeteina uma. E na o le Ali’i lava e viia i lea aso. Aua o le a o’o mai le fa’amasinoga, e fa’amasinoina ai e o lo’o amio leaga ma sau i isi tagata. Ae o le a fa’asa’olotoina i latou o e loto maulalo. Ua liliu ese fofoga o le Atua ona ua latou ifo i tupua o nu’u ese, ma latou tapuai i tupua na ta i o latou lima. E pei o le apoapoaiga a Paulo i le ekalesia i Filipi 2:3-8. Ina ia aua lava nei faia se mea e tasi ma le finau vale, ma le mitamita fua; a ia ta’itasi i latou ma manatu ma le loto maulalo, ua sili nisi ia te ia. Ia ia te outou fo’i lenei manatu o ia Keriso Iesu, e le’i manatu o ia e tulaga tutusa ma le Atua. A ua sasa’a atu

o ia e ia lava, e fai mona le uiga o le pologa, i lona fanau mai fa'apei o tagata. A o iloa o ia i ona foliga e fa'apei o se tagata, ua fa'amaulalo o ia e ia lava, ua na anaana ua o'o ina maliu, o le maliu lava lea i le satauro. O le mea lava lea ua matua fa'aeaina ai o ia e le Atua, ma foaina atu ai ia te ia o le suafa e silisili i suafa uma lava. Ina ia to'otuli o tulivae uma lava i le suafa o Iesu; o e o i le lagi, ma e o i le lalolagi, ma e o i lalo o le lalolagi; ma ia ta'uta'u atu e laulaufaiva uma lava o Iesu Keriso o le Ali'i lava ia, ia i'u ai i le viiga o le Atua le Tama.

**Tatalo:** Fa'afetai tele le Atua i lou alofa lavea'i ia i matou. **Amene!**

**Aso Lua - Iuni 9: "Ua tausuai Ierusalem"** (*Jerusalem stumbles*)

**Tusi Faitau - Isaia 3: 1-15**

**Matua - f. 8:** "*Aua ua tausuai Ierusalem, ua pa'u fo'i luta; aua o latou laulaufaiva ma a latou amio, ua o'o ia i le Ali'i e fa'aonoono ai i luma o lana afio.*"

O le a o'o mai le fa'amasinoga e fa'aumatia ai luta ma luitaia ona o le agasala. Aua ua tausuai Ierusalem ma ua le mautonu ona o a latou amio ma o latou laulaufaiva ua fa'aonoono i le Ali'i. O le a fa'avaivaiina e le Alii i latou. O le a aveeseina e le Atua o latou ta'ita'i ae pulea e tama iti i latou. O e amio leaga o le a malaia i latou, a e manuia i latou o e amiotonu. A e tula'i mai le Ali'i e fai le finauga mo e matitiva, aua ua latou fa'aumatia o latou tovine ma faoa a latou mea totino. E aveeseina e le Ali'i lagolago uma. O le a tupu le fao mea ma le mana'o tele ona o le agasala. O le fa'amaualuluga o fafine Siona o le a fa'alumaina. Ua matua inoino le Atua i lo latou manatu fa'amaualuga ma le le usiusita'i. O le a ave ese ina ai le manuia ma i latou. O le a oge vai ma leai se mea e 'ai. E fa'apena se aiga mauoa na fa'aleagaina a latou meatotino uma, o le latou fale, ta'avale, fanua, ma le fa'atoaga, i se lolo vai na fa'afuasei ona tafe mai. Ma ua fa'afuase'i ai ona aveesea le manuia o le Atua na latou maua ma ola ai. Ua latou molimau ai, e le te'i te'i tupu fua nei fa'alavelave ma o'o mai le fa'amasinoga a le Atua, ae ona ua latou o ese ma fouvale i le Atua.

**Tatalo:** Fa'afetai tele le Atua i lau fa'amasinoga tonu. **Amene!**

**Aso Lulu - Iuni 10: "O le lala a le Ali'i"** (*The branch of the Lord*)

**Tusi Faitau - Isaia 4: 2-6**

**Matua - ff. 5e, 6:** "*aua e i ai le mamalu i luga o le matagofie uma. E i ai fo'i le fale apitaga e fai ma paolo i le ao ona o le vevela, e fai fo'i ma mea e malu ai, ma mea e ulu ai i le timuga ma le uaga.*"

O le lala o le Ali'i, ua fa'asino lea i le Mesia, O Iesu Keriso, o le a fai ma fa'amoemoe ola mo i latou i tua atu o le fa'amasinoga. Aua na o'o mai le fa'amasinoga ona ua latou le usiusita'i, fouvale, ma fa'aonoono i le Atua. A'o lea ua saunia e le Atua se fa'amoemoe mo i latou e ala i le Mesia. O ia te ia le mamalu ma le matagofie uma lava. O ia fo'i o le fale apitaga e fai ma paolo ona o le vevela, e fai fo'i o ia ma mea e malu ai, ma mea e ulu atu ai i le timuga ma le uaga. Sa le fiafia le Atua ma aveese lana puipuiga i le fanauga Isaraelu, a o lea ua toe faia e le Atua le auala e toe malu ai i latou. O le ata lena o le Atua alofa, e fa'apaolo mai ona aao alofa i aso vevela, e fai fo'i ona aao ma fale apitaga e malu ai i tatou uma ai uaga ma timuga. Ua fai fo'i lea ma fa'ataitaiga mo i tatou, ina ia aveia i tatou ma fale apitaga e malu ai isi tagata o lo'o fia maua se fesoasoani. O ai lava se e sulufa'i mai mo se lavea'i, ia fai i tatou ma fa'aolataga. Aua o Iesu lava o le Fa'aola, o le lala a le Ali'i, le Keriso, na mua'i alofa mai ia i tatou uma. I lona maliu ma lona toetu manumalo i le oti, ina ia le fano se tasi e fa'atuatua ia te ia, a ia maua e i tatou uma le ola e fa'avavau.

**Tatalo:** Fa'afetai tele le Atua i lau fa'aolataga. **Amene!**

**Aso Tofi - Iuni 11: "Pese o le tovine"** (*Song of the vineyard*)

**Tusi Faitau - Isaia 5: 1-7**

**Matua - f. 7:** "*Aua o le tovine a le Ali'i o 'au, o le aiga o Isaraelu lea, o tagata o luta fo'i, o lana fa'atoaga lea na ia fiafia i ai; na ia fa'atalitali i le fa'amasinoga, fa'auta fo'i, o le fasi tagata; na ia fa'atalitali i le amiotonu, fa'auta fo'i, o le uio.*"

O le pese o le tovine o lo'o fa'amatalaina ai se fa'atoaga fa'apelepele. Ae ui lava i tausiga lelei uma, ua fua mai ai lava vine leaga. O lenei pese e fa'atatau i le le fiafia o le Atua i lana tovine, o le aiga o Isaraelu lea, o tagata luta fo'i. O lana fa'atoaga na ia fiafia i ai; na ia fa'atalitali i ai i le fa'amasinoga tonu, a e fa'auta, ua latou fasioti tagata; na ia fa'atalitali i le amiotonu, fa'auta fo'i, o le uio ma le tagi aue. I lenei lalolagi o lo'o tatou soifua ma ola ai, o lo'o tatou feagai pea ma fa'afitauli o fete'enaiga ma faiga le tonu. O lo'o lu'i tau mai ai pea lenei pese, i le finagalo o le Atua, ia tatou maua le ola e fa'avavau ae le o le oti e fa'avavau. Ia atagia ia i tatou lona filemu ma lana amiotonu. Ma ia gatasitasi a tatou fa'atinoga ma le finagalo o le Atua. Ia tatou tatalo atu fo'i mo e o fia maua se fesoasoani. Ma ia maua e i tatou uma le manuia ma le filemu o le Atua. Aua o le Atua lava o lo tatou tovine, o lo'o ia tausi lelei mai ia i tatou. Ma lona fa'amoemoe, ia fua mai ia i tatou ni fua e lelei, o fua o le alofa, ma lana amiotonu ma lana fa'amasinoga tonu. O ai ea se ua maua le amiotonu a le Atua?

**Tatalo:** Fa'afetai tele le Atua i lau puleto ma lou pule faasoifua. **Amene!**

**Aso Faraile – Iuni 12: “O le valaauina o Isaia” (Isaiah’s commission)**

**Tusi Faitau – Isaia 6: 1-13**

**Matua – f. 7:** *“Na ia fa’apa’i mai ai i lo’u gutu, ma fa’apea mai, Fa’auta, ua papa’i atu lenei mea i o’u laugutu, ua aveeseina ai la’u amio leaga, ua fa’amagaloina fo’i la’u agasala.”*

Na vaai Isaia i le paia o le Atua i se fa'aliga. O serafi ua fa'apea ane, "E paia, e paia, e paia le Ali'i o 'au; ua tumu le lalolagi uma i lona mamalu. Ona lagona ai lea e Isaia lona eleelea ma lona le tusa ai. Ona gatete ai lea o Isaia i le mamalu o le Atua. Ua lagonaina e Isaia lona fa'atauva'a ma lona le agava'a aua o ia o se tagata laugutu leaga. E le'i teena e le Atua Isaia ae na alofagia o ia e le Atua. Na fa'amamaina ai e le Atua ona laugutu ma ana agasala ina ua fa'apa'i atu e le serafi le malala ola i ona laugutu. Ona tali atu lea o Isaia, "O a'u lenei, ina auina atu a'u." Ua ofoina atu e Isaia o lona ola e fai ma auaua a le Atua ona o lona agaga fa'afetai i le alofa mutimutivale o le Atua ia te ia, ua ia fa'amagaloina ai ana agasala. O le alofa tunoa o le Atua ia Isaia ua fa'atupuina ai le alofa ia Isaia e fa'asoa atu le alofa tunoa o le Atua i isi. E pei ona fetalai Iesu i le Luka 7:47, "Ua fa'amagaloina ana agasala e tele, aua ua alofa tele mai o ia; a o le ua fa'amagaloina i ai se mea itiiti, ua itiiti foi lona alofa." Ua fa'amanatu mai ia i tatou e Isaia, o le valaau a le Atua e amata mai i le liua ma le fa'afouina o tatou loto. Ma o le fa'amagaloga o se amataga fou.

**Tatalo:** Faafetai tele le Atua i se amataga fou. **Amene!**

**Aso Toona'i – Iuni 13: “Ua fanau se tama” (A child is born)**

**Tusi Faitau – Isaia 9: 1-7**

**Matua – f. 6:** *“Aua ua fanau mai mo i tatou le tama, ua foaina mai mo i tatou le atali'i, e i lona ua le malo, e igoa fo'i o ia, o le Silisili ese, o le Faipule, o le Atua malosi, o le Tama o le fa'avavau, o le Ali'i o le filemu.”*

O lea ua uma atu aso o le fa'amasinoga, a'o lea ua fa'amatala e Isaia le fa'amoemoe ola mo le fa'aolataga o le lalolagi. E ala mai i le fanau mai o le tama, e i lona ua le malo, e fai o ia ma fa'ailoga o le filemu ma le manuia ma le togiolaina o le lalolagi. O le a fa'aigoaina foi lenei tama o le Silisili ese, o le Faipule, o le Atua malosi, o le Tama o le fa'avavau, o le Ali'i o le filemu. O lo'o aumai e le tama se feau pito sili ona taua, e le mafai e le mafaufau o le tagata ona masueseina. Ma e le mafai fo'i e se pulega fa'alelalolagi ona fa'aumatia. Pe a tatou mafaufau i lenei valoaga, e mafai foi ona tatou toe mafaufau silsila i le fa'aaogaina o le pule i nei ona po. E le o le pule faalelalolagi e tutupu ai sauaga, maseiga, ma le ola saisaitia. Ae o le pule e fa'avae i le alofa, potu mai le Atua, ma le agalelei. I lenei lalolagi o lo'o fa'atauaina le pule malosi fa'aletagata, o lo'o ofoina mai e le Ali'i o le Filemu le isi ituaiga pule, e fa'avae i le loto alofa, loto maualalo, ma le agamalu, ma e sili atu lona malosi nai lo le pule fa'alelalolagi. E pei ona fa'aaogaina e le Atua lenei tama e fai ma fa'aolataga i le lalolagi, ia fa'apea fo'i ona fai i tatou ma fa'aolataga i isi tagata.

**Tatalo:** Fa'afetai tele le Atua i le tama o le fa'aolataga. **Amene!**

## ISAIA 1-39

### Ua ili le pu (*The trumpet sounds*)

**Aso Sā – Iuni 14: “O latou e le o tatou” (*Them not us*)**

**Tusi Faitau – Isaia 10: 1-4**

**Matua – ff. 1, 2a, 3a, 3i:** *“Oī talofa i e pule i pulega leaga, o e tusi fo’i i tusi fa’asaua; ina ia liliu ese le finauga a e ua matitiva...Se a fo’i se mea tou te faia i le aso e fa’aoa ai le sala, ma le malaia...O ifea foi tou te tu’u ai lo outou mamalu?”*

O se lapataiga a Isaia i pulega leaga o le a o’o mai le aso o le auega ma le malaia ia i latou. O i latou ua latou fai tusi pepelo e molia ai i le tulafono fafine ua feoti a latou tane ma e matitiva. O fao mea lava i latou ma le fa’asaua aua ua latou faoa aia tatau a e matitiva. O lea, e le liliu ese ai le to’asa o le Atua ia i latou pe a o’o mai le tafeaga. E fa’aumatia fa’atasi i latou ma e ua fasia. Aua o le aso o le fa’amasinoga o le aso o le auega. O a latou vetega oa o le a le toe aoga ia i latou. O le a fa’aumatia ma ave fa’atagataotauaina i latou. O se fa’asalaga mo e amio leaga ma e amio le tonu le famasinoga a le Atua. O le a aveesea ai le latou malosi ma o le a mafatia ma puapuagaina i latou ona o a latou amio leaga. O le a fa’aaogaina e le Atua Assuria e fa’ao’o atu ai lana fa’amasinoga ia i latou. Ina ia fa’ailoa atu ai ia i latou le leaga o le amio leaga, aemaise pe latou faia i e le taualoa, ma fafine ua feoti a latou tane, ma e matitiva. Ma o le a le maua se mea latou te sosola i ai. O le a le maua foi so latou fesoasoani aua e fa’ataunu’uina lava le to’asa ma le fa’amasinoga a le Atua.

**Tatalo:** Fa’afetai tele le Atua i lau amiotonu. **Amene!**

**Aso Gafua – Iuni 15: “Fa’atasi ona o ia” (*Together because of him*)**

**Tusi Faitau – Isaia 11: 1-10**

**Matua – ff. 2a, 6a, 6i:** *“E afio mau ia te ia le Agaga o le Ali’i; o le Agaga o le poto ma le mafafau.... E nofo fa’atasi le luko ma le tama’i mamoe... e fa’atasi fo’i le tama’i povi ma le leona ta’anoa atoa ma le manu peti, e ta’ita’iina fo’i i latou e le tama itiiti.”*

O lenei valoaga ua talitonu le au Kerisiano ua fa’ataunu’u ina ia Iesu Keriso, o ia lava o le Mesia na valo’ia ma o le a ia aumaia fo’i le filemu i le lalolagi. O lena filemu o se ata fa’alia i le nonofo fa’atasi o manu fe’ai ma manu ua ua fai ma a latou meaa. O le a mafai ai ona nofo fa’atasi le luko ma le tama’i mamoe, e taoto fo’i le nameri fa’atasi ma le tama’i oti; e fa’atasi fo’i le tamai povi ma le leona ta’anoa atoa ma le manu peti, e ta’ita’ina fo’i i latou e le tama itiiti, ua fa’asino ia Iesu. E aai fa’atasi povi fafine ma le urosa, e taoto fa’atasi a laua tama; e ai fo’i. e le leona ‘au o saito pei o le povi. E fa’apefea la ona tatou fa’aaogaina lenei o’ao’oga ua tatou maua mai lenei tusi a Isaia e ta’ita’ina ai lo tatou ola? Ia tatou maua le filemu o le Ali’i ma lona poto e mafai ai ona tatou nonofo fa’atasi ma aai fa’atasi ma o tatou fili. Aua a iai le Agaga o le Atua i totonu ia i tatou, e mafai ona tatou alolofa atu, ma agalelei atu i e ua fai i tatou ma o latou fili.

**Tatalo:** Fa’afetai tele le Atua i lou filemu ma lau upu. **Amene!**

**Aso Lua – Iuni 16: “I lena aso” (*In that day*)**

**Tusi Faitau – Isaia 11: 11-16**

**Matua – f. 16:** *“E i ai fo’i le ala tele mo e ua totoe o lona nu’u, o e ua totoe i Asuria; pei ona fai ia Isaraelu, i le aso na ia alu a’e ai nai le nu’u o Aikupito.”*

I lena aso o le a faia ai e le Atua se ala tele agai atu i Isaraelu, mo e o totoe o lona nu’u i Asuria, o Aikupito, ma Patoro, ma Kusa, ma Elama, ma Senara, ma Amato, atoa ma nu’u tu matafaga; e toe foi atu ai i Ierusalem, e pei ona fai ia Isaraelu, i le aso na latou o ese ai ma le nu’u o Aikupito. I lena aso o le a tu mai ai le Pogai o Iese, e fai ma tagavai o le nu’u, e saili ia te ia o nu’u ese; e matagofie foi lona malologa. O lea valoaga ua fa’ataunu’uina ia Iesu, le Mesia, le Pogai o Iese. Ma o Iesu ma lana fa’aolataga, o le a toe potopoto mai ai le fanauga a Isaraelu sa taapeape atu i itu e fa o le kelope, fa’atasi ai ma tagata uma o le lalolagi ua talitonu ia Iesu. Aua ua avea i latou uma ma tino e tasi ia Keriso. O le ala tele ua fai ma ala o le fa’aolataga ia Iesu Keriso. Ua toe fa’aleleia ai e Iesu le mafutaga vava lalata

a le Atua ma ona tagata sa mamao ese ma ia. Aua o ai lava ua talitonu ia Iesu, ma fa'atuatua ia te ia, ma talia Iesu, o ia o le Alo o le Atua, ma fai Iesu ma ona Ali'i Fa'aola, ma talitonu o Iesu na maluu ma toe tu manumalo nai e ua oti.

**Tatalo:** Fa'afetai tele le Atua mo lau fa'aolataga. **Amene!**

**Aso Lulu – Iuni 17: “E uiga i Tamaseko” (Concerning Damascus)**

**Tusi Faitau – Isaia 17: 1-9**

**Matua – ff. 1, 2:** *“Fa'auta, ua aveeseina Tamaseko, e le fai ma aai; e avea ma faupuegafale ua pau'u. E tu'ulafoaina aai o Aroeru; e fai mo lafu manu, latou te taoto ai, e leai fo'i se fa'amata'u a i latou.”*

Ua valoia e Isaia le fa'amasinoga a le Atua o le a o'o mai ia Tamaseko ma aai o Isaraelu ona ua latou o ese ma ia. Ua latou le ususita'i i le Atua ma ua fai tupua ua ta i o latou lima ma o latou Atua. Ma o le a auina atu e le Atua Asuria e fa'atafunaina o latou aai ma ave fa'apagotaina i latou. O le a le toe mafai ona nofoia o latou aai aua o le a fa'aleagaina mea uma. Ua le fiafia le Atua ia i latou ona ua latou le ususita'i ma ua fai a latou so'o malo ma fa'alagolago le tasi nu'u i le tasi nu'u, a ua latou le fa'alagolago atu i le Atua, o le na faia i latou. Po'o le a lava lo latou malosi, ma a latou aupega tau, ma o latou olo, ma le malosi o latou fitafita, e le mafai lava e ia mea ona puipuia i latou mai le fa'amasinoga a le Atua. Aua e sili atu le mana ma le malosi o le Atua nai lo malosi fa'aletagata. Aua ua fa'aalia ai i lenei tala le pule aoao o le Atua i le lalolagi atoa. Aua a finagalo lava le Atua e auina atu Asuria po'o se isi atunu'u e fa'aumatia i latou, ona ua latou o ese ma ia, e mafai lava, ona o ia o le Atua e pule aoao i atunu'u ma tagatanu'u ma mea uma lava na ia faia. Ma o le a avea fo'i le fa'amasinoga a le Atua ma auala e toe fo'i atu ai i latou i le Atua ma toe fa'aleleia le latou mafutaga vava lalata ma ia.

**Tatalo:** Fa'afetai tele le Atua i lau fa'amasinoga tonu. **Amene!**

**Aso Tofi – Iuni 18: “O se valoaga e fa'asaga ia Kuso (Aitiopia)”**

**Tusi Faitau – Isaia 18: 1-7 (A prophecy against Cush (Ethiopia))**

**Matua – f. 3:** *“O outou uma o e nonofo i le atu laulau, o outou fo'i o e mau i le lalolagi, a fa'atuina le tagavai i mauga ia outou vaai atu i ai; a ilia fo'i le pu ia outou fa'alogi ai.”*

O lenei valoaga ia Kuso o lo'o talo atu ai le perofeta o Isaia i nu'u uma ia latou va'avaai i le tagavai o le a fa'atuina i mauga, ma fa'alogi atu i le pu o le a ilia, i le mata'utia o le fa'amasinoga ma le vavega o le a faia e le Atua. O le a auina atu e le Atua Kuso po'o Aitiopia, le nu'u e malolosi ma le totoa, o le nu'u fo'i e mata'utia talu lona amataga, o le nu'u matua malosi lava ma le manumalo, e fa'ato'ilaloina le nu'u o Asuria ma fa'aumatia ana 'au. O lenei nu'u o Kuso ua fa'aioaina o le nu'u e “palalu ona apaau” aua o le nu'u e u u tetele o apaau o iniseti, e pei o se aketise, fa'atasi ai ma le gogolo o vaiatafe, ma le leo o le fa'amasinoga pe a o'o mai. Ma o le a atu lenei nu'u o Kuso ma mealofa i le Atua o Isaraelu i le mauga o Siona. Ma o le a toe tapua'i saoloto tagata uma i le Atua. E iloa ai e tagata uma o le lalolagi, o le fa'amasinoga a le Atua o le a sau i le taimi e finagalo i ai le Atua. Aua e pule le Atua i le taimi o lana fa'amasinoga. A e o le mea e tatau ona tatou faia, o le nonofo sauniuni, i so'o se taimi, e valaau mai ai le Atua i lo tatou ola.

**Tatalo:** Fa'afetai tele le Atua i lou alofa ua faasalafa mai mo i matou. **Amene!**

**Aso Faraile – Iuni 19: “O se fa'amanuiaga i le lalolagi” (A blessing on the earth)**

**Tusi Faitau – Isaia 19: 17-25**

**Matua – ff. 21, 22:** *“E fa'aioaina le Ali'i i Aikupito, e iloa fo'i le Ali'i e Aikupito i lea aso; latou te auauna ia te ia i taulaga ma mea alofa; latou te tauto fo'i i le Ali'i, ma latou fa'ataunu'uina. E taia fo'i Aikupito e le Ali'i, na te taia, ma toe fofoina; ona latou liliu ai lea i le Ali'i, ona fa'afofoga lea o ia ia te i latou, ma fofo ia te i latou.”*

O le valoaga o lo'o valo'ia ai e Isaia le togiolaina o Aikupito i se taimi o lumana'i. Ma o le a sau se taimi e matata'u ai tagatanu'u o Aikupito i le Ali'i, ma liliu atu o latou loto ia te ia. O le a fa'aioaina le Ali'i i Aikupito, e iloa fo'i le Ali'i e Aikupito, ma o le a latou auauna

atu ia te ia i taulaga ma mea alofa. O le a latou tauto fo'i i le Ali'i, ma latou fa'ataunu'uina. E taia fo'i Aikupito e le Ali'i, ma toe fofoina. Ona latou liliu ai lea i le Ali'i. Ona fa'afofoga mai lea o le Ali'i ia te i latou, ma fofo atu ia te i latou. Ma o le a faia ai fo'i se mafutaga fa'aso'omalo a Aikupito, Asuria, ma Isaraelu. O se so'otaga filemu ma le manuia o le a latou feso'ota'i ai i se auala tele vavave ma latou tapua'i fa'atasi atu ai i le Atua, ona o le Mesia. O nei nu'u e tolu o le a latou fefa'asoa'a'i i le manuia o le Ali'i. Ma o le a ta'ua e le Atua le nu'u o Aikupito, o "lona nu'u." A e o le a ta'ua e le Atua Asuria, o "le galuega a o'u a'ao." Ma o le a toe fa'aleleia le latou mafutaga vava lalata ma ia ona o Keriso.

**Tatalo:** Fa'afetai tele le Atua mo Keriso lou Alo. **Amene!**

**Aso Toona'i – Iuni 20: "Ia tatou a'ai ma feinu" (Let us eat and drink)**

**Tusi Faitau – Isaia 22: 1-13**

**Matua – f. 4:** "O le mea lea na ou fai atu ai, Ia outou liliu ese ia te a'u; ou te tagi lotulotu lava, aua tou te finau e fa'amafanafana mai ia te a'u, ona o le fa'atafunaina o le tama fafine a lo'u nu'u."

O lenei valoaga ua fa'asino ia Iuta. O le a o'o mai le fa'amasinoga i le aai o Ieruselema ua fa'aigoaina o le "Vanu o Fa'aliga." Aua o le aai o Ieruselema e fausia i luga o le mauga mauaulaga. A e o le mauga o lo'o tu i totonu o le vanu. Ma o Ieruselema o le aai paia, e iloa ai fa'aliga paia mai le Atua. Ae fa'auta, ua latou le maua lea fa'amanuiaga ona ua tauaso o latou mata fa'aleagaga. Ma ua latou le fa'alogi i le lapataiga a le Atua, o le a o'o mai le fa'amasinoga. O le a fa'asalaina le aai o Ieruselema ona ua latou a'ai ma feinu fiafia i uaina i le taimi o le osofaiga, a ua latou le salamo. Ua fa'amatalaina e lenei tusi faitau le vevesi o le aai i le taimi o le osofaiga, aua ua latou fa'alagolago i sauniuniga fa'aletagata, e pei o pa puipui, ma o latou olo, ma ua latou le amanaia ai le Atua pe fa'alagolago atu fo'i ia te ia. O le mea lea ua tagi lotulotu ai le perofeta o Isaia, ona o lona fa'anoanoa tele i le fa'atafunaina o Ieruselema. O le mea lea na fai atu ai Isaia. Ia outou liliu ese ia te a'u; ou te tagi lotulotu ai lava, aua tou te finau e fa'amafanafana mai ia te a'u, ona o le fa'atafunaina o le tama fafine a lo'u nu'u. O le lesona pito sili ona taua lea mo i tatou, ia tatou salamo, ma fa'amaulalo i luma o le Atua, ae aua le fa'alagolago i lou lava poto ma lou malosi; auā e lē mafai e ia mea ona laveaina tatou i lana fa'amasinoga.

**Tatalo:** Fa'afetai tele le Atua i lou fa'amanatu mai. **Amene!**

## **UIGA O PEROFETA: O AI E FIA AVEA MA PEROFETA**

*(Character of prophets: who'd be a prophet)*

**Aso Sā – Iuni 21: "Galueaina" (Working it out)**

**Tusi Faitau – Iona 4: 1-11**

**Matua – f. 4:** "Ona fetalai mai ai lea o le Ali'i, Ua lelei ea lou ita?"

O lo'o fa'amatalaina e lenei tusi faitau le finauga a le Atua ma Iona ina ua salamo le nu'u o Nineva ma ua laveaina e le Atua. O lo'o fa'aalia i lenei le silisili ese ma le mutimutivale o le alofa o le Atua i tagata uma. O le Atua e tele lona alofa a e tele gese lona to'asa. O le Atua e le manatu fa'apito e pei o Iona, i lona ita tele ia Nineva sa fai ma ona fili. Ma e le i talitonu Iona e le tatau ona maua e Nineva le alofa tunoa o le Atua. Ae tau lava na o ia ma Isaraelu e alofa i ai le Atua. O lona fa'afiaamiotonu na fa'aali atu ai e le Atua se lesona i le laau o le kikaiona na fa'atupuina e le Atua i le po. Ua malu ai Iona i le la i le taeao, ae o'o atu i le isi po, ua pe le laau, ua aina e anufe. Ona ita lea o Iona i le pe o le kikaiona. Ona fa'apea atu lea o le Atua, Iona, ua e ita i le pe o le laau, e sili atu ea lou alofa i le laau nai lo le afe ma afe o tagata Nineva o lo'o fia maua le ola? Ua fa'aalia i lea tala le alofa mutimutivale o le Atua, ua fa'asafua atu lea mo tagata uma lava, a e le o ni nai tagata. Ma e le faia fo'i e le Atua se galuega laveai e fa'avae i luga o tatou lagona ae fa'avae i luga o lona alofa tunoa i tagata uma. Ua sili atu ia lona lona oti nai lo lona vaai atu ua faaolaina mai e le Atua ona fili. O le lu'i fo'i lea mo i tatou pe a tatou vaai atu ua alofagia e le Atua o

tatou fili. Tatou te feita ma fesiligia le Atua pe aisea ua maua ai e o tatou fili le manuia? A ua a'oa'o mai le Atua, ia tatou alolofa atu i tagata uma e o'o lava i o tatou fili.

**Tatalo:** Fa'afetai tele le Atua i le lesona o le alofa. **Amene!**

**Aso Gafua – Iuni 22: “Fa’atauaiga fa’a-fa’atusa”** (*Symbolic transactions*)

**Tusi Faitau – Ieremia 32: 6-15**

**Matua – f. 15:** *“aua o lo’o fa’apea ona fetalai mai o le Ali’i o ‘au, le Atua o Isaraelu, E toe fa’atauina i le nu’u nei o fale, ma fanua, ma tovine.”*

O lo’o fa’amatalaina e le perofeta o Ieremia o lo’o fa’afalepui puina i le lotoa o leoleo le fa’aaliga mai i le Atua mo ia ina ia alu e fa’atau mai le fanua o lona tausoga, e fai ma fa’atusa o le fa’amoemoe i le lumana’i, pe a toe fo’i mai le tafeaga, ua toe fa’afoi mai i latou e le Atua i o latou laufanua e toe atia’e ma toe fausia le malumalu o le Atua i Ierusalem. O le fefa’atauaiga o le fanua o le fa’amaufa’ailoga o le folafolaga a le Atua ia Ieremia, e i ai le aso na te toe fa’afoi mai ai le tafeaga i Papelonia, ma o le a toe mafai ona toe fa’atauina fale, ma fanua, ma tovine. I le vaitau o le tafeaga, o lo’o pisi solo tagata e lalafi mai le fa’atafunaga o Ierusalem, ua finagalo le Atua ia Ieremia na te fa’atauina se fanua e fai ma fa’amaufa’ailoga mo le fanauga a Isaraelu, na te le tu’ulafoaina i latou. O lo’o fa’amatalaina mai foi i lenei tala le Atua fa’amaoni o lo’o fa’atasi mai pea, e o’o lava i taimi o puapuaga.

**Tatalo:** Viia oe le Atua i lou fa’amaoni ia i matou. **Amene!**

**Aso Lua – Iuni 23: “Tu’uina o ia i lalo”** (*Putting him down*)

**Tusi Faitau – Ieremia 38: 1-13**

**Matua – f. 4i:** *“aua e le saili lenei tagata ia manuia lenei nu’u, a ia malaia.”*

Ua tu’u ifo Ieremia i lalo o le lua o le vaieli ua le toe i ai se vai ua na o le pala e magoto ma oti ai. Aua ua latou le fia fa’alogo i le valoaga a Ieremia. O le a fa’atafunaina Ierusalem e Papelonia. O ai lava e o atu i Papelonia i le tafeaga e ola i latou, a o le nofo i Ierusalem o le a fasiotia i latou. Ua latou le fia fa’alogo ia Ieremia. Ona taumafai lava lea o i latou e fasioti ia te ia. Aua ua latou talitonu. Fai mai i latou ua fa’avaivaia e Ieremia lima ma loto o tagata tau. Fai mai i latou ua le saili Ieremia ia manuia lona nu’u, a ia malaia. Ua fa’aseseina i latou i o latou lava manatu. Ua latou tu’u ifo ai Ieremia i le lua. A e na toe laveaina Ieremia e Epetemeleka, le eunuka. Ua talosaga atu Epetemeleka i le tupu o Setekaia ina ia fa’asaoina Ieremia, ona o atu lea o Epetemeleka ma nisi e 30, ma noanoa ni ie ie, ma tu’u ifo i lalo ma sisi a’e ai Ieremia i luga. E moni lava le valoaga a Ieremia, a latou tete’e atu i Papelonia, e fasiotia i latou. A fa’atafeaina i latou i Papelonia, e feola i latou. Ua fa’aailoa mai i lenei tala, le sauaina o perofeta a le Atua pe a latou ta’u atu le upu moni po’o le fe’au a le Atua. E le fia fa’alogo le to’atele o tagata i le upu a le Atua. A e mana’o lava le tagata ia e fai lona loto ma lona poto ma fa’amalieina lona loto i ona manaoga.

**Tatalo:** Fa’afetai tele le Atua mo lau upu moni. **Amene!**

**Aso Lulu – Iuni 24: “Feagai ma ia”** (*Dealing with it*)

**Tusi Faitau – Ezekiel 8: 1-16**

**Matua – f. 6:** *“Ua fetalai mai fo’i o ia ia te a’u, Le atali’i e o le tagata, ua e iloa ea mea o lo’o faia e i latou; o mea tetele e inosia o lo’o faia e le aiga o Isaraelu iinei, ina ia ou fa’amamao ma lo’u malumalu? A ia e toe liliu ane e te iloa ai mea e inosia e sili.”*

Ua fa’avaai e le Atua le perofeta o Esekeliu i mea inosia, o lo’o faia i totonu o lona malumalu. Ma o ia agasala o lo’o latou faia i le pouliuli ma lo latou fa’apea ifo e le iloa atu i latou i le pogisa. Ua taumamao ai le Atua ma i latou. Ua inosia i latou e le Atua ona ua latou ifo i tupua, ma atua ese. O le “tupua o le fua” o lo’o fa’atu i totonu o le malumalu i le mea o lo’o osi ai le taulaga i le Atua. O le isi itu o le malumalu o lo’o nonofo ai fafine ma fetagisi i le tupua o Tamusa. O le isi itu o le malumalu o lo’o ifo atu ai isi tagata i le la. O nei tupua uma na fausia i mea na faia e le Atua i le foafoaga o le lalolagi. O mea e leai ni ola. A ua latou tapua’i i ai. Ma ua inoino fofoga o le Atua ia i latou. O le mea lea ua finagalo ai le Atua e fa’ao’o mai ia i latou lana fa’amasinoga ma fa’atafunaina Ierusalem, ma fasia, ma

fa'atafeaina i latou uma e Papelonía. O le fa'amanatu mo i tatou, ia tatou va'avaai po'o a mea o lo'o fai ma o tatou tupua. I nei ona po i le tele o mea o lo'o fai ma tupua, o tupe, o telefoni, o feso'otaiga i luga o uegatafailagi, o le tusi foliga, ma fualaa'u fa'asaina. Ia tatou salamo, ma tatou o ese mai i tupua o lo'o fa'apologaina i tatou. Aua e inosia i tatou e le Atua pe a tatou le iloa o ia.

**Tatalo:** Fa'afetai tele le Atua i lau fa'amagaloga. **Amene!**

**Aso Tofi – Iuni 25: “Fa’atinoina”** (*Acting it out*)

**Tusi Faitau – Ezekielu 12: 1-7**

**Matua – f. 2:** *“Le atali'i e o le tagata, o lo'o e nofo i le aiga fouvale ua ia te i latou mata e vaai, a ua latou le vaai ai; ua ia te i latou taliga e fa'alogo, a ua latou le fa'alogo ai; aua o le aiga fouvale lava i latou.”*

O lenei valoaga o se ata fa'atusa na fetalai i ai le Atua ia Ezekielu na te fa'atinoina se ata fa'ata'ita'i o le fa'atafunaina o Ieruselema i le lumana'i. Ua fa'aigoaina e le Atua le fanauga Isaraelu o le aiga fouvale, e fai mata ae le vaai, fai taliga a e le fa'alogo. Ua tapena ai e Ezekielu lana ato mo le tafeaga i le ao a e eli e Ezekielu le pa i le po ma alu atu ai i fafo ma lana ato mo le tafeaga. Ua fusi fo'i e ia ona mata i le ie, ina ia le iloa e ia le mea o savali ai. Ua faia uma e Ezekielu nei fa'atinoga i o latou luma ia latou iloa ai le mea o le a tupu ia i latou pe a fa'atafeaina i latou i Papelonía. O le a ave fa'amalosia i latou i Papelonía. O le a tuua fo'i e i latou o latou fale ma o latou aiga ma o latou laufanua. Ona o lo latou le usitai i le Atua. Ua fa'aailoa atu e Ezekielu i le tupu o Setekaia, i lana fa'atinoga fa'atusa, o le a latou sosola atu i le po i le pa na latou eli. Ma o le a saisaia o latou mata ma ave fa'apagotaina i Papelonía, ma feoti ai. Sa faia e Ezekielu lenei fa'atinoga fa'atusa ina ia tatala ai la latou vaai ma la latou fa'alogo i le fa'amasinoga o le a o'o mai ia i latou.

**Tatalo:** Fa'afetai tele le Atua e, i le tatalaina o la matou mata. **Amene!**

**Aso Faraile – Iuni 26: “Olaina”** (*Living it out*)

**Tusi Faitau – Hosea 3: 1-5**

**Matua – f. 5:** *“E mulimuli ane, e toe fo'i mai le fanauga a Isaraelu, latou te saili i le Ali'i lo latou Atua, ma Tavita lo latou tupu; latou te matata'u fo'i i le Ali'i ma lona agalelei i ona po e gata ai.”*

O le valoaga a le perfeta o Hosea, i le fa'amoemoe o le a o'o mai, i le lumana'i, o le a latou ofo ma gatete tele ai, i le alofa silisili ese o le Atua, i lona fa'amaoni, i lona toe fa'aleleia o lana mafutaga vava lalata ma ona tagata, e ala ia Iesu Keriso. O le a latou le toe ifo atu i ni atua ese, po'o ni tupua ua ta. A e o le a fai le Atua ma o latou Atua. Ua fa'ataunu'uina le afio mai o le Mesia ia Iesu Keriso o le a fa'aolaina le lalolagi uma, i lona malii ma lona toetu manumalo. Ina ia maua e tagata uma, o e fa'atuatua ia te ia le ola e fa'avavau. Ua fa'atusaina e Hosea le fanauga Isaraelu i le fafine mulilua. O le fa'aailoga lea o le alofa fa'amaoni o le Atua. Tusa lava pe nonofo ma se fafine mulilua. E tumau pea lona alofa. Aua a uma loa le tafeaga, ona toe fo'i mai lea o le fanauga a Isaraelu i Ieruselema i o latou laufanua. Ma latou toe fausia le malumalu o le Atua. Ma latou saili i le Ali'i lo latou Atua, ma latou talia Iesu, e fai ma o latou tupu. Ua fa'ataunu'uina ai le Feagaiga a le Atua i le aiga o Tavita. Ua fai ai Iesu Keriso ma Ali'i Fa'aola, i lona agalelei i ona po e gata ai.

**Tatalo:** Fa'afetai tele le Atua e, ia Iesu Keriso le Ali'i Fa'aola. **Amene!**

**Aso Toona'i – Iuni 27: “Ta’ita’ina i tatou i fafo”** (*Leading us out*)

**Tusi Faitau – Sakaria 11: 4-17**

**Matua – f. 8e:** *“...ua inoino fo'i o latou loto ia te a'u.”*

O lo'o fa'amatalaina e Sakaria le fa'amasinoga a le Atua i leoleo mamoe leaga po o ta'ita'i o le ekalesia. O le a fa'aumatia e le Atua le vasega o leoleo mamoe leaga e tolu i le masina e tasi i lona inoino ia i latou. O lo'o fa'atusaina ia leoleo mamoe e tolu i perofeta pepelo, ma le au ositaulaga pepelo, ma e o fai ma tupu a e le matata'u i le Atua. Ua latou le tausii ma fafaga i le lafu mamoe. A ua latou tape ma 'ai mamoe. Ua gaudi ai e le Atua to'oto'o

e lua o leoleo mamoe, o le to'oto'o ua fa'aigoaina o le "Matagofie" ma le to'oto'o ua fa'aigoaina o le "Noataga." O le to'oto'o lelei ma le to'oto'o leaga. O se ata fa'atusa lea o le teena e ta'ita'i o le ekalesia o Iesu Keriso, le leoleo mamoe lelei. Ma o le a fa'alaina le leoleo mamoe lelei i tupe siliva e 30. Aua o Iesu o le leoleo mamoe lelei na tofia e le Atua, e fai ma fa'aolataga o le lalolagi. A o le leoleo mamoe leaga, le anetikeriso lea, o le a lafoai atu o ia i le afi e mu ai i le afi e fa'avavau fa'atasi ai ma ana vaega 'au. Aua o le teena e tagata o Iesu Keriso na iu ai i le fa'atafunaina o le malumalu o le Atua i le tausaga e 70 A.D. O lo'o a'oa'o mai lenei tala ia i tatou, a tatou teena Iesu, e o'o mai puapuaga ma le fa'amasinoga ia i tatou. O lea ia tatou nofo sauni ai mo le toe afio mai o Iesu Keriso.

**Tatalo:** Fa'afetai tele le Atua e, ia Iesu le leoleo mamoe lelei. **Amene!**

### **FA'ATAOTO** (*Parables*)

#### **Feagaiga Tuai ma le Feagaiga Fou** (*Old Testament and New Testament*)

**Aso Sā – Iuni 28: "Fa'aaoga sesē le pule"** (*Abuse of power*)

**Tusi Faitau – 2 Samuelu 12: 1-10**

**Matua – ff. 5, 7a:** *"Ona matua tupu ai lea o le ita o Tavita i lea tagata; ua fetalai mai o ia ia Natano, O lo'o soifua le Ali'i, e oti lava le tagata ua na faia lea mea; a o le tama'i mamoe, na te tau ai lea i mamoe e fa, ina ua na faia lenei mea, ma ua le alofa. Ona fai atu lea o Natano ia Tavita, O oe lava le tagata."*

Ua toe fa'amatala e le 2 Samuelu 12:5-7 le fa'ataoto na fa'aaogaina e le perofeta o Natano, e fa'aali atu ai ia Tavita lana pule fa'aletatau, ma lana agasala matuia ma le fa'alemigao sa fai i luma o le Atua. Ua ia mulilua ai ma fasioti tagata. Ina ua ia fa'amuamua Uria i luma o le 'au tau, ina ia fasiotia ai o ia i le taua. A e ave e Tavita le ava a Uria, o Patesepa, e fai ma ana ava. Ua fa'aalia i lea tala le uiga taufa'asese o le agasala. E fa'atauaso e le agasala mata o le tagata i ana lava agasala. A e vave lava ona tusi lima ma fa'amasino atu. Aua ua le mafai e i latou ona vaai o i latou lava mata. E pei o Tavita, ua vave lava lona ita ma fa'amasino atu i le mauoa faomea. Ma lona le silafiaina, o ia lava lea e fa'atatau i ai le fa'ataoto. A e fa'auta, o le Atua o le Atua alofa mutimutivale. Na ia tu'u avanoa ai ia Tavita ia salamo. A e ui i lea, o lana agasala, ua le te'a ese ai ma lona aiga le pelu ma le fevaevaeaiga. A e ui i lea, o Tavita o se auauna e tosina lona loto i le fatu o le Atua. Ua salamo ai ma anapogi ma ua fa'amagaloina o ia. Ua toe fa'aleleia ai le la mafutaga vava lalata ma le Atua. E pei ona ia tusia i le Salamo 51. A o se tasi lesone mo i tatou, e tasi le tagata e agasala, a e aafia ai i tatou uma, aemaise a tatou fanau ma o tatou aiga. O lea, ia tatou salamo ai nei lava, ma toe fa'afouina la tatou mafutaga vavalalata ma lo tatou Atua. I le suafa o Iesu, Amene.

**Tatalo:** Fa'afetai tele le Atua i lau fa'amagaloga. **Amene!**

**Aso Gafua – Iuni 29: "Taupulepulega potu"** (*Shrewd dealing*)

**Tusi Faitau – Luka 16: 1-13**

**Matua – f. 8:** *"Ua vivi'i atu le Ali'i i le auauna amioletonu: aua ua na togafiti potu: aua e sili le potu o tagata o le olaga nei, i lo latou tupulaga, i lo tagata o le malamalama."*

Ua vivi'i atu e le Ali'i le auauna amioletonu, sa pule i oa a le mauoa, ona o lana taupulepulega potu, na ia faia ai se auala e fa'amalie ai le loto ita o le mauoa. Na molia le auauna amioletonu i le mauoa, ona ua ia fa'ama'umau i oa a le mauoa. Ona aami lea e le mauoa ma fesiligia le auauna amioletonu po'o le a lea mea ua fa'alogi ai? Ma o le a le toe avea o ia ma auauna ma pule a le mauoa. Ona oso a'e lea o le mafaufau potu o le auauna amioletonu, po'o le a se mea na te faia e toe fiafia mai ai le mauoa aemaise i latou o lo'o i ai a latou aitalafu. Ona valaau lea e le auauna amioletonu tagata uma na aitalafu ma fa'apea atu, E fia lau aitalafu? Ona tali mai lea e afe kalone suau'u. Ona fa'apea atu lea o le auauna amio leaga, ia tofogi mai na o le lima selau. Ona matua fiafia ai lea o tagata aitalafu, ina ua mafai ona maua se latou pa'u. Ae fa'auta, o le tau moni lava lenei o le kalone suau'u ua pa'u i ai. E na o le lima selau. Aua o le isi lima selau o le fa'asiliga mo ia. Ona fa'apena ai lava lea

ona fai se'ia uma ona totogi mai aitalafu. Ua fiafia tele ai le mauoa aua o le poto o lenei auauna e fai le auala e fa'afiafia mai ai le au fa'atau ia te ia, aemaise ua uma ona toe totogi mai aitalafu a le ali'i mauoa. Fai mai Iesu, o le fa'amaoni i mea iti, e pule o ia i mea e tele. O le mea lea na vivii ai e Iesu lana taupulepulega poto, ae le o lana amio le tonu. O i tatou o fanau a le malamalama ae le o fanau o le pogisa. Ia sili atu lo tatou poto i le Atua nai le poto fa'alelalolagi.

**Tatalo:** Fa'afetai tele le Atua e i lau taupulepulega poto. **Amene!**

**Aso Lua - Iuni 30: "Fesoasoani mai se puna'oa e le'i mafaufauina"**

**Tusi Faitau - Luka 10: 25-37** (*Help from an unexpected source*)

**Matua - f. 27:** *"Ua tali atu lea o le a'oa'o tulafono, 'E te alofa atu i le Ali'i lou Atua ma lou loto atoa, ma lou agaga atoa, ma lou malosi atoa, ma lou manatu atoa; e te alofa atu fo'i i le lua te tuaoi, ia pei o oe lava ia te oe."*

O se a'oa'oga lelei mo i tatou mai lenei tusi faitau, Ia e alofa atu i lou tuaoi aua o le finagalo lea o le Atua. O le tuaoi o so'o se isi lava e ese mai ia te oe o lo'o mana'omia se fesoasoani. Tusa lava pe ese lona nu'u po'o lona atunu'u, pe ese fo'i lana aganu'u po'o lana gagana, o i latou uma lava o tuaoi. Mo se fa'ata'ita'iga, o le tala i le Samaria na agalelei i se tagata na fasia e le au faomea ma fa'ata'atia i le ala e oti ai. Ua iloa atu o ia e le Samaria ona mutimutivale ai lea o lona alofa ua fusifusi i ona manu'a, ua liligi foi i ai le suau'u ma le uaina, o mea taugata, ua fa'ati'eti'e i lana lava manu, ma ave i le fale talimalo ma tausi ia te ia. Na ia tu'u foi ni tenari se lua i le pule o le fale talimalo e tausi ai lenei tagata na fasia. Ma e toe foi mai fo'i e siaki po'o a mai le tagata na fasia. O se fesoasoani mai se puna'oa e le'i fa'amoemoeina. Aua o le tulafono sili, fai mai Iesu, ia e alofa atu i le Atua ma lou loto atoa ma lou agaga atoa ma lou malosi atoa ma lou manatu atoa. Aua afai e te alofa i le Atua, e te alofa fo'i i isi tagata. E o'o lava i tagata ua fai ma ou fili.

**Tatalo:** Fa'afetai tele le Atua e, i lou a'oa'o mai pea. **Amene!**



**TAUTUA PRINTING PRESS**  
1 Kanana Fou St, P.O. Box 1537  
Kanana Fou, American Samoa 96799  
(684) 699-9810  
<https://efkas.org>